

Yisasife Kanale Ke Yoni Kaemalenea Ke.

Yisasi'a nago agi'a Kemo'e haimu'enena maine.

¹ Ehe'ma Anumaya Koti'ma ma mopama taloma ohunea kanafina Yisasina nago agia Kemo'e huno maineane. Anumaya Koti'ene tokae'ana maina'ane. Ani Kemo'a, Yisasi'e, Anumaya Koti'ene nago'ya hu-maina'ane.

² Maina'ageno ehe kanafina ani kanoa Anumaya Koti'ene tokae'ana maina'ane.

³ Anumaya Koti'a hapaigeno Yisasi'a muki'a yana talo hu-maleneane. Yisasi'a nago yana talo ohunea yana omalene.

⁴ Ani Yisasi'a muki'a veala hamaimu ne'amamia kano maineanagino ani haimu'amo'a veala aye hale-ma-te yama'a hane.

⁵ Ani hale yamo'a haniki mainea yapina aye hale-mainegeno hani-ki-mainea yamo'a alino asu ohune.

⁶ Anumaya Koti'a nago kanoa hu-tegeno emaine. Ani kanomo agia Yoni'e.

⁷ Ani kanoa hale yamo ke hama-paigahe emainege'ya agai keleti muki'a vea'mo'ya hale yafe "Tamage hane." hu'ya agaife amakupi male'ya ametiti hisaya yafe emaine.

⁸ Yoni'a hale yamona aepa'a omainegi afa'a hale yamona aepa'a hanea kanomofe hama-paigahe emaine.

⁹ Ani tamage hale yama'a ma mopale eno muki'a vea'ne aye hale-ma-tegahe emaine.

¹⁰ Ani Yisasi'a ma mopama talo hu-malenea kano emaineanagi ma mopafi vea'mo'ya agete'ya aepa'a havilama hu'ya ohavinae.

¹¹ Agai'a talo hu-malenea mopale emaineamagi agai'a vea'mo'ya avale'ya falu fala hu'ya o'avalenae.

¹² Avale'ya o'atage'ya nagoke nagoke'mo'ya falu fala hu'ya Yisasina avale-mainaya vea'mo'ya Yisasife amakupi male'ya amametiti nehaya vea'mogamina Yisasi'a tokiya'aleti "Anumaya Koti nafa'neyagae." huno hu-ne'amate.

¹³ Ani vea'mo'ya vaya'mo kolateti o'amatemagi Anumaya Kotiteti ama-tene. Vemo augafa ageno ha'ye hu yateti o'amatene'gi Anumaya Kotiteti amatene. Vea'mo'ya nafa'ne atesaya amakesa haviya yateti o'amatemagi Anumaya Kotiteti amatene.

¹⁴ Yisasina nago agi'a Kemono atetegeni ve maineno tagai'ene mainegeta agaila alu aotage tokiya hale yama'a ne'agone. Ani kanoa Anumaya Kotina aiya nagoke nafa'ne'a maineamagino nafa'a agai'a alu aotage tokiya hale yama'a amigeno ali falu huno kayone'age ya'ene tamage'age hu ya'ene agai agu'afina hiya hu-maine.

¹⁵ Yoni'a keha keha nehuno agaife mage hie "Ma kanomofe nayona mage hu'na tamaha-pai-

mainoe haenaga¹a nago kanoa nagaila onatenele mainea yafe nagaila ago nagase-mainea kanoa egahiema hu¹na tamaha-pai-mainoane.”

¹⁶ Ali falu huno kayone yama¹a hiya humainefiti tagaila muki¹amogatina taya huno kanale manu tamiteno nago¹a kanale manuene nelamie.

¹⁷ Tamage Anumaya Koti¹a kahegi kema malenea kea Mosesena ayapi maleteno hapaigeno hama-pai-mainiamagi ali falu huno kayone ya¹ene tamage hu ya¹ene Yisasi Kalaisiteti ne¹alune.

¹⁸ Nagoke kanomo¹a Anumaya Kotina o¹agene. Tamage muki¹a veala o¹agenae. Aiya nagoke nafa¹ne¹amo¹a Anumaya Koti¹ene nago¹ya hu¹ana maina¹amagino ani kanomo¹a Nefa avate maineleti Nefana agai¹age tave-nelino aepa¹a hugafino taha-pai-maine.

Mono ti fal-mate Yoni¹a mono ke nehie.

¹⁹ Isaleli vaya¹mo¹ya Yelusalemu mainaleti Livae nofi vaya¹ene mono note kava vaya¹ene humatage¹ya Yonife “Kagaya tagae?” hutama havigeho hu¹ya hama-pai-mainae. Hama-paige¹ya mo havigageno Yoni¹a ma ke huno hama-nepaiye.

²⁰ Yoni¹a ani ke fala-kino ohunegi ani kea hu falote huno mage huno hie “Nagaya Kalaisi, Anumaya Koti¹ma taugafa ali-gatigahe hu-tenea kanoa nagaya omainoe.” huno hie.

²¹ Hige¹ya “Ani kanoa omaimagi kagaya tagae? Ilaiyaga mainapi?” hu¹ya havigageno “A¹ao

nagaya ani kanoa omainoe.” Yoni'a make huno hige'ya “Nagi Anumaya Koti aune kano mainapi?” hu'ya hageno “A'ao.” huno hie.

²² Hige'ya “Taha-paiyo kagaya tagae? Hula-tenaya vaya'mogamina kenona'amima hama-paisuna kea kagesafiti kagaika ali'yafe na'ane ke nehane?” hu'ya havi-negae.

²³ Nehageno Yoni'a kenona'amilela mage huno hama-nepaiye “Nagaya ma kano mainoe. Nage ai'na ka'me kotegati keha keha hisua kano mainoe. Aisaiya'a Anumaya Koti aune kanomo'a nayo hu-malenea kea mage hu'na nehue ‘Anumaya visia kana alitama hilato hutama ali fatago hiho.’

huno hu-maineanne.” huno hie.

²⁴ Anima havigesia kema ali'ya vaya vayala Falasia vaya'mo'ya hu-ma-tenae.

²⁵ Ani vaya'mo'ya Yonife mage hu'ya havi-negae “Kalaisigaene Ilaiyagaene Anumaya Koti aune kanoenema omaineka na'a higeke tina fale ne'amatane?” hu'ya havi-ge-mainae.

²⁶ Havigageno Yoni'a kenona'amilela mage hie “Ma nagaya titeti fale nelama-toamagi tamakaipina nagola o'agenaya kanoa he-ti-mainne.

²⁷ Heti-mainneamagino ani kanomo'a haenaga'a egahie. Nagaya afa kano mainoamagi'na agai aiyalela ayesuana onategahie.” huno hu-mainne.

²⁸ Yoni'a Petani kumate Yotani timona atu kaiyaga maineno vea'ne ti fale ne'ama-teno mani kea hu-mainnea kehe mehavi-ge-mainae.

Yisasi'a Anumaya Kotina Sipi sipi nafa'ne'a

maine.

²⁹ Faete¹ya kotige¹ya Yisasi¹a Yonitega ene¹legeno Yoni¹a ageteno mage huno nehie “Ageho mani kanoa Anumaya Kotina Sipi sipi nafa¹ne¹ae. Haenaga¹a haesageno falisia yateti ma mopale vea¹mogamina kefo ya¹amia alitalesia yafe emaine.

³⁰ Ani kanomofe nayona mage hu¹na tamahapai-mainoe ‘Haenaga¹a esia kanomo¹a nagaila onatenele mainea yafe nagaila ago nagasemainea kano egahie.’ hu¹na tamahapai-mainoane.

³¹ Nagaya agaila aepa¹a o¹agenoanagi Isaleli vea¹mogamina Yisasina amave-ligahe tina mo fale-ma-tesoe hu¹na emainoane.” huno hie.

³² Yoni¹a mage huno hama-pai-maine “Anumaya Kotina Alu Aotage Avamu¹amo¹a nama kana huno ikapinagati elavino ea¹yamo augafalela emainege¹na age-mainoe.

³³ Nagaya agaila o¹agenoanagi Anumaya Koti¹a ti fale-ma-to yate hu-natenea kanogino mage hie ‘Kagaya agegane nagai¹ni Alu Aotage Avamu¹mo¹a elavino nago vemo augafale¹ma emaisigekama agesana vemo¹a vea¹mogamina Alu Aotage Avamu¹aleti fale-ma-tegahie huka havigane.’ huno hige¹na havi-mainoane.

³⁴ Nagaya ani kema hia yana ago age-mainoleti tamaha-nepauve ma kanoa Anumaya Kotina ne¹amo maine hu¹na nehue.” huno hie.

Tali¹a (3) vaya¹mo¹ya Yisasi¹ene meli lo¹kae¹ya umainae.

35 Faete'ya kotige'ya Yoni'ene agai'aene tokae'ana nemai'a kanolata'ene ete'ya he-ti'ya mainae.

36-37 Yisasi'a ne'vigeno Yoni'a ageke huno ageteno mage hie “Anumaya Koti Sipi sipi nafa'nea atu maine.” huno hige'ana Yoni'ene tokae'ana nemai'a kanolatana ani kea havite'ana Yisasina akave ne'va'e.

38 Akave ne'va'ageno Yisasi'a mai-yahae huno anaketeno ke huno hana-vige “Na'afe ne'a'e?” huno hige'ana anakaya mage ha'e “Lapaiga hanate nemaine?” hu'ana neha'e. Lapai tagai kefina hu-mave-lina kanoe huno hie.

39 Yisasi'a mage huno hie “Etana mege'o.” huno hana-paige'ana agai'ene ne'va'ageno une kige'ana noma'a mogete'ana ani kanalela agai'ene maina'e.

40 Yoni kema havite'ana Yisasi akave'ma umaina'a kanolatapitila nago kanomo agia Etalu'e ani kanoa Saimoni Pitana agana'amo'e.

41 Etalu'a hagoteno nepu'amona Saimonife mo atiyeno mogefalote huteno mage huno hapaiye “Anumaya Koti'ma taugafa ali-gatigahema hutegeno emainea kanoa Kalaisina nagaya ago agoe.” huno hie.

42 Huteno Saimonina avaleno Yisasite ne'va'ageno Yisasi'a ageke huno ageteno mage hie “Kagaya Saimoniga Yonina nemofogae kagai kagia mage hu'na nemaloe Sifasigae Pitagae.” huno nehie. Ani agilatamogania nago'ya humaina'e. Tagai kefina yafa'mogae huno malene.

Yisasi'a Filipife'ene Nataniolofe'ene ke hmaine.

⁴³ Faete'ya kotigeno Yisasi'a Kalili visia agesa havino vilegati Filipina mogeteno mage huno hapaiye “Kagaya nakave eno.” huno hapaiye.

⁴⁴ Filipi'a Petesaita kumate kanoë. Ani kumala Etalugani Pitagani kumale.

⁴⁵ Filipi'a Nataniolona moge-falote huteno mage huno hapaiye “Nago kanomofe Anumaya Koti amaune vaya'ene Mosese'ene mono auta'mafi kae-malenaya kanoa tagaya ago age-falote hunana agaya Nasaleti Yisasi'e Yosefena nafa'ne'amo maine.” huno hie.

⁴⁶ Higeno Nataniolo'a mage huno hie “Nasaleti kanale yana falote hisifi? Falote ohugahie.” huno higeno Filipi'a mage huno hie “Eka mego.” huno hapaiye.

⁴⁷ Hapaige'ana ne'a'ageno Yisasi'a Nataniolona ageteno mage hie “Ageho Isaleliti tama kanolafane. Mani kanoa nagola havige'a omale-neä kano maine.” huno hie.

⁴⁸ Higeno Nataniolo'a mage huno havinege “Nagai aepa'a na yu havimainanane?” huno havigegenö Yisasi'a mage hie “Filipi'a kagaila moge ohunegeka kagaya fiki yosamo aepale mainanage'na nagaya ago kage-mainoe.” huno hie.

⁴⁹ Higeno Nataniolo'a mage hie “Hulaveli kanomoga Anumaya Koti nafa'ne mainane. Kagaya Isaleli kotega ala sauve kano mainane.” huno hie.

⁵⁰ Higeno Yisasi'a Nataniolofe mage hie “Fiki yosamo aepale mainanage'na nagaya kage-

mainoafe tamage nehane huka kagupi maleka kametiti nehano? Haenaga'a tusi'a ala kava'yaga efalote hinageka agegane.” huno hapai-maine.

⁵¹ Yisasi'a amakaife mage hie “Tamagelafa hu'na tamaha-nepauve tamakaya ikamo'ma aihalenagetama ne'agetama ikapinagati emainoa kano vaya'mo natenea kanomonilela Anumaya Kotina ensole anaga'amo'ya naugafalela haite'ya lavite'ya nehisaigetama agegahae.” huno hama-nepaiye.

2

Kena kumate nago kanomo'a a alimaine.

¹ Tole kana maite'ya Kalili hanea kumala Kenae nehaya kumate nago kanomo'a a aligahe higeno Yisasina ita'amo'a anima a'ma aligahema hia nopi umaine.

² Umainege'ya “Yisasiga kagai'enema tokae'ya nemaiya anagakaene eho.” hu'ya ke hage'ya umainae.

³ Umaine'ya nenageno nofi alagamo tina ha'no higeno Yisasina ita'amo'a Yisasina mage huno hapaiye “Nofi alagamo tina ha'no hie.” huno hanepaiye.

⁴ Higeno Yisasi'a mage hie “A'oko 'Na'a ma'a huo.’ huka naha'opaiyo kagai yana omalene. nagaya tokiya'ni'a amavelisua kana'a falote ohune.” huno nehie.

⁵ Nehigeno Yisasina ita'amo'a kave'ma talo tala'ma hu'ya amamiya vea'nehe mage huno

hama-paiye “Nago kema hinagetama agai ke akave maleho.” huno hama-nepaiye.

⁶ Yuta vaya'mogami mono kemo'a mage humaine “Muki'a kanalela muki'a yana sese hutama ti faleho.” huno humaineane. Ani yafe sikisi'a (6) yafa ti ke'ayola vani hataleti'a (100) lita hanea ke'ayola anilela hane.

⁷ Hanegeno Yisasi'a kave'ma talo tala'ma hu'ya ne'amamiya vea'nehe mage huno hama-paiye “Mani li ke'ayo'yakafina hefitama havateho.” huno hama-paige'ya hefi havate-mainae.

⁸ Havatageno “Kavete'ma kava yagai-mainea kanole osi'a hefitama alitama momiho.” huno hige'ya hefili'ya umainae.

⁹ Hefili'ya momigeno ani kavete'ma kava yagai-mainea kanomo'a ani lina hagoteno'a titafa haniamagi haenaga'a eteno nofi alagamo ti hapaegeno neno akekeana higeno ani lina ea kama'a o'ageneamagi hefi'yama ali'ya'ma aya vea'nemo'yage havimainae. Kavete'ma kava kanomo'a a'ma alia kanohe ke huno mage huno hapaiye.

¹⁰ “Muki'a vaya'yaga hagote kanalela haga'age tina amamige'ya mageno amamu hige'ya haviyama hia tina ne'amamiya yamagi kagaya hagote kanalela afa li tamiteka haenaga haga'age tina nelamine.” huno nehie.

¹¹ Manima taloma hia tokiya avame yana Yisasi'a hagote kanale Kalili hanea kumala Kenae hu'ya nehaya kumate ani kavala talo nehuno tusi'a ala tokiya hale yama'aene amavelige'ya

agai'enema tokae'ya nemaiya anaga'amo'ya agete'ya ali'ya amakupi male'ya amametiti humainae.

¹² Na'a hu-maletege'ya Yisasi'ene ita'amo'ene agana'amo'yaene agai'enema tokae'ya nemaiya anaga'amo'yaene Kapaneamu lavi'ya osi kana'a anile mainae.

Yisasi'a ala mono nopi mone ali'ya ne'aliya vaya amanati-talene.

¹³ Nago ala imua Anumaya Koti'ma Yuta veaya'mogami amakinagomogami amaugafama aligatimainea kanahe amakesa havi havi nehaya imu negiya kana eva'yi hugahe higeno Yisasi'a Yelusalemu haimaine.

¹⁴ Yisasi'a ala mono nopi haino mogeana vaya'yagamo'ya pulumaka afuma sipi sipi afuma namama malenage'ya vea'mo'ya miya hisaya yafe malenageno Yisasi'a mokemaine. magi nago'a vaya'mo'ya alu kotega nehanea monea ne'ali'ya ani kumate'ma nehanea monea anona'a amamisaya yafe folomole male'ya mopale mainageno momakemaine.

¹⁵ Momaketeno nofiteti alifagagi maleneno muki'a vaya'ma sipi sipima pulumaka afuyakaene mono nopiti ali helafi ne'ataleno monema ayeyahae'ma nehaya vaya'mogami folomo'amiene mone'amiene ali helafi-talene.

¹⁶ Namayagama miya nehaya vayafe mage huno hamapaiye "Alitama eviho. Mafina nenafa nona tamakaya alitama maketi kumala talo ohiho." huno nehie.

17 Nehige¹ya agai¹aenema tokae¹ya nemaiya anaga¹amo¹ya avopima hanea kehe amakesa nehaviye. Ani kea mage huno haneane “Anumaya Koti nofena muki¹a kanale magesa havi havi hu¹na noka¹a kanale¹ya huno hanesia yafe aluya hu¹na muse nehue.” huno kaemalenege¹ya havi-mainayane.

18 Havimainayamagi¹ya Yuta vaya¹mo¹ya ete¹ya havinegae “Ani¹ama hana kavala ta tokiyaleti nehane? Tokiyaka¹a hane huta havisuna yafe nagola o¹agenona tokiya avame yana hugeta agamano.” hu¹ya nehae.

19 Nehageno Yisasi¹a kenona¹amia mage huno hama-paiye “Ma ala mono nona alitama lagape aitaletesage¹na tali¹a (3) kanale ete¹na ani nona ali¹na hetigahue.” huno nehie.

20 Hige¹ya Yuta vaya¹mo¹ya mage hu¹ya hapaiye “Kekamo¹a kanale ohia ke nehane tali¹a (3) kanale ani nona ali¹na hetigahue huka nehanamagi vaya¹yagamo¹ya foti sikisi¹a (46) kafufi mani nona kimalenaya none.” hu¹ya nehae.

21 Hu¹ya hageno Yisasi¹a ani avame kea hiamagi ani mono nofema hiana agai¹a augafahe nehie.

22 Yisasi¹ma faliteno¹ma he-ti-mainea kanafina agai¹enema tokae¹ya nemaiya anaga¹amo¹ya ani kema humainea kehena amakesa havimainae. Avopima hanea kene Yisasi¹ma humainea kene “Tamage humaineane.” hu¹ya amakupi male¹ya amametiti humainae.

Yisasi¹a muki¹a vayamogami amaku¹afina ago agemaine.

²³ Imuma negiya kanale Yisasi'a Yelusalemu maineno o'agenaya tokiya avame yana hige'ya agete'ya muki'a vea'nemo'ya “Tamage nehie.” hu'ya amakupi male'ya amametiti humainae.

²⁴ Hayamagi Yisasi'a muki'a vea'nemogami amaku'a ago amakea yafe agu'a no'amamie.

²⁵ Na'afene amakupima hanea yana ago age-mainea yafe Yisasi'a muki'a vea'mogamife “Tamakupima hanea yana naha-paiyo.” huno ohune.

3

Yisasi'a Nikotimasi'ene kea kea hu-maina'e.

¹ Nago Falasia kanoa Yuta vayate ala kava kano'amimo agia Nikotimasi'e.

² Nago kegela ani kanomo'a Yisasite eno mage huno hie “Humave-nelina kanomoga tagaya ago havimainone kagaya humaveli hama-veli nehana kanomoga Anumaya Koti'a hu-gategeka emainane. Kagaya o'agenaya tokiya avame yana nehane. Anumaya Koti'a kagai'ene omainele'asina ani'a kavala ohate'asine. Ani yafe tagaya ago havimainone Anumaya Koti'a hu-gategeka emainane.” huno hie.

³ Higeno Yisasi'a mage huno hie “Tamage-lafa hu'na kaha-nepauve anafinaga kanomo'ma nago kanoma haegafa huno o'atesiana Anumaya Koti'ma kava yagai-mainea kumala o'agegahie.” huno hie.

⁴ Higeno Nikotimasi'a mage huno hie “Alopa kanomona hana'a huno atele'asine? Ita'amo

aipafinaga eteno hai falesigeno nago'ene eteno atesie huka nehapio?" huno havinege.

⁵ Havigegeni Yisasi'a mage huno hie "Tamage-lafa hu'na kaha-nepauve titeti'ene Anumaya Koti Alu Aotage Avamu'moteti'ene o'atesiana Anumaya Koti'ma kava yagai-mainea kumatela o'ugahie.

⁶ Amaugafama hanea vea'mo'ya augafa hanesia nafa'ne amategahayanagi Anumaya Kotina Alu Aotake Avamu'moteti atesia kanomona Alu Aotage Avamu'mo'a haimula amigahie.

⁷ Nagaya mani kema hua kea 'Nago'ene eteka nato huka huo.' hu'na hua kehena havika kama'yoa aika atali ohuo.

⁸ Yasimo'a agai'a hau yate alino visia yana kaulagamo'a o'agene. Afa'a uhuhu uhuhu hia ke'a haviteka hanategati'ma aepa heno falote hia ka'ene vaiyea ka'ene o'agenane. Yasimo'ma hia avamete huno Anumaya Kotina Alu Aotake Avamu'mo'a nago kanomona ne'ateana no'agone." huno hie.

⁹ Higeno Nikotimasi'a mage huno havige "Ani yana hana'a huno falote hugahie?" huno havinege.

¹⁰ Havigegeni Yisasi'a mage huno hie "Kagaya Isaleli vea'ne hu-maveli hamaveli nehana kano mainanagi na'a higeka ohavinane?

¹¹ Tamage-lafa hu'na kaha-nepauve age-mainona yafe kaha-nepauve havilinona yafe kaha-nepauvanagi mani kea tamakave'no hune'atae.

12 Nagayama ma mopale yafe ago kaha-nepauvanagi ‘Tamage nehane.’ huka havika kagupi maleka kametiti nohanagi ikapinaga yafema kaha-paisugeka hana'a huka havika kagupina maleka kametitia hugane?

13 Nago kanomo'a ikapinaga ohainegi nagaya ikapinagati emainoa kanoa vaya'mo natenea kanomo'na nagai'ni'age ikapinagatila ma mopa-fina elavi-mainoe.

14 Mosese'a ka'me kotega maineno osifa'vea talo huteno yosale malega'maeno alisaga humainea kavala menia ani'a hu'ya ikapinagati emainoa kanoa vaya'mo natenea kanomonina navale'ya alisaga hugahae.

15 Alisaga hisageno muki'a vea'mo'ya ‘Tamage nehie.’ hu'ya amakupi male'ya amametiti hisaya vea'mo'ya agola maige maige hisaya hamaimula aligahae.”

16 Anumaya Koti'a aiya nagoke nafa'ne'a maineanagi ma mopafi vea'nehe tusiya huno hau ayamopafi haigeno ani aiya nagoke nafa'ne'a hu-tegeno elavino emaine. Emainegeta tagaya nagoke nagoke'mogata agaiife tagupi maleta tametiti hisunana haniki-mai yapi tegelege nehia atafina o'ugahunanagita agola maige maige hisuna tahaimula aliteta maigahune.

17 Anumaya Koti'a nafa'ne'amona mopale vea'ne kaiyeke hu-mateno nofi hu-matesia yatela hu-tegeno omenegi mopafi vea'ne amaku amamema'a ali-gatisiafene huno hu-tegeno emaine.

18 Emaineanagi nago¹a vea¹mo¹ya Yesasifena amakupi male¹ya amametiti haya veala Anumaya Koti¹a kaiyeke huno nofila hu o¹ama-tegahianagi nago¹a vea¹mo¹ya Anumaya Kotina aiya nagoke nafa¹nehe havi¹ya amakupi omale¹ya amametiti nohaya yafe Anumaya Koti¹a ago kaiyeke hu-ma-teteno ago nofi hu-ma-tene.

19 Kaiyekema hu-mate yamo aepa¹amo¹a ma¹a hu-maine, aye hale-ma-te kanoa ma mopafina ago emainege¹ya vea¹mo¹ya kefo yana nehu¹ya hani yapi maisaya yafe muse hu¹ya hale yafena nohamaiya yafe Anumaya Koti¹a ago kaiyeke hu-ma-tene.

20 Muki¹a kefo kava huge huge nehaya vea¹mo¹ya hale yafena nohamaige¹ya “Hale yapima visunage¹ya kefo yatia age-falote hugahae.” hu¹ya hale yapina nomae.

21 Tama kava nehaya vea¹mo¹ya hale yapima ne¹eya mage nehae “Anumaya Koti¹a taya higeta kanale yana hu-mainonafe muki¹a vea¹mo¹ya agesae.” hu¹ya nehae.

Mono tima fale-ma-te Yoni¹a Yisasifena hufalote huno hu-maine.

22 Na¹a hu-maleteno Yisasi¹ene agai¹aenema tokae¹ya nemaiya anaga¹ene Yutia umaine¹ya nago¹a kana umaite¹ya vea¹nea mono tina fale-ma-tenae.

23 Fale-ma-tegeno Yoni¹a Ainonie nehaya kumate maineno ani¹a huno vea¹nea fale-ma-tene. Ainoni kumala Salimie nehaya kuma¹mo aupate

hane. Kasago'ya ti'yaga anilega haneanagi'ya vea'mo'ya ete ete hageno tina fale-ma-tene.

²⁴ Yonina avale'ya nofipina o'atenageno ani lina fale-ma-tene.

²⁵ Yonienema tokae'ya nemaiya anaga'ene nago Yuta kanoene mono tima fale yamo au'ava yafe mohu mehu hu'ya ke vai-mainae.

²⁶ Ke vai-male'ya Yonitega mage hu'ya mo hane-paiye “Hulave nelina kanomoga Yotani limona ame haupalega kagai'enema mainegeka agaifema taha-pai-mainana kanomo'a menia agai'a tina fale ne'a-ma-tege'ya muki'a vea'mo'ya agaitega utele nehae.” hu'ya hae.

²⁷ Hageno Yoni'a mage huno hie “Anumaya Koti'a nago'a vea'mogamina nago yana o'amaminele'asina o'alile'asine.

²⁸ Tamakaya ago'ma hu-mainoa kea havili-nae. Mage hu'na hu-mainoe 'Nagaya Anumaya Koti'ma taugafa ali-gatigahe hu-tenea kanoa omainogi nagaya uhagote'na ne'visugeno agaya haenaga egahie.' hu'na hu-mainoe.

²⁹ Nago vemo'a a'ma aliana agai'a a maineanagi ayama hu-mainea kanomo'a agava huno a'ma ali-mainea kea haviteno tusi'a muse nehie. Ani'ama hia avamete hu'na Yisasitega vea'ma ne'vaya yafena nagaya tusi'a muse nehue.

³⁰ Yisasi agimo'a nagaila nagaseno ala huno haigahianagi nagai nagimo'a afete tavigahie.” huno hie.

Ikapinagati emainea kanohe hama-nepaiye.

³¹ Yoni'a mage huno hie “Anafinagati elavi-mainea kanomo'a muki'a yana amakase-maineanagi ma mopaleti'ma efalote hu-mainea kanomo'a ma mopale kano maineno mopale yafeke kea nehie. Ikapinagati elavi-mainea kanomo'a muki'a yana amakase-maine.

³² Ikapinagati elavi-mainea kanomo'a age-mainea yafe'ene havimainea yafe'ene hama-nepaiyanagi nago'a vea'mo'ya ani kea havi'ya amakupina nomalae.

³³ Nomalagi nagoke nagoke vea'mo'ya hu-mainea kea havi'ya amakupima malaya yafe 'Anumaya Koti'a tamage'age kano maine.' hu'ya hu-lokiya ne'vaiye.

³⁴ Anumaya Koti'a hu-tenea kanomona Anumaya Koti'a Alu Aotage Avamula nago haupa nago haupa huno o'aminengi muki'a hiya huno aminogeno Anumaya Koti kea nehie.

³⁵ Higeno nefa'a nafa'ne'amofena tusi'a muse nehuno muki'a kava yagaisia yana ayapi malene.

³⁶ Nago'a vea'nemo'ya nafa'ne'amofema “Tamage nehie.” hu'ya amakupi male'ya amametitima hayana agola maige maige hisaya hamaimula ago ali-mainayanagi nago'a vea'mo'ya nafa'ne'amo'ma hia kema akave'ma omalesayana ani hamaimula o'aligahae. Anumaya Koti'a ani vea'mogamina aipa haviya hu-mateno kaiye'kea ago hu-ne'amate.”

4

Yisasi'a Samelia a'ene kea kea nehie.

1-2 “Yisasi'a Yonina agaseno muki'a vea'mogamina tina fale-ma-teno hai-mainae.” hu'ya haya ke Falasia vaya'mo'ya havimainae. Yisasi'a agai'a tina fale o'ama-tenegi agai'aenema tokae'ya nemaiya anaga'amo'ya fale-ma-tenae.

³⁻⁴ Falasia vaya'mo'ya ago ani kea haviya yafe Yisasi'a haviteno Yutia ne'ataleno Kalili eteno ugahe amu'no kola mogaseno via kotega Samelia mo vaiyatete hu-mainae.

⁵ Nago Samelia kuma'mo agia Sika. Ani kumala Yekopu'a Yuta vaya'mogami amakinagomo'a nafa'ne'amona Yosefe aminea hoya hanelega hane. Yisasi'a ani kumate eva'yi hu-mainae.

⁶ Yekopu'a ti he-nefia kagemuyola hanegen o yagemo'a amu'no-ka'no higeno Yisasi'a kama vaiye-mainea yafe kasalo haegen o ani kagemuyo ti avayale eno mopale maine.

⁷ Mopale emainegen o nago Samelia a'mo'a ti he-figahe ne'egen o Yisasi'a mage hie “Tina namige'na nano.” huno hie.

⁸ (Yiasienema tokae'ya nemaiya anaga'amo'ya anile omainagi kave miya hugahe ala kumatega umainae.)

⁹ Yuta vaya'ene Samelia vaya'ene amako'ya hu'ya amahaote amahaote hu'ya nemaiya yafe ani Samelia a'mo'a mage huno hie “Kagaya Yuta kano mainanagi nagaya Samelia a mainogi na'a higeke nagaifena tina namige'na nano huka nehane?” huno havinege

¹⁰ Higeno Yisasi'a mage huno hie “Kagaya Anu-maya Koti'ma amuse yama kamisia yafema hav-

imainate¹asina tifena nagaila nahavi-gate¹asine. Tima namio hia kanoma nagemainate¹asina tifena nahaviganage¹na maige maige hisana tina kamule¹asine.” huno hie.

¹¹ Higeno ani a¹mo¹a mage huno hie “Ala kanomoga ani li komua afe yapi hanegi tima he-fisana ke¹ayola omalegi hanateti ani maige maige hisua tina he-fika namigane?”

¹² Yekopu¹a, taginagomo ani kagemuyola tamineane. Yekopu¹a nafa¹neyaga¹aene agai¹a afuyagaene ani komufitila ne-mainae. ‘Agaila agase-mainoe.’ huka nehapio?” huno hie.

¹³⁻¹⁴ Higeno Yisasi¹a mage huno hie “Muki¹a veala ma lipiti nesayana ete¹ya lifena amakegahi-anagi nagoke nagoke vea¹mogamima amamisua timo¹a amakusafinaga kapae nehagea ti kana huno lavige lavige hisige¹ya maige maige hisaya hamaimula amamigahie.” huno hie.

¹⁵ Higeno ani a¹mo¹a mage huno hie “Ala kanomogae ani lina namige¹na nano. Namisan-age¹na nago¹ene onahaugahianagi¹na malela tima he-figahena ete¹na omano.” huno hie.

¹⁶ Higeno Yisasi¹a mage huno hie “Negavena mo ke hu-lika male eno.” huno hie.

¹⁷ Higeno ani a¹mo¹a mage hie “Nenave¹a omaiye.” huno higeno Yisasi¹a “Nenave¹ma omaiyema hanana tamage nehane.”

¹⁸ “Kagaya faefu¹a (5) negave¹ya mainayane meni kanafina nago vene mainananagi miya huga-tenaya negave¹a omaine. Mani kea tamage huka naha-nepaine.” huno hie.

19 Higeno ani a'mo'a mage huno hie “Ala kanomogae nagaya ago havimainoe kagaya Anumaya Kotina aune kano'a mainane.

20 Taginagomo'ya ma ago'yale* Anumaya Koti agia alisaga nehayanagi tamakaya Yuta vaya'mogatama ‘Yelusalemu Anumaya Koti agia alisaga nehaya kumala hane.’ hutama nehae.” huno hie.

21 Higeno Yisasi'a mage huno hie “Ma a'moga nagayama tamage hu'na kaha-paisua ke havika kagupi ai-maleteka kametiti huo. Nago kana falote hinageno ma ago'yale'ene Yelusalemuene Anumaya Koti agia alisaga ohugahagi alu kumateti kumateti agia alisaga hugahae.

22 Tamakaya Samelia vea'mogatama agima alisaga nehaya kanomona age-lama hutama o'agenae. Tagaya Yuta vea'mogata agima alisaga nehuna kanomofe havilama hu-mainona yafe agia alisaga nehune. Tamaugafa ali-gatisia kanoa Yuta vayapiti falote nehie.

23 Nago kana falote hugahie. Ani kana ago falote hu-mainie. Nenafa agima alisaga hisaya vea'moya tamage hu'ya amaku amamema'afiti Nenafa agi alisaga hisaya kanamo'a ago falote hu-mainie. Nenafana amaku amamema'afiti agima alisaga hisaya vea'nehe ati ne'aye.

24 Anumaya Koti'a augafa omalenea avamula mainea yafe agai agima alisaga hugahena vea'moya amaku amamema'aleti tamage hu'ya agia alisaga hiho.” huno hie.

25 Higeno ani a'mo'a kenona'a mage huno hie “Kalaisi'a, Anumaya Koti'ma taugafa ali-

gatigahie huno hu-tesia kanoma esia kea nagaya ago havimainoe. Esiana muki'a yafena taha-paigahie." huno hie.

²⁶ Higeno Yisasi'a kenona'a mage hie "Nagaya nevaya'na kakai'enema maine'na kema nehua kanoa mani kano mainoe." huno hie.

²⁷ Mani kea nehige'ya agai'aenema tokae'ya nemaiya anagala ete'ya ne'e'ya Yisasi'ma a'mo'enema kea kea ha'a'yafe agete'ya tusi amakesa havi havi hayanagi nago'amo'ya "Na'afe nehane?" hu'ya a'mofena haviokenae. "Na'a hige'ka ma a'ene kea kea nehane?" hu'ya Yisasina haviokenae.

²⁸⁻²⁹ Ani a'mo'a ti kena ne'ataleno ala kumatega uno anifima mainaya vea'nehe mage huno hama-paiye "Muki'a nayoma hu-mainoa yama naha-paiya kanoa etama megeho. Ani kanoa Anumaya Koti'ma taugafa ali-gatigahema hu-tenea kanofi?" huno hie.

³⁰ Hige'ya kumala ne'atale'ya Yisasitega emainae.

³¹ Yaufa ne'age'ya Yisasi'enema tokae'ya nemaiya anaga'amo'ya Yisasifena mage hae "Hulave-nelina kanomoga nesana yana hanegi no." hu'ya nehae.

³² Nehageno Yisasi'a mage huno hie "Nagaya o'agenaya kave'nia hane." huno hie.

³³ Hige'ya ani anaga'amo'ya amakai'ami huge havige hu'ya mage hu-mainae "Nago kanomo nesia kavela ago alino me mainefi?" hu'ya hae.

³⁴ Hageno Yisasi'a mage huno hie "Nesua kavela ma hane hu-na-tenea kanomo'ma haisia

kava¹ma hu¹na naminea ali¹yana alivaya ayesua yana kave¹ni¹a hane.

³⁵ Ve¹mo¹ya nehaya ke mage hutama nehae ‘Fo¹a (4) ika maitesunageno afuma nelea kana falote hugahie.’ hutama nehafi? Nagaya tamahanepauve tamakaya hoyafina age-lama hutama ageho. Ani hoyafina ago afu-le-mainae. Anima hia kava hu¹ya ve¹mo¹ya nagai kema havi¹yama amakupi male¹ya anametiti hisaya yafe ago afu-le-mainae.

³⁶ Afuma leana Anumaya Koti kema havisaya yafe ayama hisia kanomo¹a anona¹a aligahianagi aya hu-mainaya vayala amakupi male¹ya amametiti hisayana agola maige maige hisaya hamaimula aligahae. Aligahayanagi ani hoyafima avina yama negalia kanomo¹ene afumalegeno ayama huno ne¹alia kanomo¹ene nago¹ya hu¹ana musena huga¹e.

³⁷ Manima ago¹ma hu-mainaya kea ‘Nago kanomo¹a kali-malegeno nago kanomo¹a nena¹a ne¹alie.’ hu¹ya haya kea tamage nehae.

³⁸ Nehagi nago¹a ve¹mo¹ya kasageke hu¹ya anima nagai kema ohavinaya ve¹mogamina Anumaya Koti ke ago hama-pai-mainagi tamakaya ayama hugahena ani vayate ago hu-lama-togetama hama-pai-mainayanagi¹ya amakupi malesagetama afa¹a nena¹age aligahae.” huno hie.

³⁹ Ani a¹mo¹ma hu-mainea kehe muki¹a Samelia ve¹mo¹ya Yisasife havi¹ya amakupi male¹ya amametiti nehae. Ani a¹mo¹a mage huno hu-mainae “Muki¹a hu-mainoa yana ago

naha-pai-mainene.” huno hu-mainea kehe havi'ya amakupi male'ya amametiti hu-mainae.

⁴⁰ Yisasite eva'yi hu'ya mage hu'ya hae “Tagai'ene maisane.” hu'ya havigageno Yisasi'a amakai'ene tole kana maine.

⁴¹ Mainege'ya kasago'ya vea'mo'ya agai kema haviya yafe amakupi male'ya amametiti nehae.

⁴² Amametiti nehu'ya ani a'mofe mage hu'ya hapaiye “Menima kagai kema havuna yafe Yisasi'ina tagu'a amita tametiti nohunagi tagayama agai kema tagaiti haviteta tagupi maleta tametitia nehune. Menia nehavune mani kanoa ma mopale vea'mogati taugafa ali-gatigahe emaine.” hu'ya nehae.

Yisasi'a kava kanomona nafa'ne'amona kali'a alino kanale hu-tene.

⁴³ Anile tole kana maiteno Yisasi'a ataleno Kalili umaine.

⁴⁴ Yisasi'a agai'a nayona mage huno hu-maineane “Nago mono ke hama-nepaiya kanomo'a agai'a vaya'amogamipi maineana vaya'amo'ya ‘Ala kanomo kegi havigetao.’ hu'ya nohae.” huno hu-maineane.

⁴⁵ Hu-maineanagi Kalili eva'yi hige'ya ani kumate vea'mo'ya hu falu fala hute'ya muse-kase hu-mainae. Na'afene ani vea'mo'ya Yelusalemu ala imu ki-mainaya kanale Yisasi'ma muki'a yama hu-mainea yama moge-mainaya yafe hu falu fala hute'ya musena hu-tenae.

⁴⁶ Musena hutetageno Yisasi'a eteno Kalili hanea kumala Kena kumate uva'yi hu-mainene. Ani kumatela Yisasi'a tifena higeno nofi alagamo

ti hapae-mainea kumale. Yisasi'a anile umainegeno nago kamani kava kanoa, Kapaneamu kumate kanogino, ne'amo'a kali ali-maine.

⁴⁷ Kali ne'aligeno nefa'a "Yisasi'ma Yutiati ago Kalili emaine." hu'ya haya kea haviteno aupa'a nafa'ne'a ne'ataleno Yisasite eno mage huno hie "Nafa'ne'ni'a falisia kava nehigi melika kanale huto." huno hie.

⁴⁸ Higeno Yisasi'a mage huno hie "Tamakaya tokiya avame yama o'agenutamahena nagaifena tamaku'a havi onamitama tamametitia ohugahae." huno hie.

⁴⁹ Higeno ani kamani kava kanomo'a mage huno hie "Ala kanomogae nafa'ne'ni'a ago faligagehe nehigi afa'a kaiyayeka nagai'ene eno." huno hie.

⁵⁰ Higeno Yisasi'a mage hie "Kagaya afa'a vuo. Nafa'nekamo'a ofaligahigi afa'a maigahie." huno higeno Yisasi'ma hia kea havino aku'afi maleteno ametiti nehuno umaine.

⁵¹ Emainea kate eteno maitagifeno ne'vigeno ali'ya nafa'ne'amo'ya me fotu hute'ya mage hu'ya hae "Kagaila nafa'nekamo'a ago kanale hu-tegeno maine." hu'ya me-hae.

⁵² Me hageno "Na kanale aepa heno kanale hu-tene?" huno hamavi-gege'ya "Ega yagemo'a ali tagifeno nagokete evigeno ani amuko-nakoma haiya kalimo'a kanale hu-tene." hu'ya hae.

⁵³ Hageno nefa'a agesa haviteno mage hie "Tamage yagemo'a ani kana'ale ene'vigeno Yisasi'a 'Nafa'neka ago kanale maine.' huno naha-pai-maine." huno nehuno agai'aene

muki'a anaga'aene Yisasife havi'ya amakupi male'ya amametiti hu-mainae.

⁵⁴ Yisasi'a Yutiati eteno Kalili emaineno ani'ama hia kavala napa tu (2) kanale tokiya avame yana hu-mainae.

5

Yisasi'a nago kali kanoa Petesaita li kotute maineeno alino kanale hu-tene.

¹ Haenaga'a Yuta vea'mo'ya ala imu Yelusalemu negiya kana falote higeno Yisasi'a anilega hai-mainae.

² Yelusalemu kegi'yafi nago fiana sipi sipi afuyagamo fiana hane. Ani fiana hanelela ti kotuna male-mainae. Ani li kotumo agia Yuta vaya'mogami* kefina Petesaitae. Ani kotutela faefu'a (5) fugagi'eta nona hane.

³⁻⁴ Muki'a kali veala aulaga asu hu-mai anaga'ene aiya avayu hu-mainae anaga'ene aiya'aya api hu-mai anaga'ene ani fugagi'eta no'yagafi alitalu hu'ya fae-mainae.

⁵ Nago anile nemaiya kanomona kali'amo'a teti eiti'a (38) kafu hu-mainae.

⁶ Yisasi'a anima faeno mainea kanoa mogeteno “Mani kanoa aya'aya kana kalia alino maine.” huno huteno mage hie “Kalikamo'ma ha'noma hisia yafena muse nehapio?” huno havige-mainae.

⁷ Havigeeno kali kanomo'a Yisasife mage hie “Humave-nelina kanomoga tima aikalafu'ma nehia kanale'ma naya huno navaleno tipi natesia

vayala omaiya yafe nagai'nige oanagi nagaila ago nagase'ya tipi aupa'a ne'vae.” huno hie.

⁸ Higeno Yisasi'a mage hie “Hetika fae omanaka'a ne'alika ka vuo.” huno hu-maine.

⁹ Higeno aupa'a kali'amo'a kanale hu-tegeno hetino fae omana'a ne'alino ka umaine. Kanale'ma hu-tenea kana Sapati kanalele.

¹⁰ Ani yafe Yuta vaya'mo'ya kali'ama ha'no hutea kanomofe mage hae “Meni kana Sapati kanalele. Na'a higeka faesana omanaka alika ne'vane? Tagai'ma kahegi kemo'a Sapati kanalele ani kavala ohuo huno hu-maineane.” hu'ya hae.

¹¹ Hageno kenona'amia mage hie “Kali'ni'a alino kanale'ma hu-na-tea kanomo'a mage huno naha-pai-maine ‘Fae omanaka'a ne'alika vuo.’ huno hu-na-tene.” huno hie

¹² Hige'ya mage hu'ya havigae “Mani kanoa hana kanomo kaha-paigeka faesana omanaka alika ne'vane?” hu'ya hae.

¹³ Hayanagi muki'a vea'ma anile alitaluma hagenofena Yisasi'a alu'ale ago umainegeni an-ima kali'ama ha'noma hutea kanomo'a mage hie “O'agoa kanomo ani kea hu-natene.” huno ha-mapaiye.

¹⁴ Haenaga'a Yisasi'a kanale hu-tenea kanomona mono nopi mainegeni mogeteno mage hie “Kagaya ago menia kalika'a ha'no huga-tegeka kanale huka mainanagi kefo kavala nago'ene ohuo. Kefo kava'ma hisanana nago'a kana ya aligane.” huno hie.

15 Higeno mani kanomo'a via'yamo Yuta vayafena mage huno hama-paiye “Yisasi'a alino kanale hu-natenea kanoe.” huno nehie.

16 Hianagi Yisasi'ma Sapati kanale'ma kali'ama alino kanale'ma hu-tenea yafena Yuta vaya'mo'ya aepa he'ya amaipa kafa hete'ya Yisasina ali'ya havi'ya hu-ne'atae.

17 Yisasi'a mage huno hama-nepaiye “Nenafa'a muki'a kanalela ali'yana ne'alige'na nagai'enena ani'a hu'na ali'yana ne'alue.” huno hie.

18 Mani kehena Yisasi'a “Anumaya Koti'a nagai Nenafa'e.” huno nehuno “Nagaya Anumaya Koti'ene nago kana kana huta'a maino'e.” huno'ma nehia kene Sapati kanale kahegi kema atagae-mainea yafe'ene Yuta vaya'mo'ya nago'ene ke vaite'ya “Haegahune.” hu'ya humainae.

Ikapinagati emainea kano vaya'mo atenea kanomo'a ali'yama alisia agia hane.

19 Yisasi'a mage huno hie “Tamage-lafa hu'na tamaha-nepauve Nafa'ne'amo'a agai'age nagoke kavala nohianagi Nenafa'ma nehia kavala age-maineafe ani kavala nehie. Nenafa'ma nehia kavala Nafa'ne'amo'a ani kavala nehie.

20 Nenafa'a Nafa'ne'amofena agu'afina nehaigeno agai'ma muki'a nehia kavala ave-nelie. Ave-ligeno ala kava'ma ago hu-mainea kavala agaseno haenaga'a tusi'a ala kavakefa ave-linegetama agetama atali atalu hugahae.

21 Nenafa'a fali-mainea vayala ali he-ti-mateno hamaimu'a ne'amamianagino Nafa'ne'amo'a

ani'a huno haiya vea'mogamina hamaimula ne'amamie.

²² Nenafa'a nago kanomona fako hu no'ateanagi muki'a veala fako hu-ma-tesia tokiya yana Nafa'ne'amona ago amine.

²³ Aminea yafe Nenafafema muki'a vea'mo'ya agima alisaga hayana ani'a hu'ya Nafa'ne'amo agia alisaga hisae. Nago'a vea'mo'ya Nafa'ne'amo agima alisaga ohisayana ani'a hu'ya hu-tenea Nenafa agiene alisaga nohae.

²⁴ Magi nagaya tamage-lafa hu'na tamahapauve nago'a vea'mo'ya ke'ni'a havi'ya hunatenea kanomofe 'Tamage nehie.' hu'ya amakupi male'ya amametiti hisayana ani vea'mogamina agola maige maige hisaya hamaimula ago ali-mainae. Ani veala hagote'ya fali-mai vaya kana hu'ya mainafiti heti'ya hamaimu'amia ali-mainae. Haenaga'a Anumaya Koti'a kaiye'kea hu o'ama-tegahie.

²⁵ Tamage-lafa hu'na tamahane-pauve nago kanamo'ma ago'ma falote hisiana amaku amamema'amo'a fali-mainaya vea'mo'ya Anumaya Koti nafa'nemo ke havite'ya akave malesayana he-ti'ya agola maigahae. Ani kana ago falote hu-maine.

²⁶ Nenafana agai'afi haimu'mo aepa haneanagi ani'a huno Nafa'ne'amofena 'Hamaimu'mona aepa'a maiyo.' huno hu-tene.

²⁷ Nafa'ne'amofena ikapinagati emainea kanoa vaya'mo atenea kanoginofe kaiye'kema hu-ma-teno fako hu-ma-tesia tokiya'a amine.

28 Mani kehena atali ohiho. Nago kana falote hisiana muki'a ago'ma falige'yama komufi he-vai-matenaya vea'mo'ya Yisasini nagea havigahae.

29 Havite'ya ani komufinagati he-ti'ya hatilavisage'ya kanale kava hu-mainesaya vea'nea het'i'ya agola maigahayanagi kefo kava hu-mainesaya vea'nea he-tisageno Anumaya Koti'a kaiye'kea hu-ma-teteno kina hu-ma-tenage'ya haviya hugahae.

Nago'a ya'ae nago'a kanoene Yisasi aepa'a hu-falote hu-mainae.

30 Nagai'nige nago kavala nohuanagi Anumaya Koti'a nahapai-mainea keleti kea fako hu-ne'ama-toe. Ani yafe fatago hulama hu'na kea fako hu-ne'ama-toe. Nagai'ni'a nagesafiti ani kavala nohuanagi hu-na-tenea kanomo'a agai'a huo hea kava'age nehua yafe fatago hu-lama hu'na kea fako hu-ne'ama-toe." huno hie.

31-32 "Nagai'nige'ma hu-hale'na aepa'a'nima tamaha-paisugeno'a ke'nimo'a haviya hugahianagi nago kanomo'ma nagaifema hu-haleno tamaha-nepaiyana nagaya ago havimainoe agayama nagaifema hia kea tamage nehie.

33 Tamakaya vayala hu-matage'ya Yonitega vageno Yoni'a nagaifena ke tamage tamaha-paimaine.

34 Nagayama vaya'mo'ya nagaifema hu-mainaya kea 'Afa ke nehae.' hu'na huanagi tamakaya ani kea havisageno tamaugafa aligatisia yafe tamaha-nepauve.

35 Yoni'a ka'ni kana huno maineno hana-galigeno'ma leana osi kanafi tamakaya agai ka'ni'mo'ma lea yafena musena hu-mainae.

36 Muse hu-mainayanagi nago tusi'a kanale ya'aene nagai aepaene tamave-li-maine. Ani yana ali-mainoa ali'yani'ae. Nenafa naminea ali'yama ali'na avaya-yesua yana Yoni'a nagaife hu-mainea kemo agase-mainenetama agetetama nagaifena havimainae. Ani ali'ya'ni'a Nenafa hu-na-tenea yafe tamave-li-maine.

37 Hu-na-tenea Nenafa'a nagaifena ago tamaha-pai-maineanagi tamakaya agaila age'a ohavitama agai aufina o'agetama hu-mainae.

38 Hu-tenea kanomofena 'Tamage nehane.' hutama tamakupina maletama tamametiti no-haya yafe Anumaya Koti kea tamakupina alitama nomalae.

39-40 Anumaya Koti kea nayo kae-malenaya avopi hapalitama ati-yetama ago age-mainae. 'Ani avopitila agola maige maige hisuna tahaimula aligahune.' hutama tamakesa havimainae. Ani avona nagaife hu'ya tamaha-pai-mainayanagi nagaitega esaya tamakesa nohaviye. Agola maige maige hisaya tahaimula tamamisua yafena nagaitega nomae.

41-42 Veala muse hu-na-teyafene hu'na nohuanagi tamakaifena nagaya ago havimainoe. Tamakaya tamaku'afina Anumaya Kotifena notama-haike'na ne'agoe.

43 Nagaya Nenafa agile emainoanagi navaletama falu fala hutama nonatayanagi alu

kanomo¹a agai¹a agile esigetama afa¹a avaletama ali falu fala hutegahae.

⁴⁴ Tamakaya ‘Alu vayatimo alu vayatimo¹ya muse hu-late¹ya ala tagi lamisae.’ hutama nehayanagi Anumaya Koti¹a agai¹age mainegi alu Anumaya Koti¹a omaineanagitama Anumaya Koti¹a muse hu-lama-tesia yafena no-tamahaiye. Na¹a nehayanagi hana¹a hutama nagaifena tamakupina maletama tamametitia hugahae?

⁴⁵ Tamakaya nagaife ma ke hutama ohaviho ‘Nefate kaiyekea hu-la-tegahie.’ hutama tamakesa ohaviho. A¹ao, nagaya kaiyekea hu otama-tegahuanagino tamakayama taya hugahiema hutama nehaya kanomo, Mosese¹ma tamaha-paiya kemo¹a kaiyekea hu-lama-tegahie.

⁴⁶ Mosese kema havitama tamakupi maletama tamametitima hale¹asina nagai kene ani¹a hutama tamametitia hale¹asine. Mosese¹a nagaife huno kae-maleneafe ani¹a hale¹asine.

⁴⁷ Tamakaya Mosese¹ma kae-malenea kema havitama tamakupi maletama tamametitia ohunayanagitama hana¹a hutama nagai ke havitama tamakupi maletama tamametiti hugahae?” huno hamavi-nege.

6

Yisasi¹a faefu tauseni¹a (5,000) vene¹nemogami kavela amamine.

¹ Haenaga¹a Yisasi¹a tipi kalefi uno Kalili* li kotuna takaeno umaine. Ani li kotumona nago agia Taipiliasie.*

2 Muki'a vea'mo'ya kali'amima alino kanale hu-ma-teno tokiya avame yama hige'yama agaya yafe akave umainae.

3 Vageno Yisasi'ene agai'aenema tokae'ya nemaiya anaga'aene ago'yale hai'ya mopale mainae.

4 Yuta vaya'mo'ya Anumaya Koti'ma amakinagomogami amaugafama ali-gati-mainea yafe amakesa havisaya imu* kisaya kana'a ago aupa hu-maine.

5 Yisasi'a ageno ataleno ageana muki'a vea'mo'ya agaitega ne'ageno amaketeno Filipife mage hie “Hanateti ani vea'mo'yama nesaya kavela miya hugahune?” huno hie.

6 Yisasi'a Filipina ayevataga huno mani kea nehuno agayama hugahema hia yana ago havi-maineno hu-maine.

7 Filipi'a mage hie “Nago kanomo'a tu hataletia (200) kanale ali'yana aliteno miya alino ani monea ataleno kave'ma miya hisiana ma muki'a veakefafina osi osi hu'ya kavela alite alite hugahae.” huno hie.

8-9 Higeno nago kanoa agai'aenema tokae'ya nemaiya anaga'amogamipitila, Saimoni Pitana agana'amo'a Etalu'a, mage huno hie “Nago nafa'nemo'a faefu'a (5) mayagi tole noyamegi huno ali-lino maine. Veakefamo alino ala higeno mani kavela osi kano'a haneanagi hana'a huno taya hisie?” huno hie.

10 Higeno Yisasi'a agai'aenema tokae'ya nemaiya anaga'amofe mage hie “Muki'a veakefa ‘Mopale maiho.’ hutama hama-paiho.” huno

hama-paiye. Ani kumala muki¹a ape¹age hanea kumalagi¹ya muki¹a veakefa mopale mainae. Ani veala faefu tauseni¹a (5,000) vene¹ne mainae.

¹¹ Yisasi¹a ani maya alino Anumaya Kotitega muse huno havigetenno muki¹a mopale mainaya vea¹mogamina fako huno amamite amamite hu-maine. Noyamene ani kava higeno muki¹a vea¹mo¹ya ani kavela nageno amamu hu-maine.

¹² Nemamu hu-male-tageno Yisasi¹a agai¹aenema tokae¹ya nemaiya anaga¹amofena mage hie “Muki¹a atupa-tapa kavela alitalu hutama maleho. Nago¹a osi osi atupa vitali vitali ohiho.”

¹³ Amakaya muki¹a veala faefu¹a (5) maya kano¹afiti nete¹ya atalaya atupayaga alitalu hu¹ya tuelufu¹a (12) kula ai-havate-mainae.

¹⁴ Anifi¹ma mainaya veakefamo¹ya Yisasi¹ma hu-mainea tokiya avame yana agete¹ya mage hae “Tamage huno Anumaya Kotina aune kano¹a hu-tesigeno ma mopafima egahiema huno hu-mainea kanoa mama ago emaine.” hu¹ya hae.

¹⁵ Hageno Yisasi¹a vaya¹mo¹yama hisaya kavala agu¹afinaga mage huno havimaine “Mani vaya¹moya nagaila sauve¹ami maisua yafe navalegahe nehae.” huno nehuno ne¹amataleno agai¹age ago¹yafi hai-maine.

Yisasi¹a ti avoyale ne¹vie.

¹⁶⁻¹⁷ Yagemo¹a lavi-falegeno une avamema¹a agai¹aenema tokae¹ya nemaiya anaga¹amo¹ya ala ti agegayalega ute¹ya tipi kalefi asaga hu-mai¹ya Kapaneamu vayana Yisasi¹a

amakai'enena o'lune. O'vige'ya yaufa uge uge hu'ya ne'vageno hani ki-ma-tene.

¹⁸ Ala yasigefamo'a eno tina melino mo ai-yahae me ai-yahae huno tusiya hu-maine.

¹⁹ Tusiya hige'ya tipi kalefima mainaya vaya'mo'ya yosaleti vailagai-li'ya vayana nago'a aya'aya'a sikisi'a (6) kilomita ti kotu'mona amu'nopi ne'u'ya agayana Yisasi'a ti avoyale aiya ayeme ayeme tipi kalema hanelega ne'ege'ya agete'ya tusiya hu'ya kolia hu-mainae.

²⁰ Koli nehageno Yisasi'a mage huno hama-paiye “Kolia ohiho mamona nagayae.” huno hama-nepaiye.

²¹ Hama-paige'ya vaya'mo'ya Yisasina tipi kalefi haisaga hu-maisia yafe muse nehu'ya tipiti avalesaga nehae. Ani tipi kalemo'a visaya kumatela aupa'a uva'yi hu-maine.

Veamo'ya Yisasife ati mai'ya aye-mainae.

²² Faete'ya kotige'ya tikotu'mona atu kaiyaga mainaya vea'mo'ya agete'ya mage hae “Nagoke tipi kale'age hanegeta age-mainone. Yisasi'enema tokae'ya nemaiya anaga'age ani lipi kalefi vayanagi Yisasi'a o'unegi ani vayala amakai'amige umainae.” hu'ya hae.

²³ Ani kumala Yisasi'a Anumayamotega nunamu huno muse huteno kavela amamige'ya ne-mainaya kumate nago'a lipi kaleyaga Taipiliasi kumateti anile ne'ae.

²⁴ Ne'e'ya muki'a vea'mo'ya megayana Yisasi'enema tokae'ya nemaiya anaga'ene

omainage¹ya megete¹ya tipi kalefi asaga hu-mai¹ya Kapaneamu Yisasife mo atiyе-mainae.

Yisasi¹a Ikapinaga mayae.

²⁵ Atiyeme vategati atu kaiyaga umaine¹ya Yisatina mogete¹ya mage hae “Hulave-nelina kanomoga na yu ma kumala meli-mainane?” hu¹ya havinegae.

²⁶ Havigageno Yisasi¹a mage hie “Nagaya tamagelafa hu¹na tamaha-nepauve tamakaya kave¹ma tamamugetama nageno tamamu¹ma hu-mainea yafe natia ne¹ayayanagi nagaila tokiya avame yama hugetama age-mainaya yafena natia no¹ayae.

²⁷ Tamakaya kasalisia kavefena maitama ati o¹ayeho. Maige maigema hisaya kavefe¹ke maitama atiyeho. Nagaya Nenafa¹a, Anumaya Koti hu-na-tenea kanomo¹na ikapinagati emainoa kanoa vaya¹mo natenea kanomo¹na mani kavela tamamigahue.” huno hie.

²⁸ Hige¹ya mage hu¹ya havinegae “Tagaya hana¹a huta Anumaya Koti ali¹yana alisune?” hu¹ya havinegae.

²⁹ Hageno Yisasi¹a mage hie “Mani ali¹yana Anumaya Koti¹a muse nehia ali¹yane. Agayama hu-tegeno emainea nafa¹nemofе tamakupi male-tama tamametiti hisaya yafe muse nehie.” huno hie.

³⁰ Hige¹ya muki¹a vea¹mo¹ya mage hae “Hana augafa tokiya avame yana tave-lisanageta ageteta tagupina maleta tametiti hisune?”

31 Nayona taginagomo¹ya vaya omai kotega maine¹ya nago kavela agia manae nehaya kave ne-mainayane huno kae-maleneane
‘Tkapinagati maya amamige¹ya ne-mainae.’
huno kaemaleneane.” hu¹ya nehae.

32 Hageno Yisasi¹a mage hie “Nagaya tamage-lafa hu¹na tamaha-nepauve ikapinagati elavi-mainea maya Mosese¹a agai¹a o¹amaminegi N-nafa¹a ikapinagati tama maya menia nelamamie.

33 Anumaya Koti¹ma tamamia mayamo¹a ma¹a hu-maine nago kanoa ikapinagati ea maya mainea yafe ma mopale mainaya veala hamaimula amamine.” huno hie.

34 Hige¹ya mage hu¹ya hae “Ala kanomogae muki¹a kanalela ani maya tamige lamige huo.” hu¹ya hae.

35 Hageno Yisasi¹a mage huno hama-nepaiye “Nagaya hamaimu amamisua maya mainoe. Nagaitegama esia vea¹mo¹ya nago¹ene amakala otegahae. Nagayama hu-lama-tesua yafe amaku¹afi male¹ya amametiti hisaya vea¹mo¹ya tifena o¹amakegahae.

36 Nagaya ago tamaha-paugetama nagaila ago nagemainayanagi nagaya hu-lama-tesua yafena tamakupina maletama tamametitia nohae.

37 Muki¹a N-nafa¹ma naminea vea¹mo¹ya nagaitega egahae. Nago kanomo¹ma nagaitegama esige¹nahena ‘Eteka vuo.’ hu¹na hu o¹ategahue.

38 Hu-na-tenea kanomo¹ma haisia kava¹ma hisua yafe ikapinagatila hu-natege¹na emainoe. Nagai¹ni¹a nagesafiti kavala hugahe omenoe.

39 Hu-na-tenea kanomo¹ma haisia kava¹ma hisuana ma¹a hu-maine naminea vea¹nefitila nagoke kano¹a fanane ohisage¹na ma mopama ha¹noma hisia kanafina muki¹a fali-mainesafiti ali he-ti-matesuge¹ya agola maige maige hugahae.

40 Nenafa¹a ma¹a yafe musena nehie muki¹a vea¹mo¹ya nafa¹ne¹amona ne¹age¹ya agayama hu-matesia yafe havilama hu¹ya amakupi male¹ya amametiti hisayana agola maige maige yana aligahae. Alitesage¹na ma mopama ha¹no hisia kanafina nagaya fali-mainesafitila ali he-ti-ma-tesuge¹ya agola maige maige hu¹ya maigahae.” huno hu-maine.

41 Yisasi¹ma “Nagaya ikapinagati elavi-mainoa maya mainoe.” huno hu-mainea kehe Yuta vea¹mo¹ya Yisasifena ke vai¹ya kasago¹ya ke hu-tenae.

42 Mage hu¹ya nehae “Ma kanoa Yisasi¹a, Yosefe nafa¹nefi? Nefa¹ene ita¹amoene ago age-mainone. Na¹a higeno menia ‘Ikapinagati elavi-mainoa kano mainoe.’ huno nehie.” hu¹ya hae.

43 Hageno Yisasi¹a kenona¹amia mage huno hie “Tamakaya tamakaitamifima kasago¹ya kema hatagaya kea ataleho.

44 Nago kanomo¹a nagaitega agai¹a nomegi hu-na-tenea Nenafa avayu hinageno nagaitega enage¹na nagaya ma mopama ha¹no hisia kanafina fali-mainesifiti ali he-ti-tesugeno haimula aligahie.

45 Anumaya Koti aune vaya¹mo¹ya mage hu¹ya kae-malenayane

Muki'a vea'mogamina Anumaya Koti'a hu-maveli hamaveli hugahie hu'ya kae-malenayane.

Muki'a vea'mo'ya Nenafa'ma hu-mavelia kea havite'ya akave malenaya vea'mo'ya nagaitega ne'ae.

⁴⁶ Nago kanomo'a Nenafana o'ageneanagi Anumaya Kotitegati emainea kanomo'a agai'age Nefana age-maine.

⁴⁷ Tamage-lafa hu'na tamaha-nepauve nagaifema havi'ya amakupi male'ya amametiti humainaya vea'mo'ya agola maige maige hisaya hamaimula ago ali-mainae.

⁴⁸ Nagaya nagai'ni'a hamaimu amamisua maya mainoe.

⁴⁹ Ani tamakinagomo'ya vaya omai kotega maine'ya nago kave'mo agia manae hu'ya nahaya kave ne-mainayanagi ago fali-mainae.

⁵⁰ Fali-mainayanagi ma'a augafa ikapinagati elavia maya nesaya vea'mo'ya ofaligahae.

⁵¹ Nagaya Ikapinagati elavi-mainea maya mainoe. Ani mayamona haimu'a hane. Nago'a vea'mo'ya mani mayama nesayana agola maige maige hugahae. Ani maya nagai'ni'a naugafae. Ma mopale'ma mainaya veala agola maige maige hisaya yafe naugafa atalete'na faligahue." huno hie.

⁵² Hige'ya Yuta vaya'moya mani kekena ke vai'ya mage hu'ya hae "Mani kanomo'a hana'a huno augafa'a taminegeta nesuna yafe nehie?" hu'ya hu-mainae.

⁵³ Nageno Yisasi'a mage hie “Nagaya tamage-lafa hu'na tamaha-nepauve tamakayama ikapinagati emainoa kano vaya'mo na-tenea nafa'nemoni naugafaene kolani'aenema onesayana maige maige hisaya tamahaimula tamakupina omalegahie.

⁵⁴ Nago'a vea'mo'ya naugafaene kolani'aenema nesayana agola maige maige hisaya hamaimula ago ali-mainayanagi'na ma mopama ha'no hisia kanafina fali-mainesafitila ali he-ti-ma-tegahue.

⁵⁵ Nagai naugafa, kave tama hane. Kolani'aenena tama li hane.

⁵⁶ Nago'a vea'mo'ya naugafaene kolani'aenema nesayana nagai nagupi mainage'na nagaya ani'a hu'na amakai amakupina mainoe.

⁵⁷ Nenafa'a haimu'aene kanomo'a huanateneanagino nahaimula namige'na mainoe. Nago'a vea'mo'ya nagai naugafama nesayana nagai tokiyafiti hamaimula alite'ya maigahae.

⁵⁸ Ikapinagati elavi-mainea maya ma'a augafa maya hane. Yuta vaya'mogami amakinagomo'ya ne-mainaya maya kana ohune. Ani maya nete'ya ago fali-mainayanagi nago'a vea'mo'ya ikapinagati elavi-mainea mayama nesayana agola maige maige hugahae.” huno hie.

⁵⁹ Yisasi'a mani kea Kapaneamu mono nopi huno hama-pai-mainea ke.

Yisasi'a agola maige maige hisaya yafe humaine.

60 Muki'a akave'ma ne'vaya vea'mo'ya ani kea havite'ya mage hu'ya hae “Manima hu-mave-lia kemo'a tusi'a kana nelahaiye. Hana kanomo mani kea haviteno akave malesia amuko'a hane?” hu'ya hae.

61 Hageno Yisasi'a ani keheha akave'ma ne'vaya vea'mo'ya kasago'ya kema haya kea ago agu'afinaga haviteno mage huno hie “Mani kemo'a otamahaifi? Natalesaya tamakesa nehavifio?” huno hamavi-nege.

62 Nagayama, ikapinagati emainoa kanoa vaya'mo natenea kanomo'na, ete'nama hagote'na nemauva kumate'ma visugetama nagesayana hana'a hugahae?

63 Anumaya Koti Avamu'mo'a maige maige hisaya tamahaimula nelamianagi tamakai tamaugafamo'a nagola kanale yana notamamie. Nagaya Anumaya Koti Avamu'mo'a naminea ke tamaha-pai-mainoe. Ani kemo'a maige maige hisaya tamahaimula nelamamie.

64 Mani kea tamaha-pai-mainoanagi “Nago'amogatama ani keheha tamakupina alitama nomalae.” huno nehuno nayoma aepa he-mainea kanafina Yisasi'a amakupi male'ya amametiti ohisaya vea'ene agai'ama agesi huno kame ya hu-tesia kanoene ago haviline.

65 Yisasi'a nago'ene mage hie “Ani yafe mage hu'na tamaha-pai-mainoane nagoke veala amakai'amia nagaitega omegahagi Nenafa esaya amaku amakesa amamisige'ya nagaitega egahae.” huno hie.

⁶⁶ Mani kema hige¹ya kasago¹ya akave¹ma umainaya veala ete¹ya mai-yahae hu¹ya atale¹ya umaine¹ya nago¹ene agai¹enena me vai-o¹ayenae.

⁶⁷ Yisasi¹a tuelufu¹a (12) anaga¹amogamife mage huno hamavi-nege “Tamakaya ani¹a hutama nagaila natalegahao?” huno hamavi-nege.

⁶⁸ Hamavi-gegeno Saimoni Pita¹a kenona¹a mage hie “Anumayamoga hana kanomote visune? Kagai kemo¹a maige maige hisuna tahaimula nelamie.

⁶⁹ Tagaya ago havilinone kagaya alu aotage kava¹age kanoa Anumaya Koti¹a hu-gategeka emainananagita kagaifena tagaya tagupi maleta tametitia ago hu-mainone.” huno hie.

⁷⁰ Higeno Yisasi¹a mage hie “Tamakaya tuelufu¹a (12) anaga¹nimogatamina nagaya ago hapali-lama-tenoamagi tamakaipina nago kanomoga Kefo Avamu¹ene mainane.” huno hie.

⁷¹ Mani kema hiana Yutasife hu-mainene. Yutasi¹a Saimoni Isakaliotina nafa¹ne¹amo¹e. Tuelufu¹a (12) anagapiti Yisasina agesi huno kame ya hu-tesia kanohe hu-mainene.

7

Fugagi¹eta nopi maine¹ya imu negiya kanale Yisasi¹a mogegahe umaine.

¹ Ani kanafina Yutia kotega vaya¹mo¹ya hae-saya amakesa haviya yafe Yisasi¹a Yutia vai-o¹ayeno Kalili kotega ute ete huno maine.

² Ala kana, fugagi'eta nopi maine'ya imu negiya kana aupa nehie.

³ Aupa hige'ya Yisasina agana'amo'ya mage hu'ya hapaiye “Ma kumala ne'ataleka Yutia kotega uge'ya kakave'ma nehaya veala kagayama tokiyakaleti'ma alina ali'yana ageho.

⁴ Nago kanomo'a ‘Muki'a vea'mo'ya nagesae.’ huno kesi ali'yana no'alia yane. Kagaya ani tokiya ali'yana muki'a ma mopale vea'mogami amaufi alige'ya ani ali'yaka'a ageho.” hu'ya hae.

⁵ Hayanagi ani agana'amo'ya agaifena havi'ya amakupi male'ya amametitia ohunaya yafe ani kea hu-mainae.

⁶ Yisasi'a mage hie “Ali'yanila amave-lisua kana'ni'a falote ohunegi tamakaya muki'a kanalela tamakai'ma tamahaisia kavala hisaya kanatamilelagi afa'a haiho.

⁷ Nagai ke nohaviya vea'mo'ya tamakaifena musetami nehagi nagaya ‘Ase ohu kava nehae.’ hu'na hama-pauva yateti nagaila amaipa kafa henenatae.

⁸ Tamakaya Yelusalemu imulega viho. Nagaya ali'ya kana'ni'a falote ohuneanagi'na ani yafe menia imulega o'ugahue.” huno hie.

⁹ Ani kea hama-paiteno o'uno afa'a Kalili kotega maine.

Yisasi'a imulega umaine.

¹⁰ Agana'amo'ya imulega ago utageno Yisasi'a haenaga anilega hai-mainae. Vaya amaulela o'unegi kesi fala-kino umaine.

11-12 Falakino umainege¹ya Yuta vaya¹mo¹ya agayama imule¹ma esiafene hu¹ya moge mege hugetayana hige¹ya mage hu¹ya hae “Ani kanoa hanate maine?” hu¹ya hamavi-gage¹ya anifima alitalu hu-mainaya vea¹mo¹ya Yisasifena sumi sumi hu¹ya nago¹amo¹ya “Kanale kanoe.” hu¹ya nehage¹ya nago¹amo¹ya “Vaya aye-mavataga hugeno omai kanoe.” nehage¹ya hu¹ya hae.

¹³ Hayanagi Yuta vaya¹mogamife koli haya yafe ani kea ala kea ohunagi osi kefiti sumi sumi hu¹ya hu-mainae.

¹⁴ Ani imu kanamo amu¹nopinaga Yisasi¹a ala mono nopi haino hu-mave-li-mainae.

¹⁵ Hu-mave-nelige¹ya Yuta vea¹mo¹ya tusi¹a amama¹yo ne¹ai¹ya mage hu¹ya hae “Mani kanoa hana avo nopi uno age-mainea kanomo avopitila taha-nepaiye? Avo nopina o¹unea kanomo¹a hanateti ani kea haviline?” hu¹ya hae.

¹⁶ Hageno Yisasi¹a kenona¹amia mage huno hama-paiye “Hu-mave-nelua yana nagesafiti tamaha-nopaugi neva¹ya¹ma hu-na-tege¹na emainoa kanomo naha-pai-mainea ke tamaha-nepauve.

¹⁷ Nago¹a vea¹mo¹ya ‘Anumaya Kotina haisia kava hugahune.’ hu¹yama hisaya vea¹mo¹ya ma ma hu-lamave-nelua kea nagesafiti tamaha-nepaufi Anumaya Koti¹a naha-pai-mainea ke tamaha-nepaufi havigahae.

¹⁸ Havigahayanagi nago kanomo¹a agai¹a agesafiti kema hisia kanomo¹a ‘Nagai nagi alisaga hisae.’ huno nehianagi nago kanomo¹ma

‘Neva¹ya¹ma hu-na-tenea kanomo agi alisaga hisae.’ huno hisia kanoa kanale agu agesaene kano mainea yafe havigea ohugahie.

¹⁹ Mosese¹a kahegi kea ago tamaha-pai-mainea ke tamakaitamifina nago kanomoga ani kemona akavela nomalane. Na¹a higetama menia nagaila nahaegahena nehae?” huno hie.

²⁰ Hige¹ya melitalu hu-mainaya vea¹mo¹ya mage hu¹ya hae “Kefo avamu¹mo kagaila kagusafina maineno kavale-liteno nehie. Ta¹ya kahaegahena nehageka nehane?” hu¹ya hae.

²¹ Hageno Yisasi¹a mage huno hama-paiye “Nagaya nago tokiya ali¹yama Sapati kanale¹ma alua ali¹yafe tamama¹yoa ne¹aiye.

²² Mosese¹a nayona ‘Nafa¹netamimona agoya amega augafa¹a taga hu-taleho*.’ huno hama-pai-mainie. Ani kavala agai¹a alino aepa ohenege Mosesena aginagomo¹ya ani yana ali¹ya aepa he-mainae. Ne¹mo¹ma agoya ano¹ya¹a tagama hayana Sapati kanale taga hu-mainae.

²³ Tamakaya Mosese¹ma kahegi kema o¹atagaesaya yafe Sapati kanalela ne¹mo agoya ano¹ya¹a taga nehayanagi na¹a higetama nagayama Sapati kanalema nago kanoma muki¹a augafama ali¹na hilatoma hua yafena tamahaiya vai-nena-tae?

²⁴ Havigu ke nehae. Afa¹a amega yate agetetama ‘Kefo kava nehane.’ hutama nehagi tama kava hisigetama agetetama kaiyekea hu-teho.” huno nehie.

Vea¹mo¹ya “Yisasi¹a hana¹a augafa kano

maine?" hu'ya havigahe hu-mainae.

²⁵ Nago¹a Yelusalemu mainaya vea¹moya Yisasi¹ma hia ya agete¹ya mage hae “Ma kanoa ala vaya¹mo¹yama haegahunema haya kanofi?

²⁶ Ageho vaya amaulagafina kea nehianagi nago yana hu no¹atae. Kava vaya¹mo¹ya ma kanomofe Anumaya Koti¹a vea¹mogati taugafa ali-gatigahie huno hu-tegeno emainea kanoa mainea yafe havimainafi?

²⁷ Anumaya Koti¹a taugafama ali-gatigahema hu-tegeno emainea kanomofena ‘Hana kumateti emaine?’ hu'ya hugahayanagi ma kanoma ea kumala ago age-mainone.” hu'ya hae.

²⁸ Hageno Yisasi¹a ala mono nopi haino maineno hu-mave-nelino ala kefiti mage huno hie “Tamakaya nagai¹fena ago havilama hutama nage-mainafi? Nagayama emainoa kuma¹enefe havimainafi? Nagaya nagai¹ni nagesafiti omenogi nagai¹ma hu-natenea kanomo¹a tokiya¹age kano maineanagitama tamakaya agaila o¹agenae.

²⁹ O¹agenayanagi nagaya agai¹ene mainoleti hu-natege¹na emainoafenagi¹na ago age-mainoe.” huno hie.

³⁰ Hige¹ya agaila atafa hugahe hayanagi falisia kana¹a yaufa falote ohunea yafe augafalela nago kanomo¹a atafa ohune.

³¹ Ohunayanagi muki¹a anifima mainaya vea¹mo¹ya agai¹fena havi¹ya amakupi male¹ya mage hae “Anumaya Koti¹ma taugafa ali-gatigahema hu-tenea kanoma esiana ma mainea kanomo¹ma tokiya avame yama hu-mainea

kavala agasesifi? A'ao o'agasegahie. Ma kanoa Anumaya Koti'ma taugafa ali-gatigahema hu-tegeno emainea kano maine.” hu'ya hae.

Ati vayala hu-ma-tage'ya Yisasina atafa hugahe ne'ae.

³² Nehage'ya Falasia vaya'mo'ya agaifema sumi sumi'ma haya kea havite'ya mono note kava vaya'ene Falasia vaya'ene ati vaya'mogamina hu-ma-tage'ya Yisasina me haesaya malesaya kava hu'ya avalegahe ne'ae.

³³ Ne'ageno Yisasi'a mage huno hie “Osi kana kano'a tamakai'enena maite'na hu-natege'na emainoa kanolega ugahue.

³⁴ Tamakaya nagaifena natiyegahayanagi nagaila onagegahae. Visua kumatela tamakaya o'ugahae.” huno hie.

³⁵ Hige'ya Yuta vaya'mo'ya amakai'amifi huge havige hu'ya mage hae “Agayama ‘Nagaila onagegahaema.’ hia kumala hanama'alegafiga hanegenonehie? Agaya Kaliki kotega Yuta vaya'mogatina tatale'ya umainaya kotega umaineno Kaliki vea hu-mave-li hamaveli hugahe nehifi?

³⁶ Agayama hia kea ‘Tamakaya nagaila natiyegetesayana onagegahae. Visua kumatela o'ugahae.’ huno'ma hia kemo aepa'a na'ane huno nehie?” hu'ya hae.

Yisasi'a ofalita maige maige hisuna tife hu-maine.

³⁷ Imu kime hai'ya mogi ha'noma haya kana tusi'a ala kanae. Ani kanale Yisasi'a he-tino

ala kefiti mage hu-maine “Nago'a vea'ma tifema amakesia veala nagaite e'ya tina me neho.

³⁸ Nago'a vea'mo'ya nagaife havi'ya amakupi male'ya amametitia hisayana Anumaya Koti auta'mafina ani vea'mofe mage hu-maineane 'Ofali tina kasago'ya timo agu'afina hava-te-maineno vali-lavino tavigahie.' huno hu-maineane.” huno nehie.

³⁹ Yisasi'a anima hia kea “Alu Aotage Avamu'amofe hu-maine.” Ani Alu Aotage Avamula Yisasifema havi'ya amakupi malesaya vava amamite amamite hugahe nehie. Ani kema hia kanafina Yisasi'a yaufa ikapinaga ohainea yafe Alu Aotage Avamu'amo'a yaufa omenegenon hu-maine.

Veamo'ya agaifena tolefi ali fako hu-mainae.

⁴⁰ Nago'a alitalu hu-mainaya vea'moya ani kea havite'ya mage hae “Tamage-lafa huno mani kanoa Anumaya Koti aune kano emaine.” hu'ya hae.

⁴¹ Hage'ya nago'a vea'mo'ya “Anumaya Koti'a taugafa ali-gatigahe hu-tenea kano maine.” nehage'ya nago'a vea'mo'ya “Anumaya Koti'a taugafa ali-gatigahe hu-tenea kanomo'a Kalilitila falote ohugahie.

⁴² Anumaya Koti auta'mafina mage huno kae-maleneane

'Anumaya Koti'a taugafa ali-gatigahema hu-tenea kanoa Tevitina aginagomo egahie. Teviti'ma Petelehemu nemaiya kumate ategahie.' huno kae-maleneane.” hu'ya nehae.

⁴³ Ani vea'mo'ya agaifena tolefi ali fako hu'ya alu ke alu ke nehæ.

⁴⁴ Hage'ya nago'amo'ya “Agaila atafa hiho.” hu'ya hayanagi nago kanomo'a augafalela atafa ohune.

Mono note kava vaya'mo'ya Yisasifena havi'ya amametiti nohæ.

⁴⁵ Ati vayala ete'ya mono note kava vayate'ene Falasia vayate'ene vage'ya mage hu'ya hamavi-gæ “Na'a higetama avaletama nomæ?” hu'ya hæ.

⁴⁶ Hage'ya ati vaya'mo'ya mage hu'ya hæ “Yisasi'ma hia kea nayona nago kano'mo'a ani'a augafa kea ohigeta ohavinona yafe avaleta nomone.” hu'ya hæ.

⁴⁷ Hage'ya Falasia vaya'mo'ya mage hæ “Tamakai'enena ago aye-lamavataga humainefi?”

⁴⁸ Ifi nago'a kava vayapi Falasia vayapi ‘Yisasifena havi'ya amakupi male'ya amameti humainæ.’ hu'ya haya kea havimainafi?

⁴⁹ A'ao kava vayala ani'a ohunagi kahegi kema ohavi'yama alitaluma hu nemaiya vea'mogamina Anumaya Koti'a hai vai-ma-teno haniki-mainesia yapina hu-mategahie.” hu'ya hæ.

⁵⁰⁻⁵¹ Hageno Nikotimasi'a nayoma Yisasite'ma emainæ kanomo'a amakaipi maineanagino mage hie “Tagai mono kemo'a mage huno hie ‘Hagotetama nofi'ma hu-tesaya kanomona ‘Na'a ma'a humainoe.’ huno hisia kea havitetama kefo

kava¹ma hu-mainesia kanomona nofila huteho.¹ huno hu-maineane.” huno nehie.

⁵² Nehige¹ya “Kagaya kagai¹enena Kaliliti kano mainapi? Anumaya Koti ke kae-malenaya ke-fina hapalika havilama huteka kagai¹enena havio Kaliliti nagola aune kano omegahie.” huno hu-maineane hu¹ya nehae.

⁵³ Nehage¹ya muki¹a vea¹mo¹ya atagu-fe¹ya atale¹ya kuma¹amilega ute ete hu-mainae.

8

Kefo kava hu-mainea ala avale¹ya Yisasite emainae.

¹ Muki¹a vea¹mo¹ya kuma¹amilega ute ete hageno Yisasi¹a Olivi yosa hanea ago¹yafi hai-mainae.

² Kege¹afiti Yisasi¹a he-tino ala mono nopi umainege¹ya vea¹mo¹ya melitalu hageno Yisasi¹a mopale maineno mono kea hama-nepaiye.

³ Hama-nepaige¹ya kahegi kema havilinaya anaga¹ene Falasia vaya¹ene nago ala alu vene moli nehige¹ya agete¹ya avale¹ya alitalu hu-mainaya vea¹mogami amaufi me he-ti-tenae.

⁴ Me he-ti-tete¹ya Yisasife mage hu¹ya nehae “Hu-maveli kanomoga ma a¹mo¹a alu vene moli nehigeta ageteta avaleta ne¹one.

⁵ Mosese¹ma kahegi kema taminea kemo¹a ma¹a hu-mainae ‘Ani kava¹ma hisia a¹mona yafateti haetama he-vai-teho.’ huno hu-mainegi ‘Kagaya na¹ane huka nehane?’ hu¹ya nehae.

⁶ Agaifema mani kema hayana aye-vataga hu¹ya nago¹a havige hisigeta atafa huta kaiyeke

hu-tegahune.” hu'ya hayanagi Yisasi'a ape huno mopafi maineno aginagoleti avo negae.

⁷ Avo negaegel'ya anile'ma he-ti'ya maine'ya mani kema havige havigema haya vayafe Yisasi'a he-tino mage hie “Tamakaipiti'ma nago osi kefo yaka'a omalenesia kanomoga hagoteka yafana haga'yu huka mani a'mo augafalela aiko-lio.” huno hie.

⁸ Mage huteno eteno ape huno mopafi avo negae.

⁹ Mani kema hige'ya muki'a atagu-fe'ya ute ete hage'ya hagote'ya vayatamamo'ya atale'ya vage'ya haenaga muki'amo'ya atale'ya ute ete hageno Yisasi'a ape huno mainegeni ani a'mo'a aule he-tino maine.

¹⁰ Mainegeni Yisasi'a he-tino ani a'mofena mage huno hie “Ma a'mogae mani vayala hanatega vae? Nago kanomo'a kagaila kaiyekema hu-gatesia kanoa omainefio?” huno hie.

¹¹ Higeno mani a'mo'a mage hie “A'ao, ala kanomogae, nago kanoa omaine.” huno higeno Yisasi'a mage hie “Nagaya nagai'enena kaiyekea hu okategahugi afa'a ugananagi eteka nago'lene kefo yana ohuo.” huno nehie.

Yisasi'a ma mopafi ka'ni maine.

¹² Haenaga'a Yisasi'a mono nopi alitalu hu-mainaya vaya'yagahe mage hu-maine “Nagaya ma mopafi veala aye hale-ma-tesua kano mainoe. Nagai nakave'ma malesaya vea'mogatama maige maige tamahaimula hanea hale yana

alitetama haniki yapina ute ete ohugahae.” huno hie.

¹³ Hige'ya Falasia vaya'mo'ya Yisasifena mage hu'ya hae “Kagaya kagaika'a kehe hu-falote nehananagi kekahena havita tametiti ohugahune.” hu'ya hae.

¹⁴ Hageno Yisasi'a mage huno hie “Tamage nagaya nagai'ni'ahe kea nehuanagi hua kehena havitama tamameti hiho. Na'afene nagaya aepama he'nama emainoa kuma'ene visua ka'ene age-mainoanagitama tamakaya nagayama emainoa kuma'ene visua ka'ene o'agenae.

¹⁵ Tamakaya ma mopafi vea'mogamina no maiyateti fako nehayanagi nagaya nago kanomo no maiyana fako nohue.

¹⁶ Fako nohuanagi nagaya nago kanomoma fako hu ne'a-tesugenofena kema hua kelela havitama tamameti hiho. Nagaya nagai'nige fako nohuanagi hu-natenea Nenafa'a nagai'ene tole huno ali'yana ne'alino fako nehie.

¹⁷ Tamakai mono kemo'a mage huno nehie “Tole kanolatamoganima ke'animo'ma nagoke kate'ma visiana ke'animo'a tamage huga'e.' hutama nehayane.

¹⁸ Nagaya nagai'ni'ahena kea hu-falote hu'na nehugeno nagai'ma hu-natege'na emainoa Nenafa'a nagai'fena ani'a huno hu-falote nehie.” huno nehie.

¹⁹ Hige'ya havite'ya Falasia vaya'mo'ya mage hu'ya havigae “Negafa'ema hana kanoa hanate maine?” hu'ya havigageno Yisasi'a

mage hie “Tamakaya nagai¹ma onagenayana Nenfana ani¹a hutama o¹agenae. Nagai¹ma nage-mainale¹asipa Nenfana ani¹a hutama age-mainale¹asine.”

²⁰ Yisasi¹a mani kea ala mono nopina muse yama nemalaya kaiyaga maineno mani kea humave-lianagi agayama falisia kana¹amo¹a aupa ohunea yafe nago kanomo¹a agaila atafa ohune.

Yisasi¹a vea¹mogamifena “Visua kumatega o¹ugahae.” huno nehie.

²¹ Yisasi¹a eteno nago¹ene mage hu-maine “Nagaya ago visugetama nagaifena natiyegahayanagi tamakaitami kefo yatamia o¹ataletama hanesigetama faligahae. Nagayama visua katela tamakaya o¹ugahae.” huno hie.

²² Hige¹ya Yuta vaya¹mo¹ya amakai¹amifina mage hu¹ya hae “Nagayama visua katela tamakaya o¹ugahae huno¹ma hia kemona aepa¹a agai¹a augafa hae-faligahe nehifi?” hu¹ya hae.

²³ Hageno Yisasi¹a mage huno hie “Tamakaya afetegati emainayanagi nagaya anafinagati emainoe. Tamakaya ma mopafiti emainayanagi nagaya ma mopafiti omenoe.

²⁴ Na¹afene nagaya tamakaila ago tamahapai-mainoe ‘Tamakaitami kefo yatamia o¹atalesageno hanesigetama faligahae.’ hu¹na hu-mainoane. Tamakaifema nagaya ‘Ma¹a kano mainoe.’ hu¹na hu-mainoa kehe havitama tamakupi maletama tamametitima ohisayana kefo yatamia o¹ataletama hanesigetama faligahae.” huno hie.

25 Hige'ya “Kagaya tagae?” hu'ya havigageno Yisasi'a mage hie “Nagaya la'nae hu'na tamakaila hagote'na tamaha-pai-mainoane.

26 Tamakaifema kasago'ya kema, hu-lamate'na fako hisua kea hane. Nagai'ma hu-na-tege'nama emainoa kanomo'a tamage ke'age kano mainege'na agaitegati nagaya havimainoa ke ma mopafi vea'mogatamina tamaha-nepauve.” huno nehie.

27 Ani kea Nefafema nehige'yagi amakaya havi'ya aepali'ya ohavinae.

28 Ohavinaya yafe Yisasi'a mage hie “Tamakayama ikapinagati emainoa kanoa vaya'mo natenea kanomo'nina yafaga yosale alisagama hisaya kanafina tamakaya nagayama ‘Ani kano mainoe.’ hu'na hu-mainoa yafe havilama hutama havigahae. Nagaya nagai'ni nagesafitila nago yana nohue. A'ao nagaila Nenafama hu-mainea ke'age nehugetama nehavie.

29 Nagai'ma hu-natenege'na emainoa Nenafa'a nagai'ene maineno muki'a kanalela agayama muse'ma hia kava'ma huafenagino nagaila nonatale.” huno hie.

30 Hige'ya kasago'ya vea'mo'ya Yisasi'ma hia ke havite'ya amakupi male'ya amametiti nehae.

Ke-lamagemo'a alino tamakaila nofi hu-lamatenaya yana ha'no hisigetama afa vea maigahae.

31 Yisasi'a amakupima male'ya amametitima haya Yuta vayafena mage hie “Tamakaya nagai

kema muki'a kanafima akave'ma malesayana nagai ke havisaya anaga'ni'a maigahae.

³² Nagayama tamagama hua kema havilama hutama havisageno'a ani ke-lamagemo'a tamakaila kanama lamahaiya yamo'a nofi hu-lama-tenaya yana ha'no hisigetama afa vea maigahae." huno hie.

³³ Hige'ya kenona'a mage hae "Tagaya Apalahamu nofi vaya mainona yafe nago'a vaya'mo'ya nofila hu-la-tageta miya o'ali ali'yana o'alinone. Na'a higeka tagaifena nofila hu-lama-tagetama miya o'ali ali'yapi mainaya vea ali ha'no hisug-etama afa vaya kana hutama maigahae huka nehane?" hu'ya hae.

³⁴ Hageno Yisasi'a kenona'amia mage hie "Tamage-lafa hu'na tamaha-nepauve muki'a vea'ma kefo kava'ma taloma hisayana kefo ya'amimo'a nofi hu-ma-tege'ya miya o'ali ali'ya vea'ne kana hu'ya mainae.

³⁵ Nagi miya o'ali ali'ya veala nago'a afamopina agola omaigahayanagi atenea nafa'ne'amo'a agola ani afamopi maigahie.

³⁶ Anumaya Koti Nafa'nemo'a kefo yatamimo'ma tamatafa hu-mainea nofila alino lagama hu-taleana tamage huno ago alino laga hu-talegetama kanale hutama mainae.

³⁷ Nagaya ago havimainoe tamakaya Apalahamu nofi vaya mainayanagi nagai kemo'a tamakupina omalenea yafe nagaila nahaegahena nehae.

³⁸ Nagayama nehuana Nenafa'ma nave-

li-mainea ya'yagahe nehuanagi tamakaya tamakaitami nelamafa tamaha-pai-mainea kava nehae." huno nehie.

³⁹ Yisasi'a hige'ya Yuta vaya'mo'ya havite'ya mage hae "Nelafa'a Apalahamu maine." hu'ya hageno Yisasi'a mage hie "Tamagama tamakaya Apalahamu nafa'neyagama mainale'asina agayama nehia kavala talo hale'asine.

⁴⁰ Talo hale'asinagi menia nagaya tamage kema Nenfategati havimainoa ke tamaha-pauva kanomonia na'a higetama nagaila nahaegahena nehae. Apalahamu'a na'a kavala ohunea yane.

⁴¹ Tamakaya nelamafa nehia kava nehae." huno hige'ya "Itatimo'a moli hu-liteno huno otateneane. Tagaila Anumaya Koti'a agai'age nagoke nelafa maine." hu'ya hae.

⁴² Hageno Yisasi'a mage hie "Tamagama Anumaya Koti'a nelamafa'ma mainele'asina nagaya Anumaya Kotitegati emainoa yafe nagafena tamahaile'asine. Nagai'ni'a nagesafitila omenogi Anumaya Koti'a agai'a hu-na-tege'na emainoe.

⁴³ Na'a higetama kema hua kea havilama hutama nohaviye? Mani kemona aepa'amo'a ma'a hu-maine tamakaya havisaya tokiyatamia omaleanegitama nagai kea ohavigahae.

⁴⁴ Tamakaila Satani'a lama-tenea nelamafa agugesaga tokiya'age hutama nelamafa akave nemalae. Aepama he-mainelegati vaya hamaeno fali-ma-tegeno omai kanoe. Ani kanomo agupina tamage kemo'a omalenegeno havigema hiana muki'a kanale nehia kava nehie. Ani kanoa

havige'age canoe. Muki'a havigema hu yana Satani'a agai'afiti havige'age kemona aepa'a maine.

⁴⁵ Nagaya lamakaifena tamage'age ke nehua yafe havilama hutama tamakupi maletama tamametitia nohae.

⁴⁶ Hana vea'moga nageteka nagaifena 'Kefo yaka'a hane.' huka fako hu-nena-teka hu-falote hunategane? A'ao, ani'a ohugahae. Nagaya lamage'age kea hu'na tamaha-nepauvanagi na'a higetama nagaifena tamakupina havi nomalae?

⁴⁷ Nago'a veala Anumaya Koti nafa'neyaga maine'ya Anumaya Koti kea nehaviyanagi tamakaya Anumaya Koti nafa'neyaga omainaya yafe nagai kea nohaviye.”

Yisasi'a “Apalahamu'a falote ohunea kanafina nagai'ni'a nagaya mainoane.” huno nehie.

⁴⁸ Yuta vaya'mo'ya kenona'a Yisasifena mage hu'ya hae “Tagaya kagaifena tamage nehune 'Samelia kano mainane. Kefo Avamu'mo'a kagupina tamage maine.’ huta nehune.” hu'ya hae.

⁴⁹ Hageno Yisasi'a mage hie “Nagaipina Kefo Avamula omaine. A'ao nagaya Nenafa agi alisaga nehugetama lamakaya nagai nagia alitama afepinaga nemalae.

⁵⁰ Nagaya nagia alisaga nohuanagi nagoke kanomo'a nagai nagia alisaga hisia kano maine. Ani kanoa, Anumaya Koti'e, kaiyekea hu-matesia kano maine.

51 Tamage-lafa hu'na lamaha-pauve nagai kema akave'ma malesamo'ya ofaligahae.” huno hie.

52 Hige'ya Yuta vaya'mo'ya mage hae “Ani kema hana yafena tagayama havunana kagaika'a kagupi Kefo Avamula maine. Apalahamu'ene nayona mainaya Anumaya Koti amaune vaya'mo'ya fali-mainagi kagaya ‘Nagai ke akave malesamo'ya ofaligahae.’ huka nehano?

53 Apalahamu'a taginagomona ‘Agase-mainoa kano mainoe.’ huka nehano? Apalahamu'a falige'ya Anumaya Koti aune vayala ago fali-mainae. Kagaya hana'a augafa kano mainoe huka nehane?” hu'ya hae.

54 Hageno Yisasi'a mage hie “Nagaya nagima alisaga hisuana afa ya kana hugahianagi Nenafa tamakaya ‘Anumaya Kotitimo maine.’ hutama nehaya kanomo'a nagai nagia alisaga nehie.

55 Alisaga nehianagi tamakaya agaila o'agetafa hu-mainae. Nagaya agaila ago age-mainogi ‘Agai'ma o'agenoe.’ hule'asina tamakai kana hu'na havige'age kano maule'asinagi nagaya ago agaila age-mainoanagi'na agai kea akave nemaloe.

56 Apalahamu'a tamakinagomo'e nagayama ma mopale'ma falote hisua kanahe agesia yafena musena hu-maineanagi ageteno'a tusi'a muse hu-maine.” huno hie.

57 Hige'ya Yuta vaya'mo'ya kenona'a mage hae “Kagaya fifti'a (50) kafua ohunanagi kagaya vayatama omainane. Apalahamuna age-mainano?”

hu'ya hae.

⁵⁸ Hageno Yisasi'a mage hie “Tamage-lafa hu'na tamaha-nepauve Apalahamuna o'atenele nagaya hagote'na monafinaga mainoane.” huno nehie.

⁵⁹ Ani kema hia yafe yafa ka'yoteti ali'ya aiko-ligahe nehageno Yisasi'a fala-kino amataleno ala mono no kategati hati-lavino umaine.

9

Aulaga asu hu-mainea kanomo kea.

¹ Yisasi'a katega ne'uno nago kanoa atenea kanalegati aulaga asu humai kano moge-maine.

² Mo ne'agege'ya agai'aenema tokae'ya ne-maiya anaga'mo'ya mage hu'ya havige-mainae “Hula-ve-nelina kanomoga ta hia kefo yamo alino aulaga asu hu-maine akai'afi ita'afo'amo'a kefo ya ha'a yamo aulagamo'a asu hu-mainefi?” hu'ya havigae.

³ Havigageno Yisasi'a mage hie “Mani kanomo ita'afo'amo'a akai'aene kefo yama hia yamo alino aulaga asu ohunegi Anumaya Koti'a tokiya yama'a alino kanale hu-tesige'ya muki'a vea'mo'ya agesaya yafe aulagamo'a asu hu-maine.

⁴ Menima yagama hanesiama'aene hu-natenea kanomo ali'yana alige alige huta maisune. Han-ima kisiana nago kanomo'a ali'yana o'aligahie.

⁵ Menima ma mopale'ma mainoa-ma'ahena nagaya ma mopafina ka'ni aye-halesua kano mainoe.” huno hu-maine.

⁶ Mani kea huno nehuno avetu'na mopafi heteno mopaene ayegakalifeno aulagama asu humainea kanomo aulagale malega'maetene.

⁷ Malega'maeteten mage huno hapaiye “Kagaya Siloamu ti kotute mo sese huo. Ani li kotumo agia tagai kefina ‘Hu-tene.’ hu'ya nehae. Ani li kotute kaugosa mo sese huteka eteka eno.” huno higeno mo sese'ma hiana aulagamo'a kanale higeno ne'ageno noma'alega emaine.

⁸ Noma'alega ege'ya agai'a kumate vaya'ene nayoma mani kanomo'a monehema auka'ya nehige'ya ne'agaya vea'mo'yaene mage hu'ya humainae “Ma kanoa nayoma felu maineno mon-ehema auka'ya nehia kanofi alu kanoe?” hu'ya nehae.

⁹ Nehage'ya nago'a vea'mo'ya “Ani kanoe.” nehage'ya nago'a vea'mo'ya “Alu kanogi vuohe ani augafa kanomo nehigi.” hu'ya hageno agai'a nehuno “Nagaya mani kano mainoe.” huno humaine.

¹⁰ Nehige'ya muki'a vea'mo'ya havige-mainae “Hana'a hanageno kaulagamo'a kanale humaine?” hu'ya havigae.

¹¹ Havigeno mage hie “Nago kanoa, Yisasi'e kanomo'a, hapa talo huteno alino naulagale maleteno ‘Siloamu ti kotutega kaugosa mo sese huo.’ huno hige'na naugosa mo sese hute'na agoana aupa'a naulaga age-mainoe.” huno nehie.

¹² Hige'ya vea'mo'ya “Ani kanoa hanate maine?” hu'ya hageno “Nagaya o'agenoe.” huno humaine.

13 Aulagama asu hu-mainea kanomona Falasia vayatega avale'ya umainae.

14 Yisasi'a hapama ali gakalifeteno ani kanomo aulagama alino kanale'ma hu-teneana Sapati kanae.

15 Falasia vaya'mo'ya nago'ene mage hu'ya havigae “Hana'a hanageno kaulagamo'a kanale hu-maine?” hu'ya hageno “Hapa ali ga'maeno naulagale malege'na mo sese hugeno naulagamo'a kanale hige'na age-mainoe.” huno nehie.

16 Hige'ya nago'a Falasia vaya'mo'ya mage hae “Ani kava'ma hia kanoa Sapati kanomona akave omalea yafe Anumaya Koti'a ani kanoa hu-tegeno omene.” hu'ya nehage'ya nago'a vaya'mo'ya mage hae “Kefo yama'a hanesia kanomo'a ani tokiya avame yana talo ohile'asine.” hu'ya nehage'ya hute'ya tolefi ali fako hu-mainae.

17 Na'a hute'ya aulagama asu hu-mainea kanoa ete'ya havige-mainae “Ani kanoma kaulagama alino lamama hu-gatea kanohena na'ane hu-mainane?” hu'ya hageno mage hie “Anumaya Koti aune kanoe.” nehie.

18 Hige'ya Yuta vaya'mo'ya “Mani kanoa aulagamo'a asu hu-maineanagi menia aulaga ago agegali hu-mainae.” hu'yama haya kehena “Havige nehae.” hu'ya havi'ya amakupina male'ya amametitia ohu'ya aulagama asu hu-mainea kanomona ita'afomoganife'ene ke hage'ya emaina'e.

19 A'age'ya ita'afomoganife mage hu'ya

hana-vigae “Mani kanoa atena¹a kanafi aulagamo¹a asu hu-mainea nafa¹netani maineano? Na¹a higeno menia aulaga ne¹age?” hu¹ya hana-vigae.

²⁰⁻²¹ Hanavi-gage¹ana ita¹afo¹amogania mage ha¹e “Ta¹agai nafa¹ne maineanagita¹a ta¹agaya ago age-maino¹e. Aulagama asu hu-mainea nafa¹nema ateno¹ama¹a ago age-maino¹anagi aulagama age-mainema¹a o¹ageno¹e. Tapiga aulaga alino kali hu-teneafe tamakaya agai hav-ige¹ho. Alopa ve maineanagino agai¹a tamaha-paigahie.” hu¹ana neha¹e.

²²⁻²³ Ita¹afo¹amogania Yuta vayafe koli hu¹ana mani kea hu-maina¹e. Yuta vaya¹mo¹ya kea hu-lokiya vai¹ya mage hu-mainae “Nago¹a vea¹mo¹ya ‘Yisasina Anumaya Koti¹a taugafa ali-gatigahema hu-tenea kanoa ma maine.’ hu¹ya hisaya vea¹mogamina agola mono nopitila amati-talegahune.” hu¹ya hu-mainaya kehe koli nehu¹ana “Agaya alopa ve mainegi agai havige¹ho.” hu¹ana hu-maina¹e.

²⁴ Nago¹ene ete¹ya aulagama asu hu-mainea kanohe ke hageno ege¹ya mage hu-mainae “Kagaya Anumaya Koti aafi tamage-lafa huka kea huo. Tagaya agonana ani kanoa kefo kava¹age nehia kanoe.” hu¹ya hae.

²⁵ Hageno kenona¹amia mage huno hie “Nagaya o¹agenogi agaya kefo kava nehia nepi nohia nepi o¹agenogi nagoke¹ya kano¹ama agoana hagoteno¹a naulagamo¹a asu humaine¹anagi menia naulaga agegali nehue.” huno hie.

26 Hige'ya mage hu'ya havigae “Na'a hu-gatene? Hana'a huno kaulaga alino kali hu-gatene?” hu'ya havige-mainae.

27 Havigageno “Nagaya ago'ma tamahane-pauvana tamakaya ke'ni'a nohaviye. Na'a higetama etetama nahavi-negae? Tamakai'enena agai'aene tokae'ya nemaiya anaga'mogamipi maigahe nehao?” huno havige-mainae.

28 Hige'ya amakaya hu'ya akaya ate'ya mage hae “Kagaikage Yisasienema tokaeka nemaina kanoa mainanagi tagaya Mosesema kema nehavuna vayala anale haita mainone.

29 Tagaya ago havimainone Anumaya Koti'a Mosesena kea hapai-mainenanagi ma kanomo'a hanategati emaineno'e tagaya agaila no'agonane.” hu'ya hae.

30 Hageno aulagama asu hu-mainea kanomo'a mage hie “Avo nama'yo ne'aiye. Tamakaya alu kegefa nehae. Tamakaya hanategatipiga emainea ke ohavinayanagi naulagama alino kali hu-na-tenea kano afa kanoa omaine. Anumaya Kotitegati emaine.

31 Tagaya ago havimainone Anumaya Koti'a kefo kava nehaya vea'mogami kea nohaviye. Nago'a vea'mo'ya Anumaya Koti agi alisaga nehu'ya agai'ma haiya kava'ma hisaya vea'mogami kea Anumaya Koti'a havigahie.

32 Ehe'ma fusa kanafima ma mopama taloma hu-malenelegati'ma emaineana nago atenea kanalegati aulaga asu hu-mainea kanoa alino

kali hu-tene hu'ya haya kea ohavinonane.

³³ Anumaya Koti'ma mani kanoma hu-tegeno'ma omenele'asina nago yana agaya ohisine.” huno hie.

³⁴ Hige'ya kenona'a mage hu-mainae “Kagaya kefo yapiti falote huka emainananagika tagaila menia hu-lave-ligahe nehano?” hu'ya nehu'ya mono nopitila avale'ya kumatega haga'yu hu-talena.

Yisasife amametiti nohaya veala amaulaga asu hu-maine kana vea'ne mainae.

³⁵ Yisasi'a mono nopiti'ma anati-talaya kea haviteno ani kanoa atiyeno mogeteno mage hie “Kagaya ikapinagati emainea kanoa vaya'mo atenea kanomofena havika kagupi maleka kametitia nehano?” huno havige.

³⁶ Havigegeni ani kanomo'a mage hie “Ani kanoa ta'e? huka nehapi? Nagaila naha-paige'na havi'na nagupi male'na nametiti hano.” huno hie.

³⁷ Higeno Yisasi'a kenona'a mage hie “Kagaya agaila ago ne'lagane. Ani kanoa menima kagai'enema maineno kea kea neha'ane.” huno hie.

³⁸ Higeno ani kanomo'a mage huno hie “Aye'nio Alamogae menia kagaifena havi'na nagupi male'na nametiti nehue.” huno muse nehuno aiyafi ale'ya aye-maineno Yisasi aiyale ali-soso nehuno agi alisaga nehie.

³⁹ Yisasi'a mage hie “Nagaya ma mopale vea'mogami fako hu-ma-tesua yafe emainoe. Ali fako hisuge'ya amaulaga asu humai vea'mo'ya

amaulaga agesageno amaulagama hanea vea'mo'ya amaulagama asu hugahie.” huno hie.

⁴⁰ Hige'ya nago'a avate maiya Falasia vaya'mo'ya anima hia kea nehavi'ya agaifena mage hu'ya havigae “Tagaifena tamaulaga asu hu-maine huka nehano?” hu'ya havigae.

⁴¹ Havigageno Yisasi'a mage huno hie “Tamaulagamo'a asuma hu-mainesina kefo yatamia omalesinagi tamakaya ‘Taulagamo'a kali kali hu-maine.’ hutama haya yafe kefo yatamimo'a hane.” huno hu-maine.

10

Yisasi'a kanale sipi sipi afumo kava kano maine.

¹ Yisasi'a mage huno hie “Nagaya tamage-lafa hu'na tamaha-nepauve nago'a vaya'mo'ya sipi sipi kegi'yamo fiateti'ma hai ofale'ya afalegati'ma asaga hu-mai'ya hai falesaya vayala mus-ufa vaya mainae.

² Nago kanomo'ma fiateti'ma hai nefalea kanoa sipi sipile'ma kava ne'yagaiya kano maine.

³ Fiate'ma yagai-mainea kanomo'a ani kanoa ageteno yaki-tegeno fiateti hai falege'ya sipi sipiyagamo'ya alenaga agea havimainaya yafe agai'a sipi sipimogamina amakia hanete hanete hu-maineanagino amakia ayete ayete huno amavaleno kumatega ne'vie.

⁴ Amavaleno'ma kumatega ne'unofena uhagoteno ne'vige'ya ani kanomona alenaga

agema havimainaleti lagi¹ya ani sipi sipimo¹ya akave ne¹vae.

⁵ Nagi o¹agenaya vaya¹mogami amakavela o¹ugahae. Nagi ani kanomona alenaga agema ohavinaya yafe fale¹ya alulega ugahae.” huno hie.

⁶ Yisasi¹a mani avame kea hama-paiyanagi amakaya havilama hu¹ya ohavinae.

⁷ Ohaviyanagi Yisasi¹a nago¹ene eteno mage hu-maine “Tamage-lafa hu¹na tamaha-nepauve nagaya sipi sipimo¹yama hai falesaya fiana naga¹nige mainoe.

⁸ Mainoanagi hagote¹yama emainaya vayala vaya¹ma nehamae¹ya musufa yama nehaya vayalagi¹ya sipi sipiyagamo¹ya kema haya kea ohavinae.

⁹ Ma nagaya fia mainoe. Mainoanagitama nago¹a vea¹mogatama etama nagaipi ehai falesage¹na tamaku tamamena ali-gatisugetama hai faletama mainetama elavitetama haitetama nehutama nesaya yana aligahae.

¹⁰ Musufa kanomo¹a musufa yana nehuno veala nehamaeno ali haviya hu-ma-tegahe ne¹eanagi nagaya kanale¹nale tamahaimu tamamigahe emainoe. Agola ha¹no ohu tamahaimula tamamigahe emainoe.

¹¹ Nagaya kanale¹nale sipi sipi kava kano maine¹na sipi sipi¹ni¹amogamina amaku amamema¹a ali-gatisua yafe faligahue.

¹² Nago kanomo¹a yagaiteno mone ne¹alia kanoa sipi sipimona nefa¹a omaine. Omaigeno afela kalamo¹ma egeno¹a ani kanomo¹a ataleno

falegeno ani afela kalamo'a sipi sipimogamina akafu amanino mo hamae me hamae hige'ya fale'ya atagufe'ya alulega ute ete nehae.

13 Ani sipi sipile'ma yagaino maineno mon-ema ne'alia kanomo'a sipi sipiyagahena agesa ohavino amataleno faleno umaine.

14-15 Nagaya kanale sipi sipi kava kano mainoe. Nenafa'a agu'a namige'na nagaya nagu'a amugeta'a nehu'e. Na'a hu-maino'a kava hu'na sipi sipiyaga'nimo'ya amaku'a namige'na nagaya nagu'a ne'amamue. Nagaya sipi sipi'ni'amogami amaku amamema'a ali-gatisua yafe faligahue.

16 Nago'a sipi sipiyaga'ni'a amahaote mainae. Mani sipi sipi kegi'ya'nifina omainayanagi ani afuyaga amavale'nama esuana alenaga nage nehavi'ya nagoke'age afuyakama maisayana nagoke'mo'na ani sipi sipiyagalela kava kano maigahue.

17 Nagaya 'Afa'a faligahue.' hu'na hua kehena Nenafa'a tusiya huno hau ayamopafi nehaiye. Na'afene? Nahaimula atalesugeno eteno namisige'na he-tisua'yafe nahaimula afa'a atalegahue.

18 Nago'a vayamo'ya nahaimula naha-ofalegahae. Nagaya nagai'ni'age nahaimula atalegahue. Nahaimu'ma atalesua tokiya'ni'aene atalete'na ete'na alisua tokiya'ni'aene hane. Ani'ama hisua kava'mo kea Nenafa'a ago naha-pai-mainae." huno hie.

19 Mani kema hia kea Yuta vaya'mo'ya

havite¹ya tolefi ali fako hu-mainae.

²⁰ Kasago¹yamo¹ya mage hae “Kefo Avamu¹mo agupi hai-mainegeno aifo¹nafo nehigi na¹a hige-tama ke¹a maitama havimainae?” hu¹ya hae.

²¹ Hage¹ya nago¹amo¹ya mage hae “Kefo Avamu¹mo¹a agupima mainele¹asina mani¹a augafa kea ohile¹asine. Kefo Avamu¹mo¹a aulagama asu hu-mainea kanomo aulaga aligali hu-o¹atele¹asine.” hu¹ya hae.

Yuta vaya¹mo¹ya Yisasina kame hu-tenae.

²²⁻²³ Nayona mono no kimaletē¹ya fita yaki-mainaya kanahe muse nehaya imu Yelusalemu ki-mainae. Ani imua yasi ne¹alia kanale negiyanagino ani kanalela Yisasi¹a Anumaya Koti nopi umaineno Solomoni yasi ne¹alea nona aye-nagali-malenea kaiyaga ne¹vie.

²⁴ Muki¹a Yuta vea¹mo¹ya meli¹ya amu¹no hute¹ya maine¹ya mage hae “Tagu tagesamo¹a tole-lole nehuno taipamo¹a kana¹age nehigi. Menia hu-falote huka taha-paiyo kagaya Anumaya Koti hu-ga-tegeka emainana kano mainano?” hu¹ya hae.

²⁵⁻²⁶ Havigageno Yisasi¹a mage huno hie “Nagaya ago¹ma tamaha-pai-mainogi nagaifena havitama tamakupi maletama tamametiti nohae. Nenafa naminea tokiya yateti ali¹yana alugetama agayana ani yana nagaya Anumaya Koti hu-na-tege¹na emainoa kano mainoa yafe tama-velianagi nagai sipi sipima omai¹ya yafe havitama tamakupina nomalae.

27 Nomalayanagi nagai sipi sipiyagamo¹ya nagaila alenaga mage havite¹ya nakave malage¹na nagaya amakaila ago amake-mainoe.

28 Amakete¹na maige maige hisaya hamaim-ula ago amaminoanagi¹ya ofaligahae. Nagaila ago nayapi mainayanagino nago kanomo¹a memavayu ohugahie.

29 Nenafa¹a ani sipi sipiyaga naminea kanogino muki¹a yana amakase-mainea kano mainea yafe alu kanomo¹a Nenafa ayapitila haofalegahie.

30 Nenafa¹ene nagai¹niene nagoke maino¹e.” huno hie.

31 Hige¹ya Yuta vaya¹mo¹ya nago¹ene yafa ka¹yo ali¹ya haesaya kava nehae.

32 Nehageno Yisasi¹a mage huno hama-paiye “Nagaya muki¹a Nenafa naminea tokiya avame yana tamakai tamaulagafina ago hu-mainogi nagoke avame¹yana hana avame¹ya hua yamo notamahaigetama nagaila yafatetila nahaegahena nehae?” huno hama-vige.

33 Hama-vi-gege¹ya “Tokiya avame yama humainana yafene huta yafatetila okahaegahunagi kagaya ma mopafi afa kano mainekagi ‘Anumaya Koti¹ene nagoke maino¹e.’ hukama hanana Anumaya Kotina kalana ategana kema hana yateti kagaila yafa ka¹yotetila kahaegahena nehune.” hu¹ya hae.

34 Hageno Yisasi¹a mage hie tamakaitami mono kema kae-malenaya kemo¹a mage hu-maineanne “Anumaya Koti¹a mage hie “Tamakaitami Anumaya Kotigatama mainae.’ huno hie.”

hu'ya kae-malenayane.

³⁵⁻³⁶ Ani Anumaya Koti kea kae-malenaya ke hanege hanege huno tamage'age hugahie. Anumaya Koti kema ago'ma hama-paiya vayafena “Anumaya Kotigatama mainae.” huno hu-maineana nagaya Nenafafena “Nenahaiya kano mainane huno hu-na-tege'na ma mopafina emainoema.” hu'na nehuana na'a higetama “Nagaya Anumaya Kotina ne'amo'nae.” hu'nama hua kehena “Anumaya Kotina hu-haviya hu-ne'atane.” hutama hu-nena-tae?

³⁷⁻³⁸ “Nagaya Nenafa ali'yama o'alule'asina nagaifena havitama tamakupi maletama tamametiti ohale'asinagi kanale kava hale'asine. Nagaya kema hu-mainoa kehema havitama tamakupima omalenutamahena ali'yama ali-mainoa ali'yafena havitama tamakupi maletama tamametiti hiho. Na'a hisayana Nenafa'a nagai'ene maige'na nagaya ani'a hu'na agai'ene maino'ema hu'na hua kea havilama hutama havigahae.” huno nehie.

³⁹ Hige'ya nago'ene atafa hu'ya nofi hu-tegahe hayanagi amakaseno ago umaine.

⁴⁰ Uteno Yisasi'a eteno Yotani lina mo lakaeno Yoni'ma lima fale-ma-tenea kumate mo maine.

⁴¹ Mo mainege'ya muki'a vea'mo'ya melitalu hu'ya maine'ya mage hae “Yoni'a ke'lama alino lokiya vaisia yana nagola malegeta o'agenonagi ma kanomofena muki'a kema hu-mainea kemo'a tamage-lafa hu-maine.” hu'ya hae.

⁴² Muki'a ani kumate vea'mo'ya Yisasifena havi'ya amakupi male'ya amametiti hu-mainae.

11

Lasalusi'a ago fali-maine.

¹ Nago kanomo agia Lasalusi'e kali ali-maine. Ani kanoa Petani kumate kanoe. Mata'ene agana'amo'a Maliagani kumale.

² Ani Malia'a nago yupa mana'age masavena Yisasina aiyale takino fale-teneno ayolagefaleti ali hau hu-teneane. Ani muna'mona asa'amo'a Lasalusi kali ali-maine.

³ Kali alino mainege'ana ani tole nanukana-latamogania Yisasitega nago kano hu-ta'ageno mage mo hie “Alatimogae kagaikama kahau kayamopafima negahaiya kanoa kali ne'alie.” huno hapaiye.

⁴ Hapaigeno Yisasi'a ani kema nehavino'a mage hie “Lasalusi'a kali alino fae-maineanagi falisia yafe o'alinegi mani kalimo'a Anumaya Koti agi alisaga hisayafene huno ali-maine. Ani kalia Anumaya Koti nafa'nemo agi alisaga hisaya yafe falote hu-maine.” huno hie.

⁵ Yisasi'a Mata'ene agana'amo'ene Lasalusi'ene ani anagafena tusiya huno hau ayamopafi nehaiya anagale.

⁶⁻⁷ Yisasi'a Lasalusi'ma kalima alia kea havianagi o'uno tole yupa afa'a nemaiya kumate maiteno agai'aenema tokae'ya nemaiya anaga'ahe mage huno hama-paiye “Yutia kotega eteta visune.” huno hu-maine.

⁸ Hige'ya agai'aenema tokae'ya nemaiya anaga'mo'ya mage hae “Hu-lave-nelina kanomoga menia Yuta vaya'mo'ya yafateti ali'ya

kahaegahema haya kotega kagaya ani kotega nago'ene ugahe nehano?" hu'ya havinegae.

⁹⁻¹⁰ Havigageno Yisasi'a mopafi mainea kana'amo'a ha'no ohunea yafe kenona'amia avame kea mage huno hie "Tuelufu'a (12) auva nagoke yagefina omaleneffi? Veamo'yama yagefima vai-yesayana ma mopafi yagemo'a ai vasa humainea yafe asaga hu otavigahayanagi veamo'ya kege'ma vaiyatete hisayana aye-vasa hu yama'a amakupina omaleanagino vailino hamaegahie."

¹¹ Yisasi'a mani kea huteno nago kea mage huno hu-maine "Tagaila kanapatia Lasalusi'a faeno maineanagi'na nagaya visua'amo'na mogafa hu'na avale he-ti-tegahue." huno hama-paiye.

¹² Hige'ya agai'aenema tokae'ya nemaiya anaga'mo'ya mage hae "Alatimogae agayama kalima alino fae-mainesiana afa'a kanale hutegahie." hu'ya hu-mainae.

¹³ Hageno Yisasi'a mani avame kema hiana Lasalusi'a ago fali-maine huno nehianagi agai'aenema tokae'ya nemaiya anaga'mo'ya ohavinaya yafe "Afa'a faeno mainegenonehie." hu'ya hu-mainae.

¹⁴ Hageno Yisasi'a ani avame kea ne'ataleno hu-falote huno hama-paiye "Lasalusi'a ago fali-maine.

¹⁵ Tamakaya nagaifena havilama hutama 'Tamage nehie.' hutama tamakupi maletama tamametiti hisaya yafe omainogeno fali-

maineanagi'na nagaya muse nehugi menia aligeta mogamano.” huno hie.

¹⁶ Higeno Tomasina, nago agia Titimasi'e, tagai kefina kuyave nafa'ne, Yisasienema tokae'ya ne-maiya anagafe mage hie “Muki'amogata vigetao. Nagopi ne'visunage'ya tahaesageta faligahune.” huno hie.

Yisasi'a “Nagaya fali-mainesafiti ali he-ti-matesua kanogi hamaimu ali'ya maige maige hisaya ya amamisua kanoene mainoe.” huno hu-maine.

¹⁷ Lasalusina fo'a (4) yupa komufi he-vai-tenageno Yisasi'a uva'yi hige'ya he-vai-tenaya kanahe hapaimainae.

¹⁸⁻¹⁹ Petaniti Yelusalemua tagufa (3) kilomita aupate hanea yafe muki'a Yuta vea'mo'ya Yelusalemutila etele hu'ya Matagani Maliaganina anasa'animo'ma fali-mainea yafe hamau hunate'ya emainae.

²⁰ Emainageno Mata'a Yisasife “Ne'le.” hu'ya haya kea haviteno katega via'yamo mo fotu humainegi Malia'a noma'afi maine.

²¹ Mainegenon Mata'a Yisasife mage hie “Alanimoga kagayama male'ma mainate'asina nasa'nimo'a ofalile'asine.

²² Ago havimainoe menia kagayama Anumaya Kotitega nago yafema havigesanana afa'a kamigahie.” huno hie.

²³ Higeno Yisasi'a mage huno hapaiye “Kasakamo'a fali-maineanagi eteno haimula alino he-tigahie.” huno hie.

24 Higeno ani muna'mo'a mage hie “E, nagaya ago havimainoe ma mopama ha'noma hisia kanafina muki'a fali-mainaya vea'ma he-tisaya kanafina eteno he-tino haimula aligahie.” huno hie.

25 Higeno Yisasi'a kenona'a mage hie “Nagaya fali-mainaya veala amavale he-ti'na hamaimula amamisua kano mainoe. Nagaya maige maige hisaya hamaimu amami yamona aepa'a mainoe. Nago'a vea'mo'ya nagaife havi'ya amakupi male'ya amametiti hisayana falite'ya heti'ya agola maige maige hisaya hamaimula aligahae.

26 Nago'a vea'mo'ya afa'a maine'ya nagaifena havi'ya amakupi male'ya amametiti hu-mainaya veala maige maige hugahayanagi'ya ofaligahae. Kagaya mani kea ago havilama huka kagupi maleka kametiti nehapi nohane?” huno havige.

27 Havigeveno ani muna'mo'a mage hie “E, Alanimoga nagaya nehavi'na ago nagupi male'na nametiti hu-mainoe. Tamage nehae kagaya Kalaisigae* Anumaya Koti'a hu-ga-tegeka taugafa ali-gatigahe ma mopafi elavisana kano emainane. Anumaya Koti nafa'ne mainane.” huno hie.

Yisasi'a Lasalusife hau hu-teteno avite-maine.

28 Mata'a mani kea huteno eteno via'yamo agana'amona Maliana sumi sumi huno mage huno hapaiye “Hu-mave-nelia kanoa ago emaineno kagaife ke nehie.” huno hapaiye.

29 Hapaigeno Malia'a ani kea haviteno aupaa he-tino Yisasi mogegahe umaine.

30 Ne'vigeno Yisasi'a kumatela omenegi Mata'ene fotuma hu'ana kea keama ha'alega maine.

31 Mainege'ya Yuta vea'mo'ya Malia'ene nopi maine'ya hanauma hu-nate'yama emainaya vea'mo'ya Malia'a aupaa he-tino kumatega via yafe agayana hige'ya "Vae Malia'a asa'amo komulega avitegahe ne'vie." hu'ya akave umainae.

32 Akave vageno Malia'a Yisasi mainelega mogeteno aiyafi mope hu-maineno mage hie "Alanimogae kagayama male'ma mainate'asina nasa'nimo'a ofalile'asine." huno hapaiye.

33 Hapaiteno avi ne'ategeno agai'enema emainaya Yuta vea'mo'ya ani'a hu'ya ne'atageno Yisasi'a Maliana ne'agegeno aipamo'a tusiya huno haviya hu-maine.

34 Aipamo'a haviya hu-mainefiti hama-vigeno mage hie "Hanate he-vai-tenae?" huno hige'ya "Alatimoga eka mego." hu'ya hae.

35 Nehageno Yisasi'a avi-te-maine.

36 Ne'atege'ya Yuta vea'mo'ya mage hae "Ageho Lasalusifena tusiya huno hau ayamopafi nehaiye." hu'ya hae.

37 Hage'ya nago'a vea'mo'ya mage hae "Ma kanoa amaulagama asu hu-mainea vea'ma aligali hu-ne'amatea kanogi na'a higeno Lasalusina kali'a alino kanale hu-tegeno ofalino afa'a maiyanagi fali-maine." hu'ya hae.

Lasalusina fali-mainefiti Yisasi'a alino he-ti-tene.

³⁸ Yisasina aipamo¹a nago¹ene haviya higeno he-vai-tenaya komulega umaine. Ani komua yafa kapi he-vai-tete¹ya komumo avayalela ala yafateti ali¹ya ai-lile-malena.

³⁹ Ai-lile-malenageno Yisasi¹a mogeteno mage hie “Mani komumo avayaleti yafana ali-taleho.” huno higeno fali-mainea kanomo asa¹amo¹a, Mata¹a, mage huno hie “Alani¹amogae mani kanoa ago he-vai-tageno fo¹a (4) yupa komu-finaga haneanagino tusi¹a hi¹mana hugahie.” huno hie.

⁴⁰ Higeno Yisasi¹a mage hie “Nagaya ago kaha-pai-mainofi? ‘Kagayama nagaifema tamage nehane huka kagupi maleka kametitima hisanana Anumaya Koti agi alisaga hisaya tokiya yana age-gane hu¹na kaha-pai-mainofi?’ huno havinege.”

⁴¹ Ani yafana ali-taletageno Yisasi¹a anafinaga agesaga huno age-maineno mage hie “Nenafaga nunamuni¹a ago havimainana yafe museka¹a nehue.

⁴² Havimainanagi¹na nagaya muki¹a kanalema kahavi-go¹a kea nehavinagi afa¹a menia manile¹ma mainaya vea¹mo¹ya kagayama hunatanage¹na emainoa yafema “Tamage nehane.” hu¹ya amakupi male¹ya ametiti hisaya yafe kahavi-negoe.” huno hie.

⁴³ Mani kea huteno ala kegefafiti mage hie “Lasalusiga he-tika elavio.” huno hie.

⁴⁴ Higeno Lasalusi¹a, fali-mainea kanoa, eteno he-tino elavige¹ya aiyafima ayapima augosafima

kenaleti¹ma aye-gasagi-malea kanoa elavigeno Yisasi¹a mage huno hama-paiye “Kalu hetama atalegeno vino.” huno hama-paiye.

Kava vaya¹mo¹ya Yisasina haesaya ke hu¹ya ha¹ya ki-mainae.

⁴⁵ Muki¹a Malia¹enema emainaya Yuta vea¹mo¹ya Yisasi¹ma hia kavala agete¹ya amakupi male¹ya amametiti hu-mainae.

⁴⁶ Amaku¹a amianagi nago¹a vaya¹mo¹ya atale¹ya Falasia vaya mainalega u¹ya Yisasi¹ma hia kavafena mo hama-pai-mainae.

⁴⁷ Hama-paige¹ya Falasia vaya¹ene ala mono note kava vaya¹ene Kanisole vayafe ke hage¹ya age¹ya mage hu¹ya hae “Ma kanoa kasago¹ya tokiya avame ya¹yaga nehigi na¹a hisune?

⁴⁸ Afa¹ama atalesunageno¹a muki¹a kanalela ani¹age¹yama hisige¹ya muki¹a vea¹mo¹ya ‘Tamage nehie.’ nehu¹ya havi¹ya amakupi male¹ya amametiti hisage¹ya kava vayatia, Lomu vaya¹mo¹ya e¹ya muki¹a vea¹nene ala mono notiene ali haviya hugahae.” hu¹ya hae.

⁴⁹ Hageno Kaiyafasi¹a ani kafufina ala mono note hagote kava kano maineanagino ani vayapiti he-tino mage hie “Tamakaya tamaku tamakesa nomale.

⁵⁰ Tamakaya ohavinafi na ya kanale tamaya hisia yana hane? Muki¹a veati ali haviya hisafi nago¹ke kanomo¹a muki¹a vea¹amogami anona¹a falisie?” huno hama-vige.

⁵¹ Ani kafufina Kaiyafasi¹a ala mono note hagote kava kanogino mani kea Anumaya Koti¹a

hapaigeno aune laga huno hu-maine. Agai¹a agesafiti ohune. Ani aunema laga hia aepa¹amo¹a mage hu-maine “Yisasi¹a Yuta vea¹mogamife huno faligahie.

⁵² Amakai¹amigetefena huno ofaligahigi alu kumate kumate mainaya Anumaya Koti nafa¹neyaga amavaleno nagoke anaga hu-ma-tesige¹ya maisaya yafe Yisasi¹a faligahie.”

⁵³ Ani kanaleti aepa he¹ya Yuta vaya¹mogami kava vaya¹mo¹ya Yisasina haesaya kea hu¹ya havite¹ya huge havige hu-mainae.

⁵⁴ Ani yafe Yisasi¹a nago¹ene Yuta vea¹mogami amaulagafina vai o¹ayenegi nago kumala Efalaimie hu¹ya nehaya kumala vaya omai kola aupa hu-mainege¹ya agai¹aenema tokae¹ya nemaiya anaga¹ene anilega u¹ya mo mainae.

⁵⁵ Yuta vea¹mo¹ya kafu¹ahe kafu¹ahena Anumaya Koti¹ma amakinagomogami amaugafama ali-gati-mainea yafe havi¹ya alitalu hu¹ya imu negiyane. Ani imuma kisaya kanamo¹a aupa hige¹ya muki¹a vea¹mo¹ya muki¹a kumateti hai¹ya kahegi kemo hama-paiya kava hu¹ya amaugafaene amaku¹aene sese hugahe Yelusalemu umainae. Ago mo sese hute¹ya ani imu¹amia nena.

⁵⁶ Ala mono nopi molitalu hu¹ya maine¹ya Yisasife moge mege hu¹ya ati-yegetayana hige¹ya amakai¹amifi mo hama-vige me hamavige hu¹ya mage hae “Na¹ane tamakesa nehaviye? Kave¹ma nesutela egahifi omegahie?” hu¹ya hae.

⁵⁷ Hage¹ya ala mono note kava vaya¹ene Fala-sia vaya¹ene Yisasina atafa hugahe mage hu-mainae “Ma¹a hiho. Yisasi¹ma faesia kuma¹ma agenutamahena aupa¹a ani kea alitama me laha-paiho.” hu¹ya hu-mainae.

12

Yisasina aiyale mana¹age masave fale-tene.

¹ Yisasi¹a Petani kumate, Lasalusi¹a falige¹ya he-vai-tenageno Yisasi¹a molino he-ti-tenea kanomo kumate, uva¹yi hu-mainae. Uva¹yi hiana ani kanafina Anumaya Koti¹ma amakinagomogami amaugafama ali-gati-mainea yafe amakesa havi¹ya imuma kisaya kana sikisi¹a (6) yupa maite¹ya kigahe nehae.

² Hageno Yisasina musekase kave talo tala hu-teteno Mata¹a alino amamite amamite nehigeno Lasalusi¹a Yisasi¹ene siale mainae.

³ Mainageno Malia¹a nago kilo* mana¹age masave hanea ke¹ayola, tusi¹a mone hanea masavemo agia natie nehaya masavena alino Yisasina aiyale taki ha¹no hu-teteno ayolagefaleti ali hau hu-ne¹a-tegeno ani masavemo manamo¹a ani nopi haino hiya hige¹ya mana¹a havimainae.

⁴⁻⁵ Nago kanoa, Yisasi¹enema tokae¹ya ne-maiya anagapiti kanomo, agia Yutasi Isakali-oti¹e. Ani kanomo¹a haenaga¹a Yisasina agesi huno kame ya hu-tesia kanomo¹a mage hie “Na¹a higeno mani mana¹age masavena afa¹a ne¹atale? Atalegeno nago kanomo¹ma miya hile¹asipa tali hataleti (K300) kina aliteta mani masaveteti

monea afeno'amima omalenea vea'ne amamute'asine.” huno hie.

⁶ Mani kea mone'amima omalenea veafena hauma hu-ne'a-matea yafena nohigi muki'a kanalela monema hanea kutela agai'a yagai-maineno musufa yama nehia yafe mani kea humaine.

⁷ Yisasi'a mage hie “Ma munala afa'a atalegeno ma masavena afa'a ali-lineno nagayama falisuge'ya he-vai-natesaya kanalela mani masaveteti fale-na-tegahie.

⁸ Mone'amima omalenea vea'mo'ya muki'a yupa tamakai'ene maigahayanagi nagaya tamaikai'enena muki'a yupa omaigahue.” huno hie.

Mono note kava vaya'mo'ya Lasalusina haesaya ke hu'ya ha'ya ki-mainae.

⁹ Muki'a Yuta vea'mo'ya “Yisasi'a Petani kumate'ma emaine.” hu'ya haya kea havite'ya ani kumate umainae. Yisasina agai'age agegahe o'unagi Lasalusi'a fali-mainefiti ali he-ti-tenea kanoene anakegahe umainae.

¹⁰⁻¹¹ Lasalusi'a fali-mainefiti he-ti-mainea yafe muki'a Yuta vea'mo'ya nayoma nehaya monola ne'atale'ya Yisasina amaku'a amitafa hu'ya amametitima haya yafe ala mono note kava vaya'mo'ya Lasalusi'ene haesaya kea humainae.

Yisasi'a Yelusalemua ala sauve kana huno hai fale-mainae.

¹² Faete'ya kotige'ya muki'a vea'mo'ya Anumaya Koti'ma amakinagomogami

amaugafama ali-gati-mainea yafe imuma ki-malenale emaine'ya “Yisasi'ma Yelusalemu kumate egahie.” hu'ya haya kea havi-mainae.

¹³ Havite'ya Yisasi'ene katega mo fotu hugahe tofe yosamona haisa'a kofa-nafa hu'ya ali'ya umaine'ya ala kefiti mage hu'ya hae “Tusi'a yate taugafa ali-gatisana kanoa kanale'ya huka ne'ane. Anumayamo ali'ya alisana yafe huga-tegeka emainana kanomoga Anumaya Koti'a kanale manu kamiteno kaya hu-maine. Isaleli kotega yagai-ma-tenana sauve kanomoga Anumaya Koti'a kaya hu-maine.” hu'ya hae.

¹⁴ Yisasi'a nago hosi kana afumo agia tokie nehaya afua age falote huteno agupifi haino maine. Ani'ama hia kavala nayona Anumaya Koti kefina mage hu'ya kae-malenayane.

¹⁵ “Yelusalemu vea'mogatama kolia ohutama ageho. Menia tamakaila sauve kano-tamia yaufa tokimo agupifi haino maiteno egahie.” huno kae-maleneane.

¹⁶ Yisasi'ma ani'ama hu-mainea yupa agai'enema tokae'ya nemaiya anaga'mo'ya anima kae-malenea kea ohavianagi haenaga'age Yisasi'ma faliteno he-tino tokiya hale yama'ama hanea kumate haitege'ya amakesamo'a ai-kalo hige'ya anima kae-malenea kene vea'mo'ya ani yupama hu-tenaya kavafe'ene havi-mainae.

¹⁷ Yisasi'a Lasalusifema “Komufitila he-tio.” huno higeno fali-mainefiti'ma he-ti-mainea yupa anile'ma mainaya vea'mo'ya ani kanafina “Yisasi'a na'a ma'a kavala hu-maine.” hu'ya kea

ali'ya ute ete hu'ya hama-pai-mainae.

¹⁸ Hama-paige'ya havite'ya anima tokiya avame yama hu-mainea kema haviya yafe muki'a vea'mo'ya katega Yisasi'ene mo fotu hu-mainae.

¹⁹ Hage'ya Falasia vaya'mo'ya amakai'ami amu'no'amifina ani kekena mohu mehu hu'ya mage hu-mainae "Ageho muki'a mopafi vea'mo'ya Yisasina akave ne'vayanagita atafa ohugahune." hu'ya hu-mainae.

Nago'a Kaliki vea'mo'ya Yisasi agegahe nehae.

²⁰ Nago'a Kaliki vea'mo'ya, Anumaya Koti agi alisaga hugahe, ani imu kave'ma nalega Yelusalemu hai-mainae.

²¹ Ani Kaliki vea'mo'ya Filipite umainae. Filipi'a Kalili hanea kumala Petesaita kumateti kano mainelega u'ya mage hae "Museka'a nehu-nagi tagaya Yisasina agegahe ne'one." hu'ya hu-mainae.

²² Hageno Filipi'a via'yamo Etaluna hapaita'ana ani lolemogani Yisasina mo hapai-maina'e.

²³ Hapai'ageno Yisasi'a mage huno hana-paiye "Menia Ikapinagati emainoa kanoa vaya'mo natenea kanonomia tusiya hu'ya nagai nagia alisaga hisaya kanamo'a ago eva'yi hu-mainae.

²⁴ Tamage hu'na tanahane-pauve nagoke viti avinamo'ma asaga hu-lavino mopafima ofalinunofena nagoke viti avina'age hanegahigi nagi falinunofena ai-falo huno hageteno kasago'ya viti alagayaga aye helafigahie.

25 Na'a hugahianagi nago'a vea'mo'yama muki'a ma mopafi yafema amaugafama ali'ya haite'ya hamaimu'amima atafa hisaya vea'mo'ya faligahae. Faligahayanagi nago'a vea'mo'yama ma mopale mainaya amaugafama ali'ya haisaya yafema 'Afa yanema.' hu'ya hisaya vea'mogami hamaimu'mo'a ha'no ohugahianagi'ya maige maige hu'ya maigahae.

26 Nago'a vea'mo'yama nagai'fema hu'ya ali'ya alisayana nakave ege ege hisae. Nakave'ma esaya vea'mo'ya maisua yate nagai'ene mainesageno Nenafa'a nagai ali'yama ne'aliya vea'mogamina ala amaki amamigahie.”

Yisasi'a yafaga yosale falisia yafe hama-pai-mainie.

27 Yisasi'a mage huno nehie “Nagai nagu'amo'a tusiya huno kana'age nehige'na kasago'ya nagesa nehavugi na'ane hu'na hisue? 'Nenafaga menia nagai naugafale'ma falote'ma hugahema nehia yana ali-talo.' hisufi? A'ao nagaya ani nagata aisia yapi maigahe emainoe.

28 Nenafaga kagaika kagi alisaga huo.” huno nehigeno anile ikapinagati age aino mage huno hie “Nagia ago alis-aga hu-mainoane ete'na nago'ene nagia ali-saga hugahue.” huno hie.

29 Hige'ya melitalu hu-mainaya vea'mo'ya agema aiya kea havite'ya nago'amo'ya mage hu'ya hae “Ikapinagati akali kalu nehie.” hu'ya hage'ya nago'a vea'mo'ya mage hu'ya hae “Nago ensole kanomo'a ke me hanepaiye.” hu'ya hae.

³⁰ Hageno Yisasi'a mage huno hie “Ani agema aiya agea nagai naya hisia yafe nohigi mani kea tamakai tamaya hisia yafe nehie.

³¹ Menia ma kanafina Anumaya Koti'a ma mopale vea'mogamina kaiyeke hu-ma-tegahie. Meni kanafima ma mopale'ma kava yagai-mainea kanoa, Satanina* ago anati-talegahie.

³² Anati-talegahigi ma mopaleti navalesaga hu'ya* nahaesage'ya muki'a vea'mo'ya amaku'a namisaya yafe amavayu hu'na nagai'nilega amategahue.” huno hie.

³³ Ani avame kema huno hia kemo'a mage humaine “Ma yateti, yafaga yosale nahaesage'na faligahue.” huno hama-pai-mainie.

³⁴ Hama-paige'ya vea'mo'ya kenona'a mage hu'ya hapai-mainae “Tagai mono'mo'a mage huno taha-pai-mainie ‘Anumaya Koti'ma tau-gafa ali-gatigahema hu-tesia kanoa muki'a kanafina maige maige hugahie.’ huno taha-pai-mainieanagi na'a higeka ‘Ikapinagati emainoa kanoa vaya'mo natenea kanomonie yafaga yosale navalesaga hugahae.’ huka nehane? Anima ikapinagati emainea kanoa vaya'mo atenea nafa'nea ta mainie?” hu'ya havigae.

³⁵ Havigageno Yisasi'a kenona'amia mage huno hie “Hale yama'aene kanomo'a tamakaipina osi kana kano'a mainie. Hani kisia yana va'yi huno aiso hu-lama-tesia yafe hale yama hanea kanale vaiyatete hiho. Hani-ki-mainiea yapima mainaya vea'mo'ya visaya kana o'agenae.

36 Hale yama'ama hanea kanafina hale yama'aene kanohe 'Tamage nehane.' hutama havitama tamakupi maletama tamametiti hiho. Ani'ama hisayana hale yamo nafa'neyaga maigahae." huno hama-pai-mainene.

Kasago'ya Yuta vea'mo'ya Yisasifena havi'ya amakupina male'ya amametiti nohae.

Yisasi'a mani kea huteno ne'amataleno mo fala-ki-mainene.

37 Muki'a tokiya avame'yamo amaulagafi alianagi agaifena havi'ya amakupina male'ya amametitia nohae.

38 Ani yafe Anumaya Kotina aune kano'a, Aisaiya'a, hu-mainene kea falote huno tamage nehie. Mage huno hu-mainene

"Anumayamoga manima hu-mainona kea ta'ya havi'ya amaku'afina male'ya amametitia nehae? Anumayamo'a tokiya avame yama'a amave-lige'ya hana vea'mo'ya havilama nehae?" huno kae-maleneane.

39 Higeno amuha ohunayanagi'ya Yisasifena havi'ya amakupina male'ya amametitia ohunaya yafe Aisaiya'a nago'ene mage huno humaineane

40 "Amaulaga o'agesaya yafe Anumaya Koti'a amaulaga ago alino asu hu-ma-tene. Amaku amakesa havilama ohisaya yafe 'Yafa kana amanu'ene vea'ne maiho.' hu-ma-tene. Havigu amaku'a ai-yahae hu'ya nagaitega eyafenagi'na ali hilato hu o'ama-tegahue." huno hu-mainene.

41 Aisaiya'a Yisasina tokiya hale yama'a ageteno Yisasife mani kea hu-mainene.

42 Hu-maineanagi Yuta kava vaya'yagafitila kasago'ya vaya'mo'ya Yisasife havi'ya amakupi male'ya amametitia hayanagi Falasia vaya'mo'ya mage hae “Mani kava'ma hisayana mono nopina omegahae huta nagalu hu-lama-tegahune.” hu'ya hu-mainaya yafe “Yisasina tagu'a ne'amune.” hu'ya hu-falote ohunae.

43 Ani veamo'ya Anumaya Koti'a “Kanale kava nehae.” huno amakima alisaga hisia yafena no-hamaigi vea'mo'ya “Kanale kava nehae.” hu'ya amaki alisaga hisaya yafeke nehamaiye.

Yisasi'a kema nehia kemo'a veala fako hu-ma-tegahie.

44 Yisasi'a tokiya'age ke hu-haleno mage hu-mainie “Nago'a vea'mogatama nagaifema tamage nehie hutama tamakupi maletama tamametitima hisayana nagai'nigefena tamakupina maletama tamametitia hu-nona-tagu hu-na-tenea kanomofe'ene hu-ne'a-tae.

45 Nago'a vea'mo'yama nagai'ma nenagayana Nenafa'a hu-na-tenea kanoene age-mainae.

46 Nagayama ma mopale'ma emainoana hale ya kana hu'na emainoe. Nagoke nagoke vea'mo'ya nagai'fe'ma havi'ya amakupima male'ya amametitima hisayana haniki-mainie yapina omaigahae.

47 Nago'a vea'mogatama nagai kema havitetama nakave'ma omalesayana nagaya tamakaila kaiyekea hu otama-tegahue. Ma mopale vea'mogamina kaiyekea hu-ma-tegahue

hu'na omenogi ma mopale vea'mogamina
amaugafa ali-gatigahue hu'na emainoe.

⁴⁸ Nago'a vea'mo'ya nagaife'ma
amakave'noma hu'ya nagai kema amakupima
ali'ya omalesayana hu-mainoa ke'nimo'a fako
hu-ma-tegahie. Ma mopama ha'no hisia kanama
eva'yima hisiana hu-mainoa ke'nimo'a fako
hu-ma-tegahie.

⁴⁹ Mani kea nagesafitila ali falote hu'na
tamaha-nopaugi hu-na-tenea Nenafa 'Nage mage
huka huo.' huno naha-paiya ke'age tamaha-
nepauve.

⁵⁰ Nagaya ago havilinoe agai kema havitama
tamakupima maletama tamametitima hisayana
ofalitama agola maige maige hisaya tamahaim-
ula aligahae. Nani yafe Nenafa'a naha-pai-
mainea kea tamaha-nepauve." huno nehie.

13

Yisasi'a amaiya sese hu-ma-tene.

¹ Anumaya Koti'ma amakinagomogami amau-
gafama ali-gati-mainea yafe ala imu kigahe ne-
hae.* Ani imu kisaya kana'amimo'a aupa hugahe
nehigeno Yisasi'a ma agesa havimaine "Ma
mopa atale'na Nenafatega visua kanamo'a ago
eva'yi nehie." huno nehuno muki'a kanale'ma
ma mopale maine'yama agai kema nehaviya
vea'mogamifena tusiya huno hau ayamopafi ne-
haino agola haume haume haino mo fali-mainie.

² Yisasi'enema tokae'ya nemaiya tuelufu'a (12) anaga'aene unena kavela nenageno Satani'a Yutasifena “Havisigi huka agesi huka hama-paisanage'ya Yisasina haesae.” huno agu agesa amine. Ani Yutasi'a nago agi'a Isakalioti'a Saimonina nemofole.

³ Satani'a ani'ama hisia agu agesa amigeno Yisasi'a ma agesa havimaine “Nenafa'a muki'a tokiya ago nayapi maleneanagi'na Anumaya Koti'a hu-na-tege'na emainoafe ete'na Anumaya Kotitega haigahue.” huno hu-maine.

⁴ Nehuno kave'ma neneletila ne'ataleno hetino aya'aya kena'a hateno nemaleno taulia alino amupii ai-gagino fai-line.

⁵ Fai-lineno tina alino yopafi taki-maleneno aepa heno agai'a tuelufu'a (12) anaga'amogami amaiya agupia sese hu ne'ama-teno ai-gagi-linea taulileti alino hau hu-ne'amate.

⁶ Ali hau hu-ma-teme Saimoni Pitate vigeno Saimoni Pita'a Yisasife mage hie “Alani'amoga naigai naiya sese hu-na-tegahe nehano? Sese hu ona-tegane.” huno hu-maine.

⁷ Higeno Yisasi'a mage hie “Kagaya nagayama nehua kavala menia ohavinanagi haenaga'a havilama huka havigane.” huno hapaiye.

⁸ Ha-paigeno Pita'a Yisasifena mage hie “Kagaya naiya sese ohutafa huka sese ohugane.” huno higeno Yisasi'a kenona'a mage hie “Kaiyama sese'ma ohisuana nagai'enena omaitafa huka omaigane.” huno hapaiye.

⁹ Hapaigeno Saimoni Pita'a mage hie “Alani'amoga na'ama hinageka naiya'agela sese

hu ona-teka naya'ene nanu'ene sese hu-nato.”
huno hapaiye.

¹⁰ Ha-paigeno Yisasi'a kenona'a mage huno hapaiye “Nago'a vea'mo'ya muki'a amaugafama sese hu-malenaya veala amaugafalela oni'ya'amia omaleno haigafa'age hamau-maineanagi'ya amaiya'age sese hugahae. Tamakaila kefo yama haya oni'yatamia omaleno haigafananama'age hu-mainagi nagoke kanomona oni'ya'age hau-mainae.” huno hama-paiye.

¹¹ Hama-paiteno Yisasi'a agai'ma agesi'ma huno haegahema hia kanoa ago age-mainea yafe “Tamakaya muki'amogatamina oni'yatamia omalene hu'na nohue.” huno nehie.

¹² Amaiya sese hu-ma-teteno kena'a alino vai-lino mopale maineno mage huno hama-vige “Nagayama hu-lama-toa kavala ago havilama nehafio?

¹³ Tamakaya nagaifema ‘Hulave-nelina kanomogae.’ nehutama ‘Alatimogae.’ hutamama nehayana tamage hutama nehae. Nagaya ani kanoema hutama haya kano mainoe.

¹⁴ Nagaya Alatamimo'na hu-lama-ve-neloa kanotamimo'na tamaiya sese hu-nelama-toe. Tamakaya ani'a hutama nelamafugami amaiya sese hu-ma-teho.

¹⁵ Nagaya hisaya kavala ago tamave-neluafe tamakaya nagayama hu-lama-toa kavala ani'a hu-ma-teho.

¹⁶ Nagaya tamagelafa hu'na tamaha-nepauve ali'ya kano'amo'a kava kano'amona agaseno

omainegi kayo kayo kano'amo'a hu-tenea kanomona agaseno omaine.

¹⁷ Tamakaya mani kema havilamama hute-tama mani kava'ma hisayana kanale'ya hutama maigahae.

¹⁸ Nagaya 'Kanale'ya hutama maigahaema.' hu'nama hua kea muki'amogatamifena nohugi nagayama nahaige'na huyo-gi-malenoa-ma'amogamife nehavi'na mani kea nehue. Anumaya Koti kema nayoma kae-malenaya kemo'a mage hu-maineane

'Nagai'enema maineno kave'ma nenea kanomo'a aiya alisaga huno nagaila aye-nalata-pegahie.' huno kae-maleneane.

Kae-maleneanagi meni kanafina mani kemo'a efalote huno tamage hugahe nehie.

¹⁹ Haenaga'a mani kemo'ma efalote hisige-tama nagafena mage hugahae 'Agaya Anumaya Koti nafa'ne maine.' hutama havitetama tamakupima maletama tamametitima hisaya yafe menia ani kana yaufa falote ohunea kanafi tamaha-nepauve.

²⁰ Tamage-lafa hu'na tamaha-nepauve nago'a vea'mo'ya nagayama hu-ma-tesua vea'ma amavale'ya falu falama hu-ma-tesayana nagaila ani'a hu'ya navale'ya falu fala hu-nena-tae. Nagai'ma navale'yama falu fala hu-natesayana hu-na-tenea kanomona ani'a hu'ya avale'ya falu fala hu-ne'atae."

Yutasi'a Yisasina avaleno kame vava amayapi ategahie.

21 Yisasi'a mani kea hama-paitegeno aipamo'a kana'age higeno agu agesama havia agesamo'a hivi huno talavate o'ategeno mani kea hufalote nehie "Lamage hu'na tamaha-nepauve tamakaipitila nago kanomoga vaya'mo havisigi huka nagesi huka kame ya hu-na-tegane." huno hie.

22 Hige'ya agai'a tuelufu'a (12) anaga'amo'ya o'auafi a'auafi hugetayana hige'ya "Tafepiga nehie?" hu'ya mani kanomofena ohavinae.

23 Ohavige'na nagaya Yoni'na agai'aenema tokae'ya nemaiya anagapi nemauvanagino hau ayamopafi nagaifena hau-mainea kanogi'na avate tokaeta'a maino'e.

24 Mainogeno Saimoni Pita'a anuteti avame'name huno "Havigo." huno naha-paino "Tafe nehane huka havigo." huno nehie.

25 Hige'na nagaya Yisasina ava'ale mime u'na maine'na mage hu'na havigoe "Alani'amogae tafe nehane?" hu'na havigoe.

26 Havigogeno Yisasi'a mage huno hie "Nagayama kave'ma ali'nama supufi ayete'nama ali'na amisua kanoa nagesi'ma hisia kano maine." huno nehuno ani kavela alino supufi ayeteno Yutasi'a, Saimoni Isakaliotina nemofu amine.

27 Ani kavela amigeno alitegeno Satani'a agu'afinaga mo hai-faleno mainegeno Yisasi'a mage huno hapaiye "Kagaya aupu'a hisuema hisana kavala ago huo." huno hie.

28 Hige'ya anile'ma mopale mainaya vaya'mo'ya Yisasi'a Yutasife hianagi ani kemona

aepa¹a nohaviye.

²⁹ Ohavinagi Yutasi¹a mone pokisi¹amile yagaino nemaiya kanogilya nago¹a vaya¹mo¹ya mage hu¹ya amakesa nehaviye “Yisasi¹a agaifena ‘Ala imule mo nesuna yana molika eno.’ huno nehifi ifi ‘Mone¹amima omalenea vaya nago¹a mone molika amamio.’ huno nehifi?” hu¹ya amakesa havimainae.

³⁰ Havigeno Yutasi¹a ani kavela aliteno aupa¹a kumatega hati-laviana tusi¹a hani ki-mainea yapi umaine.

Yisasi¹a yaufa kahegi ke hama-pai-mainae.

³¹ Yutasi¹a ago utegeno Yisasi¹a mage huno hie “Menia ikapinagati emainoa kanoa vaya¹mo natenea kanomoni nagia ali-saga hugahae. Nagai¹ma nahaesage¹na falisugeno¹a Anumaya Koti¹a ala agi aligahie.

³² Nagaya falisua yafe Anumaya Koti agima ali-saga hisayana Anumaya Koti¹a navalesige¹na agai¹ene maigahue. Aupa¹a navaleno tokiya hale yapi ala nagi namigahie.

³³ Nafa¹neyaga¹nia tamakai¹enena nagaya osi kana kano¹a maite¹na visugetama nagaifena natiyegahayanagi amuha ohunayanagitama visua kumatela o¹ugahae. Mani kea Yuta vea¹mogami hama-pai-mainoanagi¹na menia tamakaila tamaha-nepauve.

³⁴ Menia nagola ohavinaya kahegi kea tamaha-paigahugi haviho. Nelama-fugamifena tamahau tamayamopafi tamahaino. Amakaya ani¹a hu¹ya tamakaifena hamaisie. Nagayama tamakaifema

nahau nayamopafima nahaiya kava hutama nelama-fugamifena tamahau tamayamopafi tamahaino. Amakaya ani'a hu'ya tamakaifena hamaisie.

³⁵ Nagi tamakaya muki'a nelama-fugamifena tamahau tamayamopafima lamahaisiana muki vea'mo'ya tamakaila lamakete'ya tamakaifena mage hu'ya hugahae 'Yisasi'enema tokae'ya ne-maiya anaga mainae.' hu'ya hugahae." huno hie.

Yisasi'a Pitafena "Nagia alika fala-kigane." huno nehie.

³⁶ Saimoni Pita'a mage huno havige "Alani'amogae hanatega ugane?" huno havigegenon Yisasi'a mage huno hie "Visua kumatela menia nakavela o'uganagi haenaga'age nakavela ugane." huno hie.

³⁷ Higeno Pita'a mage huno hie "Alani'amogae nagaya na ya hinage'na menia kakavela o'ugahe hugeka nehane? Nagaya kagaifene hu'na nahaimula atalegahue." huno hie.

³⁸ Higeno Yisasi'a mage huno havige "Kagaya nagaifene hu'ka kahaimula atalegano? Tamagelafa hu'na kaha-nepauve hagoteno kokolemo'a agea o'ainesigeka kagaya tagufa (3) kanale avane huka nagi'a alika fala-kigane." huno hie.

14

Yisasi'a ika kumate visaya kana agai'age maine.

¹ Yisasi'a mage huno hu-maine "Muki'a vea'mogatama tamaipamo'a kana'age huno

tamakesa ku'mo'a ohino. Anumaya Kotife havitama tamakupi maletama tamametiti haya kava nehutama nagai'fena havitama tamakupi maletama tametiti hiho.

² Nenafa nopina veala maisaya nona kasago'ya hane. Ani yama omale'sina nagaya mani kea ohule'asine. Nagaya kumatamia moli'na talo tala hu-lama-tegahe ugahue.

³ Nagaya kumatamia mo lalo tala hu-malete'na ete'na me lamavalesugetama visua kumatela vis- ageta nagai'ene mo lokaeta maigahune.

⁴ Tamakaya nagayama visua kuma'mo kana ago age-mainae." huno hie.

⁵ Higeno Tomasi'a mage huno hie "Alatimogae tagaya visana kumala o'agenone. Hana'a huta ani kana agesune?" huno hie.

⁶ Higeno Yisasi'a mage huno hapaiye "Nagaya ikapinaga visaya kamona Nefa'nae. Nagaya kelamage kemona aepa'a mainoe. Nagaya agola maige maige yamo hamaimula aepa'a main- oafe nago'a vea'mo'ya Nenafatega visayana alu katetila o'ugahagi nagaiteke esae.

⁷ Tamakaya nagai'ma havimainale'asipa Nenafafena ani'a hutama havile'asine. Tamakaya menia aepa hetama Nenafana ago havitetama age-mainae." huno hie.

⁸ Higeno Filipi'a mage huno hapaiye "Alan- imogae negafana taveligeta agesunageno tagu tamemo'a tamu hisie." huno hie.

⁹ Higeno Yisasi'a mage huno hapaiye "Filipigae aya'aya kanale tamakai'enena maime emainoana kagaya nagaila onagenano? Nago'a

vea'mo'ya nagai'ma nage-mainayana ani'a hu'ya Nenafana age-mainae. Na'a higeka 'Negafana lave-lio huka nehane?'

¹⁰ Nagaya Nenafa agu'afina maugeno Nenafa'a ani'a huno nagai nagu'afina mainea yafena havika kagupina nomalano? Tamahapai-mainoa kea nagesafiti kea tamaha-opainoe. A'ao. Nenafa'a nagai nagupi maineno agai'a ali'yama'a ne'alie.

¹¹ Nagaya Nenafa agu'afi maugeno ani'a huno Nenafa'a nagaila nagu'afina maigeta'a hu-maino'ema hu'nama hua kea havitama tamakupina maletama tamametiti hiho. Mani kema ohavinutama tamakaya muki'a ali'yama ali-mainoa ali'yama age-mainesayana nagaifena havitama tamaku'afi ali maletama tamametiti hiho.

¹² Tamage-lafa hu'na tamaha-nepauve nago'a vea'mo'ya nagaifema havi'ya amakupi nemalaya vea'mo'ya muki'ama ali-mainoa ali'yana ani'a hu'ya aligahae. Nagaya Nenafatega visua yafe anima alisaya ali'yamo'a ali-mainoa ali'yana agase'ya aligahae.

¹³ Nafa'ne'amonife hu'ya Nenafa'a agima ali-saga hisaya yafe tamakaya nagai kema havite-tama nagai nagi ayetama muki'a yafena naha-vigesage'na ani'a hu-lama-tegahue.

¹⁴ Muki'a yafema nagai nagima ayetama naha-vigesayana afa'a ani yana hu-lama-tegahue." huno hu-maine.

Yisasi'a "Alu Aotage Avamula hu-tesugeno

egahie. ” *huno hu-maine.*

¹⁵ Mani kea huteno mage hie “Tamakaya nagaifema tamahau tamayamopafima tamahaisigetamahena tamaha-pai-mainoa kemona akave malegahae.

¹⁶ Akave malesage¹na Nenafatega havigesugeno tamaya hisia Avamula hu-tesigeno tamakaite eno agola tamakai¹ene emaige maige huno maigahie.

¹⁷ Ani Alu Aotage Avamula tamage¹age kemona aepa¹a maineno hulama-ve-ligahie. Muki¹a ma mopale yafema amaugafama ali¹ya nehaiya vea¹moya Alu Aotage Avamula age¹ya havilama ohunaya yafe o¹avalegahagi tamakaya ago age-lama hutama age-mainaya yafe tamakai¹enena emaineno tamakupi haino maigahie.

¹⁸ Na yafe tama-talesugetama megusa nafa¹ne kana hutama omaigahayanagi¹na tamakaitela ete¹na egahue.

¹⁹ Okasi kana¹a ma mopale yafema amaugafama ali¹ya nehaiya vea¹mo¹ya nago¹ene on-agegahayanagitama tamakaya nagegahae. Agola maige maige yamona aepa¹a mainoafe tamakaya ani¹a hutama maige maige hisaya tamahaimula alitama maigahae.

²⁰ Mainesageno Alu Aotage Avamu¹mo¹ma esia kanafina nagaya Nenafa¹ene mainoanagitama tamakaya ani¹a hutama nagai¹enena maisage¹na nagaya ani¹a hu¹na tamakai¹enema mainoa yafena havilama hutama havigahae.

²¹ Nago¹a vea¹mo¹ya nagai kema havi¹ya

akave malenu'ya nagai'fena hamau amayamopafifna hamau-maine. Nagai'fema hamau amayamopafima hamau-mainesia vea'mo'ya Nenafa'a ani'a huno amakaifena hau ayamopafina nehaiye. Nehaige'na nagai'enena ani'a hu'na nahau nayamopafina nenahaige'na nagu'a amamisuge'ya nagaila nage-lama hu'ya nagegahae." huno hie.

²² Higeno nago kanoa, Yutasi Isakalioti omagi, hamo'amo'a mage huno Yisasina havige "Alani-mogae na'a higeka kagaya tagaila taulagafina kagaika aepaka'a tave-nelinagi muki'a ma mopale yafema amaugafama ali'ya nehaiya vea'mogami amaulagafina hu-falote huka ohunanane?" huno havinege.

²³ Havigegeno Yisasi'a mage huno hie "Nago'a vea'mo'yama nagai'fema hamau amayamopafima hamaisige'yahena nagai kemona akave malesagenofena Nenafa'a amakaifena ani'a huno hau ayamopafina haugahie. Nenafa'ene nagai'nienena amakai'ene emai'gahu'e.

²⁴ Nago'a vea'mo'ya nagai'fema hamau amayamopafima ohamaisiana nagai kemona akavela nomalae. Manima tamaha-nepauva kea nagai'nige kea omalegi hu-na-tenea Nenafa ke hane.

²⁵ Tamakai'enema maine'na mani kea ago tamaha-pai-mainoe.

²⁶ Tamaha-pai-mainoanagino Nenafa'a nagai nagile'ma hu-tesia kanomo'a, tamayama hisia

Alu Aotage Avamulagino emaineno muki'a yana hulamave-liteno muki'a tamaha-pai-mainoa kea alino tamakesa hao hinagetama havigahae.

²⁷ Tama-tale'na ugahe tamaipa falu hutama maisaya tamaku tamakesa nelamamue. Nagayama naipa falu hu'na nemauva nagu nagesa nelamamue. Anima tamaipa falu hutama maisaya yama tamamua yana ma mopale vea'moya amaipa falu nehaya ya kana ohunegi kana'age tamaku tamakesa havitama kolia ohiho.

²⁸ 'Tamatale'na ute'na ete'na tamakaitega egahuema.' hu'na tamaha-pauva kea ago hav-ilinae. Nagaifema tamahau tamayamopafima nelamahaisigetamahena Nenafa mainelega visua yafena muse hale'asine. Nenafa'a nagaseno ala kano mainea yafe Nenafa mainelega visua yafena muse hale'asine.

²⁹ Tamatale'na visua kanafina nagaife havi-tama tamakupi maletama tamametitima hisaya yafe yaufa ani kana falote ohunea kanafi menia mani kea tamaha-nepauve.

³⁰ Satani'a, ma mopale'ma kava hu-mainea kanoa ago ne'eanagi'na nagaya nago'ene kea ohugahue. Satanina tokiya'amo'a nagaila onagaseneanagi Nenafa nahapai-mainea kava hu'na faligahue.

³¹ Nagayama Nenafafema nahau nayamopafi nenagea kavala ma mopale vea'mo'ya havisaya yafe Nenafa naha-pai-mainea kava nehue. Hai nehugi vigetao." huno nehie.

15

Yisasi'a "Nagaya vaini nofi mainoe." huno hie.

¹ Yisasi'a mage huno hie "Nagaya tamage hu'na vaini alagamo nofi maugeno Nenafa'a ani vaini alagamo nofi hoyalela yagai-maine.

² Agaya muki'a nagai vaini nofi akopa'mo'a alagama o'ayea akopa'yaga atagi ne'ataleno alagama ayea akopa'yaga 'Nago'ene alaga ayesie.' huno ai'a alino hagalo nehie.

³ Tamaha-pai-mainoa kemo'a tamakaila ago alino hagalo higeno oni'yatamia omalenegi kanale tamahau-maine.

⁴ Tamakaya nagai'enema ai-ga'maesayana nagaya tamakai'enena ai-ga'mae'na maigahue. Nago vaini alagamo nofi'mo akopamo'ma nofite'ma ai-oka'maesiana alaga o'ayegahie. Na'a hu-maineafe tamakaya nagaila nava'ale'ma ai-oka'maesayana tamakaya alaga o'ayegahae.

⁵ Nagaya vaini alagamo nofi maugetama tamakaya ani vaini alaga nofi'mo akopa'a mainae. Tamakaya nagai'enema ai oka'maesayana nago'a kanale kavala ohugahae. Kanale kava'ma hinutamahena nagai'ene ai-ka'maetama maiho. Nago'a vea'mo'yama nagai'enema ai-ga'mae'ya maisage'na nagayama amakai'enema ai-ka'mae'na maisuana kasago'ya nofi alagamo kave'a ayegahae.

⁶ Nago'a vea'mo'ya nagai'enema ai-oka'maesayana o'ayea vaini nofi'mo akopa'ma atagi'ya haga'yu hu-talageno'ma hagage nehia

kava nehae. Ani akopayaga alitalu hu'ya atafi kae-talena.

⁷ Tamakaya nagai'enema aiga'maetama maisayana nagai kemo'a tamakupina hanesigetama nago'a yafema naha-vi-gesayana naha-vi-gesaya yana hu-lama-tegahue.

⁸ Tamakayama kasago'ya nofi alagamo kave'ma aye-gasago'ma hisaya yateti Nenafa'a ala agia aligahie. Alinagetama-nagitama tamakaya nagai'enema tokae'ya nemaiya anaga maigahae.

⁹ Nenafa'a nagaifena hau ayamopafi hau-mainea kava hu'na tamakaifena ani'a hu'na nahau nayamopafi nenahaiye. Nahau nayamopafima nenahaiya yamo agu'afinaga faletama maiho.

¹⁰ Nagaya Nenafa'ma hu-mainea kahegi kema havi'nama akave maloa yafe Nenafa'a nagaifena hau ayamopafina nehaiye. Tamakaya ani'a hutama hu-mainoa kahegi kea havitama akave malesayana tamakaifema nahau nayamopafi nenahaiya yamo agu'afinaga faletama maigahae.

¹¹ Nagai nagu'afima muse yama hanea yana tamakai tamakupi male hava-telama-tesua yafe mani kea tamaha-pai-mainoane.

¹² Nahau-mainea kavala mage hu'na nehue 'Nagaya tamakaifema nahau nayamopafima nahaiya kava hutama nelama-fugamifena tamahau tamayamopafi tamahainageno ani'a hu'ya amakaya tamakaifena hamau amayamopafina hamaino.' hu'na tamaumonola nemaloe.

¹³ Nago kanomo'ma nefufema 'Kagai

kaugafama ali-gatisua yafene hu'na nagaya faligahue.' huno'ma hisiana muki'a vea'mogami hamau amayamopafima nehamaiya kavala amakasegahie.

¹⁴ Nagayama nehua kema akave malenutama-hena nagai'ni nenafugatama maigahae.

¹⁵ Nagaya tamakaifena 'Ali'ya vaya'nimogatama mainae.' hu'na nago'ene ohugahue. Nago ali'ya kanomo'a kava kano'amoma ali'yama alia aepa'a o'agenegi nagaya muki'a yama Nenafa'ma naha-pai-mainea kea ago tamaha-pai-mainoa yafe 'Ali'ya vaya'nimogatama mainae.' hu'na ohugahugi ago'ma tamaha-nepauva yafe 'Tamakaya nagai kanapa mainae.' hu'na nehue.

¹⁶ Tamakaya nagaila nagetama hu-yo'okinagi nagaya hagote'na tamakaila tamake'na hu-yogite'na tamakaitami utama Anumaya Koti haisia kava hisaya yafe hu-yogilamatenoe. Ani'ama hisaya yapiti alaga'a falote hute'ya agola mainesagetama nagai nagile'ma Nenafatega havigesayana muki'a havigesaya yana tamamigahie.

¹⁷ Kahegi kea mage hu'na tamaumonola nemaloe nelama-fugamifena tamahau tamayamopafi tamahainage'ya ani'a hu'ya tamakaifena hamau amayamopafi hamaino."

Ma mopale vea'mo'ya kame hu-lama-tegahae huno hu-mainae.

¹⁸ "Ma mopale yafema amaugafama ali'ya nehaiya vea'mo'ya tamakaila kamema hu-lama-

tesagetamahena tamakesa hao hinagetama hav-iho. Hagote'ya nagaila ani'a hu'ya kamea hu-na-tenayane.

¹⁹ Tamakaya ma mopale vea'mo'ya nehaya kava'ma hutama mainale'asipa mani mopale vea'nemo'ya hamau amayamopafi tamakaifena hamaile'asinagi nagaya ma mopafi vayapiti tamake'na hu-yogi-malenoafe tamakaya mani mopale vea kana vea'ne omainae. Na yafe ma mopale yafema amaugafama ali'ya nehaiya vea'nemo'ya amakesa nehavi'ya kamea hu-nelama-tae.

²⁰ Nagaya mage hu'na ago tamaha-pai-mainoe 'Ali'ya kano'amo'a kava kano'amona o'agasene.' hu'na hu-mainoane. Ani kehe tamakesa havitama maiho. Nago'a vea'mo'ya nagai'ma, tamakai kava kanotamimonima, ali'ya haviyama hu-na-taya kava hu'ya ani'a hu'ya tamakaila ali'ya haviya hu-lama-tegahayanagi nago'a vea'mo'ya nagai kema havi'ya akave nemalesaya vea'mo'ya tamakai kea ani'a hu'ya havi'ya akave malegahae.

²¹ Hu-na-tenea kanomona havilama hu'ya ohavinaya yafe ani kavala hu-lama-tegahae. Tamakaya nagai vea'nema mainaya yafenagi'ya ani kavala hu-lama-tegahae.

²² Nagaya e'nama kema hama-opaule'asina 'Kefo katia hane.' hu'ya ohale'asine. Afa'a ago me hama-pauvanagi kefo yama hu-mainaya yafena kalagi aite'ya agasesaya katamia omalene.

²³ Nagai'ma kamema hu-na-tesaya

vea'nemo'ya Nenafa'ene kamea hu-ne'atae.

²⁴ Nagaya amakaipima maine'nama nago'a vea'mo'yama tokiya kava'ma ohule'asina 'Kefo yatia hane.' hu'ya ohale'asinagi ago aluge'ya agete'ya nagai'ene Nenafa'enena kamea hu-nela'a-tae.

²⁵ Amakai kahegi kema kae-malenaya kemo'a nagaifena mage hu-mainayane 'Havi kavala ohu-nege'ya kamea afa'a hu-ne'a-tae.' hu'ya kae-malenayane. Mani kemo'a ago falote huno tamage hisia yafe nagaila kamea hu-nena-tae.

²⁶ Nenafategati tamaya hisia veka'a hu-tesugeno'ma esiana tamage'age ke huno tamaha-paisia veka'a, Alu Aotage Avamula Nenafategati'ma esiana nagaifena tamaha-paigahie.

²⁷ Tamaha-paigahianagitama nagaya ali'yama aepa he'na ali-mainoa kanaleti tamakayama nagai'enema mainaya yafe nagaifena vea'mogamina hama-paigahae.”

16

¹ Yisasi'a mage huno hie “Nagaifema tamakupima ago malenaleti'ma ne'ataletama alu kate o'visaya yafe mani kea tamaha-paimainoe.

² Amakaya tamakaila mono nopitila tamavale'ya tamanati-talegahae. Ani kanama esia kanafina nago'a vea'mo'ya tamakaila nelamahae'ya ma amakesa havigahae 'Mani kava'ma nehunana Anumaya Kotina akave nemalone.' hu'ya hugahae.

3 Nena'ene nagai'enema amaku'a ota'aminaya yafe ani kavala hu-lama-tegahae.

4 Ani kanama falote hisia kanafina tamaha-paimainoa kemo'a tamakesa ai-hagalo hinagetama havilama hisaya yafe menia mani kea tamaha-nepauve. Ehe kanafina tamakai'enema mainoa yafe nayona ani kea tamaha-opainoane.

Yisasi'la Alu Aotage Avamu'mo ali'yama'ahe hu-maine.

5 Nagai'ma hu-na-tege'na emainoa kanolega menia ete'na ugahuanagitama nago vekamoga nagaifena 'Hanatega ne'vane?' huka nahavinokane.

6 Nahavi-nokayanagi nagayama tamaha-paimainoa kehe tamakesa havitama tamahau nehae.

7 Tamahau nehayanagi tamage-lafa hu'na tamaha-nepauve nagayama o'visuana tamaya hisia kanoa omegahigi nagayake ute'na tamaya hisia kanoa hu-tesugeno tamakaitegama esiana kanale kana'a falote hu-lama-tegahie.

8 Efalote'ma hisiana tamaya hisia kanomo'a muki'a ma mopale vea'mogami kefo yama nehaya aepa'amiene kanale kava'ma nehaya aepa'amiene Anumaya Koti'a kaiyekema humatesia yamo aepa'aene hu-falote hisige'ya havite'ya agegahae.

9 Kefo yamo aepamofena tamaya hisia kanomo'a mage huno hugahie 'Yisasifena havitama tamakupi maletama tamametiti nohaya yafe kefo yatamia hane.' huno hugahie.

¹⁰ Nagaya Nenafa mainelega ete¹na ugahua-nagitama nago¹ene nagaila onagesayafe tamaya hisia vekamo¹a kanale kava¹ma hisaya yamo aepa¹a hu-falote hinagetama havitetama agegahae.

¹¹ Anumaya Koti¹a ma mopale kava kanoa, Satanina, ago kaiyekea hu-tenea yafe tamaya hisia veka¹a Anumaya Koti¹ma kaiyekema humatesia yamo aepam¹a hu-falote hinagetama havitetama agegahae.

¹² Nagaya kasago¹ya kea tamaha-paigahe ne-huanagi kana¹age hu-mainea yafe tamakaya havilama hutama ohavigahae.

¹³ Ohavigahayanagi Anumaya Kotina tamage¹age nehia Avamu¹amo¹ma esiana agai¹alegati muki¹a Anumaya Koti tamage¹age kea tamaha-paigahie. Agesafiti kea tamaha-opaigahianagino nehavia ke¹age¹ene haenagama esia kanafima falote hisia yamo kene tamaha-paigahie.

¹⁴ Tamaha-painageno ani kanomo¹a nagayama hu-mainoa kea tamakaila tamaha-paisia yafe nagai nagia tusiya huno ali-saga hugahie.

¹⁵ Hugahianagi muki¹a Nenafa¹ma malenea yana nagai¹ni¹a yama¹age fatago huno hanea yafe mage hu-mainoe ‘Alu Aotage Avamu¹mo¹a amisua kea alino tamakaila me lamaha-paigahie.’ hu¹na hu-mainoe.”

Muse yamo¹a taipa kana yamo kumala ali-gahie.

16 “Osi kana kano'a nago'ene onagegahagi osi kana kano'a maitetama etetama nagegahae.” huno hie.

17 Hige'ya nago'a agai'aenema tokae'ya ne-maiya anaga'amo'ya amakai'amifina mage hae “Osi kana kano'a onagegahae huno nehuno etetama osi kana kano'a nagegahae huno nehuno'ma nehia kemona aepa'amo'a hana'a humaine? ‘Nenafatega visua yafe nehue.’ huno nehia kemona aepa'a nohavune.

18 Osi kana'aema hia kemona aepa'a na'ane huno nehie? Tagaya agayama hia kea nohavune.” hu'ya nehae.

19 Nehu'ya havigegahema haya kea Yisasi'a ago agu'afinaga haviteno mage huno hie “Hua kemo'a ‘Osi kana kano'a nagaila onagegahagi etetama osi kana'a maitetama nagegahaema.’ hua kehena tamakaya lamakaya tamakaitamifina mani kemona aepa'ahe huge havige nehao?

20 Tamage-lafa hu'na lamaha-pauve tamakaya tamatale'nama visua yafena avia ategahayanagi ma mopale vea'mo'ya muse hugahae. Tamakaila hageteno tamahau hu-tesigetama haenaga'a ai-yahae hutama muse hugahae.

21 A'mo'ma nafa'nema ategahema nehuno agatama aisia kana falote hisia yafe hauna hi-anagi nafa'nema ago ateteno'a ‘Nafa'nea ago atoe.’ huno muse nehuno agatama ai-mainea yafena age-kani-mainie.

22 Ani kanamo'a tamakaipina hane. Menia tamakaya tamahau nehayanagi ete'na tamake-

sugeno¹a tamakupina muse yamo¹a hiya hinageno nago kanomo¹a ani muse yana tamaha-ofalegahie.

²³ Ani kanama eva¹yima hisiana tamakaya nagaila nago yafena nahavi-okegahae. Tamage-lafa hu¹na tamaha-pauve nagaifema hutama nagai nagima ayetama nago yafema Nenafama havigesayana muki¹a havigesaya yana afa¹a tamamigahie.

²⁴ Nayo¹ene meniene nagaifena nehutama nagia ayetama nagoke yafena Nenafana haviokenayane. Nagi menia muse yatamimo¹ma tamakupina hiya huno hanesia yafena nahavigege¹na tamamino.”

Yisasi¹a ma mopafi tokiya yana ago agasemaine.

²⁵ “Mani kea tamakaila avame kefi hu-male¹na tamaha-nepauvanagi haenaga¹a mani avame kea nago¹ene ohugahuanagi¹na hu-falote hu¹na Nenafafena tamaha-paigahue.

²⁶⁻²⁷ Hu-falote hisugetama ani kanafina nagai nagile havigegahagi nagaya ‘Tamakaifena Nenafana havigegahue.’ hu¹na ohunogi tamakaya nagaifena tamahau tamayamopafi nelamahaiya yafe Nenafa¹a tamakaifena hau ayamopafi nehainageno havigesaya yana agai¹a tamamigahie. Nagayama Anumaya Kotitegati emainoa kema tamakupi malenaya yafe Nenafa¹a tamakaifena hau ayamopafi nehaiye.

28 Nagaya Nenafa¹ene mainoleti ma mopafina emainoe. Menia nagaya mani mopa atale¹na Nenafatega ugahue.” huno hie.

29 Hige¹ya agai¹aenema tokae¹ya nemaiya anaga¹mo¹ya mage hae “E, avame kefiti menia nohanagi hu-falote huka nehane.

30 Menia tagaya havunana kagaya muki¹a yana havimalenane. Muki¹a vea¹mo¹ya amakupima haviya yana ago havimainana yafe nago kanomo¹a nago yafena kahavi-okesie. Muki¹a yana havimainana yafe tagaya kagaifena Anumaya Kotitegati emainane huta tagupi malenone.” hu¹ya hae.

31 Yisasi¹a kenona¹amilela mage huno hie “Meni tamakaya havitama tamakupina nemale-tama tamametiti nehafio?

32 Haviho nago kanamo¹a aupa¹a egahema hia kanamo¹a ago efalote hu-maine. Ani kana-fina nagoke nagoke¹mogatama nataletama kumatamile ute ete hugahae. Nataletama visage¹na nagai¹nige maigahuanagi Nenafa¹a nagai¹enena maine.

33 Tamaku¹a namitetama tamaipa falu hutama hilato hutama maisaya yafe mani kea tamahapai-mainoe. Ma mopale mainesageno nago kana¹age yamo¹a falote hugahianagi kolia ohiho. Nagaya ma mopafi au¹ava yana ago agase¹na kava yagai-mainoe.” huno hu-maine.

17

Yisasi¹a agai¹a anaga¹a hama¹-maesia yafe nunamu hu-maine.

1 Yisasi'a mani kea huteno ikapinaga age-saga hu-maineno Anumayamotega mage huno hie "Nenafagae falisua kana'nia ago efalote hie. Nekamo'na kagi ali-saga hisua yafe falite'na he-ti'na kagaitega haisua yafe lokiya hale yania nekamonina namio.

2 Nekamonia muki'ama naminana vea'mogamina agola maige maige hisaya hamaimu'amima amamisua yafe muki'a vea'mote kava yagaisua tokiya'nia ago naminane.

3 Anumaya Kotiga kagaikage ala tokiya kanoa tamagemona tama'a nagoke'age Anumaya mainanagi vea'mo'ya kagaifema havilama hu'ya maisayana hu-tenana kanoa 'Yisasi'a vea'mogami amaku amamema'a ali-gatisia kanoa ikapinagati emainea kano maine.' hu'ya havilama hisayana maige maige hisaya hamaimula aligahae.

4-5 Naminana tokiya hale yateti'a ma mopalela kagia alisaga hu-mainoe. Naminana ali'yana ago ali'na avaya aye-mainoa yafe Nenafagae meni kanafina kagai kavate mainesugeka tokiya hale yani'a namio. Ma mopama talo ohunana kanafina kagai'ene mainoanagi'na tokiya hale yania haneanagi menia eteka ani yana namio.

6 Ma mopafi veapiti'ma naminana vea'mogamina ago aepaka'a hu-falote hu'na hama-pai-mainoe. Ani veala kagaika'a vea'negika nagaila ago naminane. Naminanage'ya ani vea'mo'ya kagai kea atafa hu-linae.

⁷ Atafa hu-line'ya muki'a naminana yana kagaika'alegati emaine hu'ya menia ago havilinae.

⁸ Naminana kea ago amamuge'ya ago atafa hu'ya havilama huline'ya nagayama kagaitegati'ma emainoa yafena tamage nehie hu'ya havilama hu-line'ya kagayama hu-na-tanage'na emainoa yafena amakupi male'ya amametiti nehae.

⁹ Amakaifena Nenafagale ke hu'na kahavi-negoe. Ma mopale yafema amaugafa ali'ya nehaiya veafe Nenafagale menia kahavi-nokogi kagaika'ama naminana vea'nea kagai vea'ne mainaya yafe naminana veafe kahavi-negoe.

¹⁰ Nagai veala kagai veale. Kagai veala nagai vea mainage'ya ani vea'nimo'yama nagai tokiyaleti haya kavala nehage'ya mopale vea'mo'ya agete'ya nagai nagia alisaga nehae.

¹¹ Ali-saga nehage'na menia ma mopaletila atale'na kagaitega ugahuanagi nagaifema amakupi nemalaya veala ma mopafi maigahagi alu aotage Nenafaga kagaika kagileti naminana nagile'ma hanea tokiyaleti au'vai-ma-tesanana ta'agaya nagoke kanolatama maino'a ya hu'ya amakaya nagoke kate male'ya nagoke vea'ne maisae.

¹² Nagaya amakai'ene maine'na kagayama naminana nagile'ma hanea tokiyaleti au'vai-ma-togeno nago'mo'a hani-ki-mainea yapima tegelege nehia atafina o'ugahagi Anumaya Koti kema kae-malenaya kemo'ma efalote huno tamagama hisia yafe anima hani-ki-mainea yapima tegelege nehia atafima visia kanoa Yutasi'a

agai'age ughahie.

¹³ Menia ete'na kagaitega egahugi nagayama nehua muse yani'amo'a amakai amakupina hava-tesia yafe ma mopale maine'na mani kea hama-nepauve.

¹⁴ Hama-nepai'na kagai kea ago amaminogi nagaya ma mopafi kanoa omai'noe. Alu nagu name'ene kano mainoge'ya amakaya nagayama hua kava hu'ya ma mopale vea'ne kana vea omainae. Alu amaku amame'ene vea'ne mainaya yafe ma mopale vea'mo'ya amakaife amaipa kafa he-ma-te'ya kamea hu-ne'ama-tae.

¹⁵ Kamea hu-ne'ama-tayanagi nagaya vea'nimogamifena 'Ma mopaleti amavalesaga huo.' hu'na kahavi-nokogi 'Satani'ma aye-mavataga hu yafe au'vai-mateka amaugafa ali-gatisanage'ya ka'ye'ya maisae.' hu'na kaha-vi-negoe.

¹⁶ Nagaya ma mopale kanoa omai'noe. Alu nagu name'ene kano mainoge'ya amakaya nagai kana hu'ya ma mopale vea'nea omainae. Alu amaku amame'ene veane mainae.

¹⁷ Mainayafe kagaika ke-lamage kekaleti alu aotage vea'ne maisaya amaku amakesa amamio. Kagayama hu-mainana kemo'a tamage'age nehie.

¹⁸ Kagaya ma mopafima nagai'ma hu-natanage'na emainoa kava hu'na naminana vea'nea nagaya mopale vea'mogami amu'nopi ago hu-ma-tenoe.

¹⁹ Nagi tamage hu'ya amaku amamema'amona kagaila kamisaya yafe nagaya nagu

namema'amona kagaila negamue.

20 Nagai'enema mainaya vea'ne'agefena kahavi-nokogi amakayama hisaya keleti nagaifema havi'ya amakupi male'ya amametitima hisaya veafe'ene kahavi-negoe.

21 Nenafagae mage hu'na kahavi-negoe kagaya nagai'enema mainage'na nagaya kagai'enema maugeta'ama hu'a kava hu'ya nagaifema amakupi malenaya veala nagoke vea kano'a ta'agai'ene maisage'ya muki'a mopale vea'mo'ya kagayama hu-na-tanage'nama emainoa yafema havi'ya amakupi male'ya amametiti hisae.

22 Ta'agayama nagoke ta'aipale'ma mau'a kava hu'ya nagoke amaipale maisaya yafe nami-nana tokiya hale yani'a ago amaminoe.

23 Amakaya nagoke vea kano'a mai-lama hu'ya maisaya yafe nagaya amakai'enena maugeka kagaya nagai'enena mainane. Kagaya hu-na-tanage'na emainoa yafema muki'a mopale vea'mo'ya havisaya yafe'ene nagaifena kahau kayamopafi negahaigeka ani'a huka ma mopale veafe'ene kahau kayamopafi kahau-mainea yama havisaya yafe kagai kema havimalenaya vea'mo'ya nagoke vea kano'a maisae.

24 Nenafagae ma mopama taloma ohunana kanafina nagaifena kahau kayamopafi kahaigekama naminana tokiya hale yani'a nagai'ma naminana vea'mo'ya agesaya yafe nagaya maisua kumate maisae hu'na nehue.

²⁵ Kanale'ya huka fatago hu-mainana Nenafagae ma mopale yafema amaugafa ali'ya nehaiya vea'mo'ya kagaila okagenagi nagaya ago kagaila kage-mainoafe ma ma mainaya vea'mo'ya nagai'ma hu-na-tanage'na emainoa yafena ago havi'ya age'ya hu-mainae.

²⁶ Nagaifema kahau kayamopafi kahau-mainea yana amakai amakupi malesana yafe aepaka'a hu-falote hu'na hama-pai-mainoanagi nago'ene hama-paigahue. Nagaya amakupi maisua yafe aepaka'a ago hama-pai-mainoe.” huno hu-mainae.

18

Yutasi'a Yisasina avaleno kame vava amayapi atene.

¹ Yisasi'a ani kea Anumayamotega havigeteno tuelufu'a (12) anaga'aene hati-lavi'ya Kitaloni lina mo la'kae'ya umainae. Atu kaiyaga nago olivi yosa kali-malenaya hoya hanege'ya Yisasi'a agai'aenema tokae'ya nemaiya anaga'amo'yaene ani hoyafinaga umainae.

² Umainayanagi muki'a yupa Yisasi'a tuelufu'a (12) anaga'amo'yaenena ani hoyafinaga molitalu hu'ya nemaiya yafe Yutasi'a, agesi'ma huno Yisasina kamema hu-tesia kanomo'a, ani hoya ago age-mainaeane.

³ Age-maineanagino Yutasi'a via'yamo ala mono note kava vayate'ene* Falasia vayate'ene vige'ya mono note ati vava'ene Lomu ati vava'ene amigeno amavaleno ani hoyafinaga

ka'ni'ene lamu ka'ni'ene tu hisaya ya'ene ali'ya emainae.

⁴ Ayanagi Yisasi'a muki'a augafale'ma falote hugahema hia yana ago haviteno amakaite via'yamo mo hama-vige “Tamakaya tafe atine'ayae?” huno hie.

⁵ Hige'ya kenona'a mage hu'ya hae “Nasaleti Yisasife ati-yeta ne'one.” hu'ya hageno Yisasi'a mage hie “Nagaya ma mainoe.” huno higeno agesi'ma huno Yisasina kamema hu-tea kanoa, Yutasi'a, ani vaya'ene tokaeno maine.

⁶ Mainegeno Yisasi'a “Nagaya ma mainoe.” huno'ma hia yafe amakavelegati ete'ya valega mo fae-laka-ti-mainae.

⁷ Fae-laka-ti-tageno Yisasi'a nago'ene eteno hama-vige “Tafe ati ne'ayae.” huno hige'ya amakaya nehu'ya “Nasaleti Yisasife ati ne'ayone.” hu'ya hae.

⁸ Hageno Yisasi'a kenona'amia mage hie “Nagaya ago tamaha-nepauve nagaya ma mainoe hu'na nehue. Tamakaya nagaifema nati ne'ayenutamahena ma ma nagai'enema mainaya vayala amatalege'ya afa'a viho.” huno hie.

⁹ Yisasi'a ago'ma hu-mainea kea mage huno hu-maineanne “Naminana veala nagoke kano'a ata-o'ayegahie.” huno hu-maineanne. Anima hu-mainea kemo'a falote huno tamagama hisia yafe Yisasi'a “Amatalege'ya viho.” huno hu-maine.

¹⁰ Higeno Saimoni Pita'a aya'aya naepe'a alianagino alisagino ala mono note hagote kava kanomo ali'ya kano'a, Malakusina, ai-koligeno

tamaga kaiyaga agesa aifa-kali-talegeno asaga hu-lavi-mainae.

¹¹ Ai-fakaligeno Yisasi'a Pitafena hapaino “Aya'aya naepeka'a tafugepi vaiyo. Naugafaene nagu name nagata aisia yani'a satu'age hia tima hanea masu ke'ayola Nenafa'a naminegi nagaife onesie huka nehano?” huno hie.

Yisasina Anasite avale'ya umainae.

¹² Lomu ati vaya'ene ala kava kano'amiene mono note ati vaya'ene Yisasina atafa hu'ya nofi ki-mainae.

¹³ Nofi k-itete'ya hagote'ya Anasite avale'ya umainae. Anasi'a Kaiyafasina a'amona nefa maineanagino Kaiyafasi'a ani kafufina ala mono note hagote kava kano maineane.

¹⁴ Kaiyafasi'a Yuta vayafe mage huno hama-pai-maineane “Kanalele nagoke kanomo muki'a vea'mogamitefe huno falisie.” huno hu-maineane.

Pita'a Yisasifena “O'agenoa kano.” huno hu-mainae.

¹⁵ Saimoni Pita'ene nagola Yisasi'enema tokaeno nemaiya kano'ene* Yisasina akave anati'ana umaina'e. Ne'va'ageno mono note kava kanomo'a ani Yisasi'enema tokaeno nemaiya kanomona ago age-mainea yafe agaya Yisasi'ene ala mono note kava kanomo no kegi'ya kovefinaga hai-fale-mainae.

¹⁶ Haigeno Pita'a fiate he-tino mainegenoa an-ima Yisasi'enema tokaeno nemaiya kanomo'a fiate'ma yagai-mainea muna'mofena mo hane-paino Pitana avaleno emaine.

¹⁷ Ne¹egeno fiate¹ma yagai-mainea muna¹mo¹a Pitafena mage huno havige “Kagaya mani kanomona tuelufu¹a (12) vayapiti kano mainano?” huno havigegeno “A¹ao nagaya ani vayapiti kanoa omainoe.” huno hapaiye.

¹⁸ Tusi¹a yasimo hige¹ya ali¹ya vaya¹ene ati vaya¹ene ata kae-tale¹ya he-ti¹ya tota hu¹ya mainageno Pita¹a amakai¹ene atale he-tino augafa tota huno maine.

Ala mono note kava kanomo¹a Yisasina kaiyeke hu-tene.

¹⁹ Ala mono note¹ma hagote kava kanomo¹a Yisasifena “Kagai¹enema tokae¹ya nemaiya anagakahe¹ene kagayama hu-ma-veli mainana kehe¹ene naha-paiyo.” huno havinege.

²⁰ Havigegeno Yisasi¹a mage hie “Nagaya muki¹a vea¹mogamina fufute hama-nepauvane. Muki¹a yupa Yuta vea¹nea melitaluma haya mono nopi¹ene ala mono nopi¹ene hama-nepauvane. Fala-ki¹na hama-opainoe.

²¹ Na¹a hige¹ka nagaila nahavi-negane? Nagai kema nehaviya vayafena hama-nepauva kehena hama-vigo. Nagayama hama-pai-mainoa kea ago havilinae.” huno hie.

²² Higeno nago ati kanomo¹a he-tino maineleti Yisasi¹ma mani kema nehiana augosafi ai-konelino mage hie “Na¹a hige¹ka kagaya ala mono note hagote kava kanomo aulagafina mani kea nehane?” huno hie.

²³ Higeno Yisasi¹a kenona¹a mage hie “Kefo kema hu-mainesugekahena nagaya kefo kema hua kea hu-falote huka naha-paiyo. Nagayama

kanale kema hu-mainesugekahena na'a higeke nai-ko-neline?" huno hie.

²⁴ Hige^lya nofi^lma kitaya nofila kalu he-o^la-tene^lya Anasi^la ala mono note hagote kava kanoa, Kaiyafasitega hu-tege^lya avale^lya umainae.

Pita^la nago^lene Yisasifena avane hu-maine.

²⁵ Ne^lvageno Saimoni Pita^la atale maineno ata lota huno mainege^lya agaife mage hu^lya hae "Kagai^lenena mani kanomona tuelufu^la (12) vaya^lamopiti kano mainano?" hu^lya hageno Pita^la avane huno mage hie "A^lao nagaya ani kanoa omainoe." huno hie.

²⁶ Higeno ala mono note^lma hagote kava kanomo ali^lya kano^lamona, Pita^lma agesama ai-fakali-talegeno asaga hu-lavi-mainea kanomo anagapiti kanomo^la mage huno hie "Kagaya Yisasi^lene hoyafina maina^lage^lna kage-mainoe." huno hie.

²⁷ Higeno Pita^la nago^lene avane huno "A^lao nagaila onagenane." huno higeno aupa^la kokolemo^la age ai-maine.

Yisasina Pailatite avale^lya umainae.

²⁸ Yisasina Kaiyafasi nopinagati Lomu kamanile ala kava kanomo^la kaiyekema hu-ne^lamatea note kege^lafiti avale^lya umainae. Yuta vaya^lmogamina mono ke^lamimo^la mage huno hu-maine "Afa vaya^lene tokaetama maisayana amakai kava hutama kefo vaya mainaya yafe ala imu kavela onegahae." huno hu-mainea yafe Yuta vaya^lmo^lya ala imu

kave¹ma mo nesaya yafenagi¹ya ani nopina ohainae.

²⁹ Kumatega mainageno Pailati¹a, Lomu kamanile ala kava kanomo¹a, amakaite eno mage huno hama-vige “Tamakaya na¹ane keleti mani kanoa kaiyekea hu-tegahae?” huno hie.

³⁰ Hige¹ya kenona¹a mage hu¹ya hapaiye “Mani kanomo¹ma kefo kava¹ma ohunele¹asipa avaleta kagaitela omote¹asine.” hu¹ya hae.

³¹ Hageno Pailati¹a eteno mage huno hama-paiye “Tamakaya avaletama tamakaitami mono keleti kaiyekea hu-teho tamakaitami yane.” huno hie. Hige¹ya Yuta vaya¹mo¹ya mage hu¹ya humainae “Kagaya kamanimoga huka taumono malenana kemo¹a nago kanoa haegeno ofalino.” huka hu-mainane* hu¹ya hae.

³² Nayona Yisasi¹a mage huno hu-maine “Nagayama falisua yana yafaga yosale nahae¹ya nasaesage¹na faligahue.” huno hu-maineane. Lomu kamani vaya¹mo¹yage vayala yafaga yosalala hamae¹ya asaige¹ya fali-mainae. Yisasi¹a ago¹ma hu-mainea kemo¹a falote huno tamage hisia yafe Yuta vaya¹mo¹ya mani kea hu-mainae.

³³ Hageno Pailati¹a ataleno kaiyekema hune¹ama-tea nopinaga haino maineno Yisasife ke higeno vigeno mage huno havige “Kagaya Yuta vea¹nogami sauve kano mainano?” huno havige.

³⁴ Havigegeno Yisasi¹a kenona¹a mage hie “Kagaya kagu kagesafiti mani kea nehapi ifi nago¹a vaya¹mo¹ya nagaifena kaha-paigekahe nehano?” huno eteno havige.

³⁵ Havigegeo Pailati¹a kenona¹a mage huno havige “Nagaya Yuta kano mainogeka nehano? Kagai nofi vaya¹ene ala mono note kava vaya¹ene kavale¹ya nagaite ne¹aya yafena kagaya na havi kava hu-mainane hu¹na kahavi-nego.” huno hie.

³⁶ Higeno Yisasi¹a kenona¹a mage hie “Nagaya kava yagaisua kumala ma mopafina omalene. Inagi ma mopafima kava yagaisua kuma¹ni¹ama hanele¹asipa ali¹ya vaya¹nimo¹ya kamea hage¹ya nagaila navale¹ya Yuta vaya¹mogami amayapina onatale¹asine. Inagi nagaya kava yagaisua kuma¹ni¹a ma mopafina omalene.” huno hie.

³⁷ Higeno Pailati¹a mage huno hie “Ala sauve kano mainoe huka nehano?” huno higeno Yisasi¹a kenona¹a mage hie “Kagaya nagaife ala sauve kano mainane hukama hana kea tamage nehane. Nagaya ita¹nimo¹ma natenelegati¹ma emaineana ke-lama¹age hu-falote hisua yafe ma mopafina emainogi ke-lamama havi¹ya amakupi malenaya vea¹mo¹ya nagayama hua kea nehaviye.” huno hie.

³⁸ Higeno Pailati¹a Yisasife mage hie “Ani ke-lamage kea na¹ane ke?” huno nehuno Pailati¹a hati-lavino kumatega via¹yamo Yuta vayate mage huno mo hama-paiye “Kefo kava¹ma hia yana ati ayegetoana omalene.

³⁹ Tamakaya muki¹a yupa ala imuma kigahena naha-vigage¹na nago kanoa kina nopitila afa¹a avale¹na nelamamuanagi na yafe nelamahaiye Yuta vea¹mogatamina sauve kanotamia afa¹a

atalesugeno visio?” huno hama-vige.

⁴⁰ Hama-vigege¹ya ala kefiti mage hu¹ya hae “Agaila ne¹ataleka Palapasina tamisane.” hu¹ya hu-mainae. Palapasi¹a vaya nehamaeno mus-ufa yama¹age hume hume nehaiya kano mainea kanohe hu-mainae.

19

Pailati¹a Yisasifena “Yafaga yosale nili hetama asaigeno falino.” huno nehie.

¹ Pailati¹a Yisasina avaleno “Nofi ka¹yoteti haifu amiho.” huno hama-paige¹ya haifu aminae.

²⁻³ Amite¹ya ati vaya¹mo¹ya aveta¹nafa nofiteti tumano kula talo hute¹ya anute vai-tete¹ya ala kava kanomo fai-ne¹alia augafa haesa kena vai-tene¹ya Yisasi¹ma he-tino mainele e¹ya Yisasifena “Felugae. Yuta vaya¹mogami ala sauve kanomogae.” hu¹ya nehu¹ya augosafi amayateti ainagolape¹ya nehae¹ya hu-mainae.

⁴ Hageno Pailati¹a kumatega hati-lavino ea¹yamo alitaluma hu-mainaya Yuta vayafe mage huno hie “Atiye¹na agoana nagoke kefo ya kano¹a omalege¹na tamakaya mani kea havisae hu¹na avale¹na tamakaite hati-lavi¹na ne¹oe.” huno hie.

⁵ Higeno Yisasi¹a kumategama hati-lavino eana aveta¹nafa nofiteti¹ma talo hu-malaya tumano kula anute vai-tete¹ya haesa kena fai-tetageno hati-lavino elavigeno Pailati¹a mage huno hie “Ageho mani kanoa ma maine.” huno hama-paimaine.

6 Hama-paige'ya mono note kava vaya'mo'yaene ati vaya'ene Yisasina agete'ya ala kegefafiti mage hu'ya hae “Yafaga yosale nili hetama asaigeno falino. Yafaga yosale nili hetama asaigeno falino.” hu'ya hae. Hageno Pailati'a kenona'amia mage huno hama-paiye “Tamakaitami avaletama yafaga yosalela nilia hetama asaiho. Nagaya nago kefo yama'ahena ati-yoana omaleanagi'na ohaegahue.” huno hie.

7 Hige'ya Yuta vaya'mo'ya kenona'a mage hu'ya hapaiye “Yisasi'a agai'ahena mage huno hu-maine ‘Nagaya Anumaya Koti nafa'ne mainoe.’ huno'ma hiana tagaipina kahegi kemo'a mage hu-maine ‘Mani'a augafa kema hisia kanomo'a falisie.’ huno hu-maineafe menia Yisasi'a mani kema hu-mainea yafe falisie.” hu'ya hae.

8 Hageno Pailati'a ani kea haviteno tusiya huno ama'yoa ne'aiye.

9 Ama'yo aigeno Pailati'a eteno kaiyekema nehavia nopinaga hai-faleno maineno Yisasifena mage huno havige “Kagaya hanategati emainane?” huno havigeanagi Yisasi'a kenona'a ohune.

10 Ohigeno Pailati'a mage huno hapaiye “Kagaya na'a higeke nagelela no'aline? Nagaya tokiya'niene kanogi'na ‘Kina nopitila atalegahae.’ hu'nama hisuana afa'a katalegahae. ‘Yafaga yosale nili hetama asaigeno falino.’ hu'nama hisuana ani'a hu-ga-tegahae. Kagaya mani kea nohavino?” huno havige.

11 Havigegenon Yisasi'a kenona'a mage huno hapaiye "Anafinaga mainea Anumaya Koti'a kagai'ma tokiyama okaminele'asipa nagaila natafa ohat'asinagi amakayama navale'ya kagai kayapima natenaya vaya'mogamina kefo ya'amimo'a kagai kefo yakamona agaseno kasago'ya kefo ya'ami hane." huno hie.

12 Higeno Pailati'a anima hia kea haviteno "Hana'a hu'na atalesugenon visie?" huno kafe atine'ayege'ya Yuta vaya'mo'ya ala kegefafiti mage hu'ya hu-mainae "Nagoke kanomo'a Yisasi'ma hia kava huno agai'ahe 'Nagaya ala sauve kanoma mainoe.' huno'ma hisia kanomo'a Sisana kame'a maine. Kagaya mani kanoma atalesanagenon visiana kagaya tagaila ala sauve kanotia, Sisana, kanapa'a omainane." hu'ya hae.

13 Hageno Pailati'a ani kema haya kea haviteno Yisasina avaleno hati-lavino kumatega elavino ea'yamo ala kaiyekema havi kanomo siale emaine. Ani siama malenaya aupaligahena Yuta vaya'mogami kefina Kapatae hu'ya nehae. Ani aupaligahena tagai kefina amalagu ai'ya yafa malenaya aupaligae huta hugahune.

14 Ani kanafina Anumaya Koti'a amakinagomogami amaugafama ali-gati-mainea yafe Yuta vea'mo'ya amakesa hao hinage'ya havisaya yafe imu ki kana'amimo'a aupa hige'ya talo tala hisaya yafe yagemo'a euno amanutule evigeno Pailati'a Yuta vea'mogamina mage huno hampaiye "Ala sauve kanotamimona ageho." huno hie.

15 Hige'ya amakaya ala kegefafiti mage hu'ya

hae “Aote'yama'ae. Aote'yama'ae. Yafaga yosale nili hetama asaigeno falino.” hu'ya hageno Pailati'a mage huno hama-paiye “Nagaya tamakai sauve kanotamia yafaga yosale nili he'na asaisue hugetama nehao?” huno hige'ya mono note kava vaya'mo'ya mage hae “Tagaila nago ala sauve kanotia omaine. Sisa'a agai'age nagoke maine.” hu'ya hae.

¹⁶ Hageno Pailati'a “Yisasina yafaga yosale nili hetama asaiho.” huno avaleno amayapi amamine.

Yisasina yafaga yosale nili he'ya asai-mainae.

¹⁷ Yisasina avale'ya vageno hae'ya asaisaya yafaga yosa agai'a ko-fino anu ayamufae hu'ya nehaya ago'yalega umaine. Ani ago'yamo agia Yuta vaya'mogami kefina Kologotae hu'ya nehae.

¹⁸ Ani ago'yafi avale'ya vaya'amo'ya yafaga yosale nilia he'ya asai-malena. Tole kanolata'ene hanaote yafaga yosale aluga aluga atupale hanae'ya asai-malene'ya Yisasina amu'no'anifi nilia he'ya asai-malena.

¹⁹ Asai-maletageno Pailati'a nago avona kaeno Yisasina nilima he-malaya yafaga yosale asai-malene. Ani avomo'a mage hie “Nasaleti Yisasi'e, Yuta vaya'mogami sauve kanoa ma maine.” huno kae-malene.

²⁰ Kae-malenege'ya Yisasi'ma yafaga yosale asai-malena kiyaga ala kuma'mo aupa'ale hae'ya asai-malayanagi'ya muki'a Yuta vea'mo'ya ani avona hapali'ya havimaina. Pailati'a tagufa (3) kefiti kae-malene. Yuta

vaya'mogami kefiti'ene Lomu vaya'mogami kefiti'ene Kaliki vaya'mogami kefiti'ene kae-malenege'ya hapali'ya havimainae.

²¹ Haviya yafe Yuta vaya'mogami mono note kava vaya'mo'ya Pailatifena mage hae “Kagaya ‘Yuta vaya'mogamina ala sauve kano'ami ma maine.’ huka okaeka ma ke huka kao ‘Nagaya Yuta vaya'mogami ala sauve kano'ami mainoe huno'ma hia kanoa ma maine.’ huka kao.” hu'ya hae.

²² Hageno Pailati'a mage hie “Kae-malenoa kea hai kae-maleno.” huno hie.

²³ Ati vaya'mo'ya Yisasina yafaga yosale nili he'ya asai-malete'ya kena'a fo'a (4) heta'ma vai'ya ali-mainae. Aya'aya siota'aene aligathe agayana muki'a analegati afetegama lavi-maineana aye ohati siota hane.

²⁴ Ohati siota hanea yafe ani ati vaya'mo'ya kea mohu mehu hu'ya mage hae “Hatata ohuta afa'a musufa yama nehaya yokaloa kasi nelesunageno tagasesimo'a alisie.” hu'ya amakai'ami humainae. Ani'ama haya kavala Anumaya Koti kefima nayoma kae-malenaya kemo'a ago efalote huno tamage nehie. Anima nayoma kae-malenaya kemo'a mage humaineane

“Kena'ni'a fako hu'ya ne'ali'ya nago kena'ni'a kasi yokalo-le'ya amakesesimo'a aligahie.” hu'ya kae-malenayane.

Kae-malenayanagi'ya ati vaya'moya mani kavala hu-mainae.

²⁵ Hage'ya Yisasima asai-malenaya yafaga yosamo avatela Yisasina ita'amo'ene

nuna'amo'ene he-ti-maina'e. Anakai'ene Kalopasina a'amo'a Malia'ene hamo'amo'a Magatala kumate Malia'ene he-ti-mainae.

²⁶ He-ti-mainageno Yisasi'a ita'amona ageteno agai'enema tokae'ya nemaiya anagapiti hau ayamopafima hau-mainea kanomo'na, Yoni'nae, ita'amo avate he-tita'a maino'ageno ta'ageteno ita'amofena “A'mogae namona kagaika'a nafa'neka'ae.” huno hie.

²⁷ Huteno nagai'fena “Namona itakamo'e.” huno hige'na nagaya ani yupa Maliana yagaigahe noni'alega avale'na umainoe.

Yisasi'a ago fali-maine.

²⁸ Ani kea huteno Yisasi'a “Muki'a ali'ya'ni'a ago ali'na ha'no hue.” huno agesafinaga hav-imaine. Nayoma Anumaya Koti kema kae-malenaya kemo'a efalote huno tamagama hisia yafe mage hie “Life nenage.” huno hu-maine.

²⁹ Hige'ya nofi alagafiti falote hia tina nagola havate-mai ke'ayola ali'ya havago'yafa kana yana ani lipi ayete'ya ka'yote vai'ya ali-saga hu'ya Yisasina avayale malenae.

³⁰ Malageno Yisasi'a mayu mayu huno neteno mage hie “Nenafagae naha-pai-mainana ali'yana ago ali'na ha'no hue.” huno nehuno age'ya ainamagino agu nafa'ne'amo atalegeno vigeno fali-maine.

Ati kanomo'a keveleti Yisasina haohipafi aye-maine.

³¹ Sapati yupahe talo tala hisaya yupagino ega ala Sapati kana falote hisia yafe Yuta vaya'lmo'ya

anima yafaga yosale¹ma hamae-malaya
 vaya¹mogami amaugafamo¹ma Sapatile¹ma
 yafaga yosale hanesia yafena ohamaige¹ya
 Pailatife mage hu¹ya mo havigae “Ati vaya¹mo¹ya
 amaiya ali kofa hisage¹ya aupa¹a falisage¹ya
 hipo¹ya hu¹ya ali¹ya visae.” hu¹ya mo havigae.

³² Hageno Pailati¹a ati vaya hama-paige¹ya mo-
 gayana Yisasi¹enema yafaga yosale asai-malaya
 kanolatamogani anaiya meli kofa hu-mainae.

³³ Ali kofa hute¹ya Yisasina megayana ago fali-
 mainege¹ya megete¹ya aiya ali kofa ohunae.

³⁴ Ali kofa ohageno nago ati kanomo¹a
 keve¹aleti Yisasina haohipafi meyegeni aupa¹a
 ani keve kapitila kolamo¹ene timo¹ene taki-lavi-
 maine.

³⁵ Taki-lavigeno¹ma age-mainea kanomo¹a
 tamaha-nepaiye. Tamaha-nepaiya kea
 tamage¹age ke hanea yafe agai¹a havilama
 hu-lineno tamaha-nepaiyafe tamakayaenena
 Yisasifena havitama tamakupi maletama
 tamametiti hisaya yafe tamage¹age ke tamaha-
 nepaiye.

³⁶⁻³⁷ Nayona Anumaya Koti kema kae-malenaya
 kemo¹a mage hu-maineanne

“Amakaya nago ayamufa¹a ali kofa ohugahae.”
 hu¹ya kae-malenayane.

Nagi nagola Anumaya Koti kema kae-malenaya
 kemo¹a mage huno hu-maineanne

“Haohipafina keveleti¹ma aye-mainea kanomona
 agegahae.” hu¹ya kae-malenayane.

Kae-malenaya kemo¹a falote huno tamagama hia yafe mani kavala hu-mainae.

Yisasina haegafa komufi he-vai-tenae.

³⁸ Yosefe¹a Alimatiyae hu¹ya nehaya kumate nemaiya kanogino Yisasi ke havino akave nemalea kanogi Yuta vayafe koli huno Yisasifema ametiti nehia yana fala-ki-lineno mage huno Pailatina mo havige “Yisasina augafa¹a aligahe nehue.” huno mo havige. Havigegeno Pailati¹a “E.” huno higeno Yosefe¹a via¹yamo Yisasina augafa¹a mo hipo¹ya huno alino emaine.

³⁹ Nikotimasi¹a hagoteno Yisasite hanipinaga emainea kanomo¹a Yosefena mo ha-maegahe kule fuki kana mana¹age tina tole yosafiti he-fino ali havigu higeno mana¹age tina falote higeno sigelile mo malegeno teti¹a (30) kilo falote higeno alino emaine. Ani tole yosalatamogani anakia mea¹ene alo¹ene alino emaine

⁴⁰ Ani tole kanolatamogania va¹a¹yamogani Yisasina augafa¹a mo hipo¹ya hu¹ana mopale malene¹ana mana¹age tina fale-tete¹ana kefe kana kenaleti augafalela ai-galaki galaki hu¹ana ha¹ya kite¹ana aye-gasagi-malena¹e. Muki¹a yupa Yuta vaya¹mo¹ya vaya¹amima falige¹ya ani¹a hu¹ya ne¹amataya kava hu-tena¹e.

⁴¹ Ani kaiyaga Yisasina yafaga yosale nilima he¹ya asai-malenaya kaiyaga nago hoyo hane. Ani hoyafina nagola vaya¹ma he-vai-ma-tesaya yafa kana, yaufa kafi-malenayane. Anifina nago vayala he-vai-o¹ama-tenaya yafa kapi ali¹ya mo he-vai-tenae.

⁴² Ani yupa Sapatihe havi¹ya talo tala hisaya kanafinagi¹ana ani matimatila aupate¹ma hanea yafe ani tole kanolatamogania Yisasina augafa¹a ali¹ana anifi mo malena¹e.

20

Yisasi¹a fali-mainefiti eteno he-ti-maine.

¹ Sota yupa kola otinegeno Magatala kumate Malia¹a natema¹a Yisasina he-vai-tenaya komulega umaine. Uno mogeana komumo avayale¹ma aiso hu-malenaya yafana ago alike-litallenageno avayalela omalegeno moge-maine.

² Mogeteno eteno aiya-yeno Yisasi¹ma nehaiya kanoene Saimoni Pita¹ene maina¹ale eno mage huno hana-paiye “Alatimona komufitila ago ali¹ya hanatepi atenae.” huno hana-paiye.

³ Hana-paige¹ana havite¹ana Pita¹ene Yisasi¹ma nehaiya kanoene Yisasi komulega umaina¹e.

⁴ Anaiya-ye¹ana ani komulega va¹aleti Yisasi¹ma nehaiya kanomo¹a Pitana agaseno aupa¹a komule hagoteno umaine.

⁵ Uteno mope hu-maineno ageana Yisasina aye-gasagi-tenaya kena¹age hanegenog ageanagi anifinaga hai-ofalene.

⁶⁻⁷ Hai-ofaleno mainegenog Saimoni Pita¹a akave ea¹yamo ani komufinaga aupa¹a hai-falemaine. Haino mogeana nago¹a aye-gasagi-tenaya kena ne¹agenog anute¹ma ki-tenaya kenaene Yisasina augafale¹ma aye-gasagi-tenaya kenaene

nagopi tokaeno omalenegi aote kaiyaga aye-gafage-kino malenegeno haino moge-maine.

⁸ Ne'agegeno Yisasi'ma nehaiya kanomo'a komule'ma hagoteno umainea kanoa anifinaga hai-faleno mo ne'ageno komufiti'ma he-ti-mainea yafe “Tamage nehie.” huno havino agupi maleno ametiti nehie.

⁹ Ani kanafina muki'a anaga'amo'ya Anumaya Koti kema kae-malenaya kea havilama ohunae. Ani kemo'a mage huno hu-maine “Yisasi'a fali-mainesifiti he-tigahie.” hu'ya kae-malenaya ke-mona havilama ohunae.

¹⁰ Anakaya Yisasi'enema tokae'ana nemai'a kanolatana anifinagati hati-lavi'ana no'anilega ete'ana umaina'e.

Magatala Malia'a Yisasina age-maine.

¹¹ Malia'a ani yafakamo avayale he-tino maineno avi ne'ateno ape huno ani komufinaga aulu heno ne'age.

¹² Ageana tole ensole kanolatana efe'age kena'ani faili'ana Yisasi augafama malenaya yate mopale maina'e. Nago kanoa anuma malenalega maigeno nago kanoa aiyama malenalega maigeno hu-maina'ageno anake-maine.

¹³ Ne'anakege'ana Maliafe mage ha'e “A'mogae na'a higeka avia ne'atane?” hu'ana haviga'ageno Malia'a mage huno hie “Alani'amona ali'yama mo malaya kumala o'agenoa yafe avi ne'atoe.” huno hie.

14 Nehuno mai-yahae huno ageana Yisasi'a he-ti-mainegeno ageanagi augosafina agelama ohune.

15 Agelama ohigeno Yisasi'a mage hie "A'mogae na'a higeka avia ne'atane? Tafe ati ne'ayane?" huno havigegeno Malia'a agesafinaga mage huno hie "Ma kanoa hoyale'ma yagai-mainea kano maine." huno agesafinaga nehavino mage huno hie "Museka'a nehugi kagayama alika umainenukahena malenesana kumafena naha-paige'na molino." huno hie.

16 Higeno Yisasi'a mage huno hie "Maliao." huno higeno ani a'mo'a maiyahae huno Yuta vaya'mogami kefiti mage huno hie "Laponae." huno hie. Ani kemo'a takai kefina "Hu-lavelnelina kanomogae." huno hie.

17 Higeno Yisasi'a mage hie "Nenafa mainelega ohainogi natafa ohuka nagana'nimogamina mage huka mo hama-paiyo 'Nagai'ene tamakai'ene Nelafatega haigahe nehue. Nagai Anumaya Kotitegaene tamakai Anumaya Kotitegaene haigahe nehue.' hu'ka mo hama-paiyo." huno hie.

18 Higeno Magatala Malia'a via'yamo Yisasi'enema tokae'ya nemaiya anaga'amogamina mage huno hama-paiye "Nagaya Alani'amona ago agoe." huno nehuno "Nage mage huka hama-paiyo." huno'ma hapaiya kea hama-pai-maine.

Yisasi'a aleveni'a (11) anaga'amogamite eva'yi

hu-maine.

¹⁹ Yisasi'a fali-mainefiti'ma he-ti-mainea Sotamona hanipinaga Yisasina aleveni'a (11) anaga'amo'ya Yuta vayafena koli'ami hu'ya fita ki'ya tokiya'age hu-malete'ya nopinaga alitalu hu'ya mainae. Mainageno Yisasi'a eva'yi huno amu'no'amifi me he-ti-maineno mage hie "Tamaipamo'a falu nehinagetama maiho." huno hama-paiye.

²⁰ Hama-paiteno akai'ma ayapima nilima he-malenaya afugu'ene haopafina kevema aye-mainaya afugu'ene amave-neliye. Amave-lige'ya aleveni'a (11) anaga'amo'ya Ala'amimona agete'ya amaku'amo'a tusi'a muse hia kava hae.

²¹ Hageno Yisasi'a nago'ene mage hie "Tamaipamo'a falu nehinagetama maiho. Nenafa'a hu-na-tenea augafa kava hu'na nagaya tamakaila hu-nela-matoe." huno hie.

²² Mani kema nehuno'a haimula fu huno ne'amamino mage huno hie "Tamakaila Alu Aotage Avamula nelamamugi avaleho.

²³ Nago'a vea'mogamina ai-ge'ama-tetama kefo ya'amima atale-ma-tesayana Anumaya Koti'a ani'a huno ani kefo ya'amia ai-ge'ama-teno atale-ma-tegahie. Kefo ya'amima ai-ge'ama-tetama atale o'amatesaya vea'mogamina Anumaya Koti'a kefo ya'amia ai-ge'ama-teno atale o'ama-tegahie." huno hama-paiye.

Tomasi'a Yisasina age-maine.

²⁴ Yisasi'ma amakaite eva'yima hu-mainea yupa aleveni'a (11) anaga'afitila nago kanoa

amakai'enena omaine. Ani kanoa, Tomasi'e, nago agia Titimasi'e, tagai kefina kuyave nafa'ne, ani kanoa omaine.

²⁵ Omainege¹ya amakaya “Tagaya Alatimona age-mainone.” hu¹ya hane-paigeno¹a Tomasi¹a mage hie “Yisasina nilima he-malenaya afugu¹ma o¹age¹na, nagingoma nilimo kapima omale¹na haopafima keve honomu¹ma aye-malenaya afugupima nayama o¹vainu¹nahena mani kea ali¹na nagupina male¹na nametitia ohugahue.” huno hie.

²⁶ Seveni¹a (7) kana maite¹ya Yisasina aleveni¹a (11) anaga¹amo¹ya ete¹ya ani nopi mainageno Tomasi¹a amakai¹ene maine. Fita ki¹ya tokiya¹age hu-malayanagi Yisasi¹a eva¹yi huno amu¹no¹amifi me he-ti-maineno mage hie “Tamaipamo¹a falu nehinagetama maiho.” huno hie.

²⁷ Tomasifena mage hie “Kaginagoa male me maleka nayapi nafugula ago. Kayana nahaopale¹ma hanea nafugupina vaika ago. Ageteka tole kagesama havina kagesa ne¹ataleka nagaifena havika kagupi maleka kametiti huo.” huno hie.

²⁸ Higeno Tomasi¹a mage hie “Kagaya Alani¹amogae Anumaya Koti¹nimoga mainane.” huno hie.

²⁹ Higeno Yisasi¹a mage hie “Kagaya ago¹ma nagana yafe kagupina maleka kametitia nehananagi onagenesaya vea¹nemo¹yama havi¹ya amakupi male¹ya amametitima hisaya vea¹mo¹ya tusi¹a muse hugahae.” huno hie.

³⁰ Yisasi'a aleveni'a (11) anaga'amogami amaulagafina alu'a alu'a tokiya avame'ya'yaga hu-maineanagi ani yana muki'a mani auta'mafina okaenoe.

³¹ Okaenoanagi manima kae-maloa kea tamakaife huno Yisasi'a, Anumaya Kotina nafa'ne'amo'a, tagu tamema ali-gatisia kano maine hutamama havitama tamakupi maletama tamametitima hisaya yafe kae-malenoane. Ani yafe havitama tamakupi maletama tamametiti hisayana Yisasi agileti agola maige maige hisaya tamahaimula aligahae hu'na kae-malenoe.

21

Seveni'a (7) anaga'amo'ya Yisasina age-mainae.

¹ Haenaga'a Yisasi'a eteno agai'enema tokae'ya nemaiya anaga'amogami amaule ma kava huno Taipiliasi tikotumo agegayalega eva'yi hu-maine.

² Saimoni Pita'ene, Tomasina nago agia Titi-masi'e, tagai kefina kuyave nafa'ne, Nataniolo'a, Kalili hanea kumala Kena kumate kanoene, tole Sepeti nafa'nelata'a Yoni'ene, agana'amo'ene, tole Yisasina aleveni'a (11) anaga'aene mainae.

³ Mainageno Saimoni Pita'a mage huno hama-pai-maine “Nagaya noyame ku'ya hugahe ne'ue.” huno hige'ya mage hae “Kagai'ene ugahune.” hu'ya hapaite'ya tipi kalefi hai-saga humai'ya ani kegela vayanagi nagoke noyamea o'alinae.

4 O'aligeno yagea hai va'yi hugahe nehigeno Yisasi'a ti agegayalega he-ti-maiyanagi agai'enema tokae'ya nemaiya anaga'amo'ya Yisasi'e hu'ya agelama ohunae.

5 Agelama ohageno Yisasi'a mage huno hama-vige “Vae nafa'ne'nimogatama nago'a noyamea ne'alifi no'aliye?” huno hamavi-gege'ya “A'ao no'alune.” hu'ya hapai-mainae.

6 Hapaigeno Yisasi'a mage huno hama-paiye “Tamakaya kukonagona tipi kalemona tamaga kaiyagamo haikanagati haga'yu hutama male-sayana noyamea aligahae.” huno hama-paige'ya kukonagona ani'a hu'ya haga'yu hayana tusi'a noyame aligeno kana'age hige'ya alisaga hisaya yafena tusi'a ya hu-mainae.

7 Yisasi'enema tokae'ya nemaiya anagapiti nehaiya kano'amo'a Pitana mage huno hapaiye “Agaya Alatimo'e.” huno hapaiye. Hapaigeno Saimoni Pita'a anima hia kea nehavino aupa'a augafale ano'ya asagi-taleno ali'yana ne'alileti eteno aupa'a alino vai-lino tipina asaga hu-lavino Yisasitega ne'vie.

8 Vige'ya ani tipi kalea alu'lalelomagi vani hataleti (100) mita aupa'ale maine'ya nago'a Yisasi'enema tokae'ya nemaiya anaga'amo'ya kukonagona avayu hu'ya ti agegayalega emainae.

9 Ti agegayalega me maletе'ya agayana ata nelegeno nago noyamene hame mayaene ani atafina hanege'ya age-mainae.

10 Ne'agageno Yisasi'a mage huno hama-paiye

“Menima aliya noyamefitila nago¹a alitama eho.”
huno hama-pai-maine.

¹¹ Hama-paigeno Saimoni Pita¹a tipi kalefi hai-saga hu-maino kukonagona avayu huno ti agegayalegama eana kasago¹ya noyame, vani hataleti fifiti tali¹a (153) noyameyaga ani kukonagopina hiya hu-maiyanagi ani kukonagomo¹a ailagatoa ohune.

¹² Yisasi¹a mage huno hama-paiye “Tamakaya etama kavela me neho.” huno hama-paige¹ya agai¹enema tokae¹ya nemaiya anaga amama¹yoma aiya yafe “Kagaya lagae.” hu¹ya haviokenagi “Alatimo maine.” hu¹yama amakesafinaga haviya yafe haviokenae.

¹³ Yisasi¹a atale ea¹yamo hame mayaene noyamene melino amamine.

¹⁴ Yisasina komufima he-vai-tageno eteno¹ma he-ti-maineana tole yupa age-mainaleti eteno mani kava¹ma hiana napa tali (3) kanale eva¹yi hige¹ya agai¹enema tokae¹ya nemaiya anaga¹amogata taulagafiti age-mainone.

Yisasi¹a Pitafe “Sipi sipi¹nilela yagaiyo.” huno hapai-maine.

¹⁵ Kavela netageno Yisasi¹a Saimoni Pitana mage huno havige “Saimonigae Yoni nafa¹nemoga kagaya ma vayala amakaseka nago¹ene kagu¹a nenamino?” huno havige. Havigeveno Pita¹a mage huno hie “E, Alani¹amogae kagaya ago nehavine kagaifena nenahaiye.” huno higeno Yisasi¹a mage huno

hapaiye “Kagaya nagai sipi sipi nafa'neyaga kavela amamio.” huno hapai-maine.

16 Hanepaino nago'ene mage huno hie “Saimonigae Yoni nafa'nemoga kagu'a havika ago nenamino?” huno havigegenno Pita'a mage huno hapaiye “Kagaya ago nehavine nagaya kagaifena nenahaiye.” huno higeno Yisasi'a mage huno hapaiye “Kagaya sipi sipiyaga'nilela kava yagaiyo.” huno hapaiye.

17 Hapaiteno nago'ene napa tali (3) kanale mage huno havige “Saimonigae Yoni nafa'nemoga nagaifena negahaiyo?” huno higeno napa tali (3) kanale'ma “Kagaya nagaifena negahaiyo?” huno'ma havigea yafe Pita aipamo'a kana'age higeno mage huno hie “Alani'amogae muki'a yana ago havi-mainane. Nagaya kagaifema nenahaiya yafena ago nehavine.” huno hapaigeno Yisasi'a mage huno hie “Kagaya sipi sipiyaga'nia kavela amamio.” huno hapai-maine.

18 Hapaiteno mage hie “Tamage-lafa hu'na kaha-pauve kagaya neyama maineka kamu nofila ki-takalo hu-maleteka ‘Visue.’ hukama hana kumatela ne'vananagi haenaga'a kosunama lesanana kayana alisaga hulinisanage'ya nago'a vaya'mo'ya kenaka faiga-tete'ya ‘O'ugahuema.’ hukama nehisana kumatela afa'a kavale'ya ugahae.” huno hie.

19 Anima hia kemona aepa'amo'a mage huno hu-maine “Haenaga'a kefo vaya'mo'ya katafa hu'ya kahaesagekama falisana yateti Anumaya

Kotina ala agi amigane.” huno aepa¹a huteno Yisasi¹a Pitafena “Nakave eno.” huno hu-maine.

Yisasi¹a hau ayamopafima nehaiya kanomofe hu-mainea ke.

²⁰ Yisasi¹ene tokae¹ya nemaiya anagapiti hau ayamopafima hau-mainea kanoa kave¹ma ne-mainaya yupa Yisasina ava¹ale maineno mage huno havige-maineane “Alani¹amogae kagaila kagesi¹ma huno kamema hu-ga-tesia kanoa hana kanomo¹e?” huno havigea kanomo¹a Yisasi¹ene Pitagani anakave ne¹vigeno Pita¹a maiyahae huno age-maine.

²¹ Ageteno Pita¹a Yisasina mage huno havige “Alani¹amogae ani kanoa haenaga¹a hana augafa kava hugahie?” huno havige.

²² Havigegeno Yisasi¹a mage huno hapaiye “Nakai¹ma nahaisige¹nama ma mopafima ete¹na esua yupa afa¹a mainesige¹nama esuana kagai yano? Kagaya nakave eno.” huno hapaiye.

²³ Hapaiya kemo¹a anaga¹amogamipina mani kema hia kemo¹a ute ete higel¹ya mage hae “Yoni¹a ofaligahie.” hu¹ya hayanagi Yisasi¹a “Ofaligahie.” huno hu-o¹a-tenegi “Nagai¹ma nahaisige¹na ma mopafima ete¹na esua yupa afa¹a mainesige¹nama esuana kagai yano?” huno hu-maine.

²⁴ Ani kema hayana Yoninihe hu-maine. Nagaya muki¹a Yisasi¹ma hu-mainea kavafena tamaha-nepai¹na avona kae-malenoe. Nagayama nehua kea tamage-lafa hu¹na havilinoa ke tamaha-nepauve.

25 Yisasi'a muki'a alu ya alu yana hu-
maineanagi nago'a vaya'mo'ya mani kema
muki'a nagoke nagoke avopima kayale'asina
mani avo'yagamo'a kasago hige'ya malesaya
kuma'mo'a muki'a ma kotega nagesa havuana
hiya hile'asine hu'na nehue.

**Anumayamo'a Haegafa Alino
Hagelafilatenea Kea
The New Testament in the Kanite Language of Papua
New Guinea
Nupela Testamen long tokples Kanite long Niugini**

copyright © 2002 Wycliffe Bible Translators, Inc.

Language: Kanite

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-04-21

PDF generated using Haiola and XeLaTeX on 18 Apr 2025 from source files dated 31 Aug 2023

55807fd5-1005-5405-89da-5533a7950c65